

ଜ ମି ଲ

ଜ୍ୟୋତିରିନ୍ଦ୍ର ନନ୍ଦୀ

ସୌମ୍ୟୀ ପ୍ରକାଶନୀ । ବଳିକାତା-୨

ପ୍ରଥମ ପ୍ରକାଶ :

ସାହିତ୍ୟ, ୧୯୬୭

ପ୍ରକାଶକ :

ଶ୍ରୀଦେବକୂମାର ବହୁ

ସୌନ୍ଦର୍ଯ୍ୟ ପ୍ରକାଶନୀ

୧୫।୧୫, କଲେଜ ରୋ,

କଲିକାତା-୨

ସୂଚକ :

ଶ୍ରୀଧରଚନ୍ଦ୍ର ଶତ୍ତେ

ସାମାଜିକ ପ୍ରେମ

୧୬ମି, କାଳିଦାସ ମିଠୁ ମେନ

କଲିକାତା-୨

ପ୍ରାବନ୍ଧିନୀ :

ଶ୍ରୀପ୍ରମଦ ମୁଖ

ମାଧ୍ୟମ : ଛପ ଟାକା

સર્પિલ

এই লেখকের :

প্রেমের চেয়ে বড়

দ্বিতীয় প্রেম

অনুভূতির স্বপ্ন

ইত্যাদি

বিকেল থেকে তার মেজাজ খারাপ। আশ্বিনের বিকেল। কখন সূর্য ডুবে গেছে। তবু কিনা আকাশটা দগদগে ঘায়ের চেহারা নিয়ে লাল হয়ে আছে। হুঁ, পশ্চিমের আকাশ।

টেমনা মাছ ভাজছিল। রান্নাঘরের চৌকোনা জানালা দিয়ে উকি মেরে ছবার আকাশটা দেখেছে। দেখে চিন্তা করেছে, তার মনের ভিতরটাও এমন দগদগে ঘায়ের চেহারা ধরেছে।

আকাশ এখনি ঠাণ্ডা মেরে যাবে। লালটা আর থাকবে না।

কিন্তু, টেমনা চিন্তা করে, তার বুকের অলুনি বাড়তেই থাকবে। হুঁ, যত অন্ধকার হবে, রাত বাড়বে, তার ভিতরের ঘা আরো বেশি দগদগে চেহারা ধরবে।

কড়ায় মাছ পুড়ে যায়। ছেঁচড়া গন্ধ বেরোয়। উননের আগুন দাউ দাউ করে জ্বলছে। অথচ হাতের কাছে তেলের শিশি রেখেও টেমনা কড়ায় তেল ঢালে না।

যেন ইচ্ছা করে ঢাকা ঢাকা মাছগুলিকে পুড়তে দেয়। চচ্চড় শব্দ হয়।

‘এই টেমনা।’

টেমনা উত্তর দেয় না। চোয়াল শক্ত করে রাখে। হাতের খুঁটিটা দিয়ে উননের সামনের মাটি খোঁচায়। যেন ভিতরের রাগটা মাটি খুঁচিয়ে হজম করতে থাকে।

‘মাছ পুড়ে যায়।’ ওধার থেকে মেয়েলি গলার স্বরটা বেশ চড়া হয়ে উঠতে থাকে। ‘এই টেমনা, উননের সামনে বসে ঘুম মারছিল

মনে হয়।' ঢেমনা চুপ করে থাকে। কড়াইয়ের লালচে রুইয়ের চাকা কালো রং ধরতে থাকে। চচ্চড় শব্দটা বাড়তে থাকে।

‘এই ঢেমনা।’

যেন এবার ঘাড়েব উপর শব্দ হল। ঢেমনা চোখ তুলল, দাঁত খিঁচোলো।

‘কি হল।’

‘মাছ পুড়ছে।’

‘সে আমি দেখব—আমার কামকাজ নিয়ে তোর কথা কওয়া ঠিক না।’

‘মাছ পুড়ে যায়, কথা বলব না!’ চড়া গলায় বাঁজ ছুটল। ‘পোড়া মাছ বারু খাবেন কি করে!’

ঢেমনা কথা বলল না। চোখ তুলল না। খপ করে তেলের শিশিটা তুলে নিয়ে কড়ার মধ্যে গদগদ করে এত তেল ঢেলে দিল। চচ্চড় শব্দটা চোখের পলকে মজে গিয়ে ডুবো তেলের মধ্যে মাছগুলি নাচতে আরম্ভ করল, পুটপাট পুটপাট শব্দ হতে লাগল।

‘ইস, এত তেল ঢেলে দিলি।’ পাতলা লম্বা শরীরটা দরজার চৌকাঠে ঠেকিয়ে কুন্তি রান্নাঘরের ভিতর গাটা বাড়িয়ে দিল, ভুরু কপালে তুলল। ‘কখানা মাছ ভাজতে এক শিশির তেল খরচ করে ফেললি!’

‘বেশ করেছি, তুই এখান থেকে পাল।’ ঢেমনা ইচ্ছা করে আর একটা চেলাকাঠ উননের ভিতর ঠেসে দিল।

‘ইস করছিস কি!’ কুন্তি আর্তনাদের মতন গলায় সুর করল। ‘দপ দপ করে আগুন জ্বলছে, আবার একখানা কাঠ গুঁজে দিলি।’

‘বেশ করেছি। আমার কাজ আমি দেখব, তুই উঠতে বসতে নাক গলাতে আসবি না।’ কথাটা শুনে কুন্তির লম্বা নাকের ডগা কুঁচকে উঠল। হঠাৎ কথা বলল না। উননের সামনে উবু হয়ে বসা মানুষটাকে কটমট করে একটু সময় দেখল। কাঠের গুঁড়ির মতন

শুকনো ঝিকজিরে ছোটো হাঁটু, কালটা উঠ, লম্বা লম্বা চুলে কান কাঁধ ঢাকা পড়েছে, যেন কোনদিনই মাথার চুল কাটা হয় না, তেল দেওয়া হয় না, চিকুনি পড়ে না। গলায় ঝিঠে ঢাকা চামড়া মাটি শাওলার মতন চামড়া কামড়ে ধরেছে। ভয় করে চান করতেও বুঝি জানে না জোয়ান পুরুষটা। এত বড় বড় নখ হাতে পায়।

সব দেখে কুন্তি এমন চেহারা করল, যেন এখন খুখু ফেলবে। তা অণু ফেলল না, দারাদার লেটে ফেলল না। চৌকাঠ থেকে শরীরটা আনগা করে সোজা হয়ে দাঁড়াল।

‘এই ঢেমনা, আমার দিকে তাকা’

ঢেমনা তাকাল না। খুখু নিয়ে কচা : মাছ ওল্টাতে লাগল।

একটা ঢোক গিলল কুন্তি। হাত দিয়ে দেগী গা চেপে দিল। এই মাত্র চুল বেঁধে এসেছে। চেখে বাজল পনেছে। কপালে পাতা টিপ পরেছে। কবসা একখানা শাদি পরেছে।

এক ঘণ্টা ঢেমনা ঢোব তুলে একটু ভাল করে নজর করত ভো দেখতে নেত, গায়ে গলায় খানকটা পা উড়ান ছিটিয়ে দিতেও ছুঁড়ির ভুল হয়নি। এমন দেখতে হবে, আদা দেখে নাকের আগুন নতুন করে চেতিয়ে উঠবে বলে ঢেমনা উন্নন গেয়ে মুখ কুলভিল না।

‘এই ঢেমনা’, গলা নরম করে কুন্তি আর একবার ডাকল।

ঢেমনা আর একবার দাঁত খিঁচোলো। একটা ততো গেলার মতন ঢোক গিলল। তার ইচ্ছা করছিল, উন্নন থেকে একটা কাঠ তুলে পান পাতার মতন লম্বাটে মুখটায় ছেঁকা লাগিয়ে দেয়

হুঁ, অবিকল পান পাতার মতন মেয়েটার মুখের ঘের, চিবুকের দিকটা সরু, কপালের নিকটা ছড়ানো। চোখ দুটো বেশ দূরে দূরে বসানো, ছোট চোখ, চোখের ওপর হৃদিক থেকে ভুরু দুটো এসে হঠাৎ এমন ভাবে থেমে গেছে—নাকের ওপর দিকটা কপালের কাছটা কেমন ফাঁকা ফাঁকা মনে হয়। তবে কিনা টিপ পরলে জায়গাটা ভরাট ভরাট দেখায়, তেমন খারাপ লাগে না, তা না হলে কপালের

নিচের ওই ভুরু মুছে যাওয়া জায়গাটা দেখলেই কেমন মেজাজ খারাপ হয়ে যায় ঢেমনার। প্রথম প্রথম তার ইচ্ছা করত মেয়েটার মুখটা টিপে দেয়—এমন খাপছাড়া ভুরু তার স্হ হত না। এবং বেশিক্ষণ যাতে মুখটার দিকে তাকাতে না হয় তাই সে অল্প দিকে চোখটা সরিয়ে নিত।

‘এই ঢেমনা!’ চৌকাঠের এদিকে এক পা বাড়িয়ে দিয়ে কুস্তি রান্নাঘরের ভিতরে এসে দাঁড়াল।

ঢেমনা মুখ তুলল না। উন্ন থেকে কড়া নামিয়ে ভাজা মাছের টুকরোগুলি বাটিতে তুলতে লাগল।

‘এমন রোগে থাকিস তুই আমার ওপর সব সময় —।’ কুস্তি চমৎকার অভিমানের শুরুর করল। ‘যেন আমি কত অপরাধ করেছি।’

‘তুই এখান থেকে সরে যা—আমার কাজ আমাকে করতে দে—’ ঢেমনা এবার চোখ তুলল। টিয়া রঙের একটা নতুন জামা গায়ে দিয়েছে ছুঁড়ি। সাদা খোলার ধোয়া শাড়ি পরনে। আঁচলটা ভয়ানক চওড়া, তার ওপর একটু মৃগার কাজ। তার মানে বেশ দামী শাড়ি।

অর্থাৎ, ঢেমনার বুঝতে আর বাকি রইল না। মাছ ভাজা পুড়ে যাচ্ছে, কড়াইয়ে এত তেল ঢালিস কেন—এসব বলতে মেয়েটা এখানে দাঁড়ায় নি, দাঁড়িয়েছে নিজের সাজসজ্জা দেখাতে। যা তার স্বভাব।

দিন দিনই এটা বাড়ছে। বাড়বার কারণ আছে যদিও। আর সেজেগুজে একবার ঢেমনার চোখের সামনে এসে দাঁড়াবেই।

আগে আগে ঢেমনা চোখ তুলে তাকিয়েছে। তবে তখন সাজ-গোজের এতটা বাড়াবাড়ি ছিল না। মুখে পাউডার, চোখের কিনারে কাজল—এ সব একেবারে ছিল না। মাথায় চুলটা বেশি এবং বেশ কালো কোঁকড়া মতন চুল, কাজেই বেণীটা ঘটা করে সব সময়েই বাঁধা হয়।

হঁ, জমকালো বেণীটা দেখাতে বা একখানা ভাল শাড়ি বা জামা প্যায়ে চড়ালে সেটা দেখাতে ঢেমনার সামনে এসে মেয়েটা দাঁড়িয়েছে।

কিন্তু এই ছুঁমাসে তার সজ্জার ঘটা যে কত বেড়ে গেছে, ঢেমনা চোখের ওপর দেখল।

যাই হোক, গোড়ার দিকে ঢেমনার ভালই লাগত। সরলভাবেই সে তার দিকে চোখ তুলে তাকিয়েছে।

কিন্তু ছুঁড়ি তার এই সরলতা রাখল কি? রাখল না। রাখত, যদি সে নিজেকে সরল হত। কিন্তু তা যে নয়, ঢেমনা দু-একদিনেই বুঝে গিয়েছিল। এবং কেন সরল নয়, কেন ভিতরটা এত বাঁকাচোরা, এখন ঢেমনার কাছে জলের মতন সহজ হয়ে গেছে। এ সব মেয়ে তাই হয়, তাদের ভিতরে পাকচক্র ছুঁটামি বুদ্ধি ছাড়া আর কিছুই নেই। হুঁ, ঢেমনা তখন দেখত, সাদা মন নিয়ে সে একবারের জায়গায় ছবার ওর মুখের দিকে তাকিয়েছে তো, ঠোঁটে মোচড় দিয়ে এমনভাবে ছুঁড়ি হাসত, এমন নাক কুঁচকাত, যেন বলতে চাইত, আমার দিকে বেশি তাকাবি না, তাকালে তোর বুক জ্বলে যাবে, রাত্রে চোখে ঘুম আসবে না, খাওয়ায় অরুচি ধরবে।

এখন অবশ্য ওই মুখটার দিকে না তাকিয়েও ঢেমনার বুক জ্বলা করে, রাত্রে চোখে ঘুম আসতে চায় না—খাওয়ার রুচিটা পর্যন্ত চলে যায়, কিন্তু সে অশ্রু কারণে।

ছুঁমাস ধরে কত কীৰ্তি সে চেখের ওপর দেখেছে।

যাই হোক, ওই ঠোঁট মোচড়ানো হাসি আর নাক কুঁচকানো দেখে ঢেমনার ঘেরা ধরে গিয়েছিল। তারপর যতই সেজেগুজে সামনে এসে দাঁড়াক, ঢেমনা জোর করে চোখটা অশ্রু দিকে ঘুরিয়ে নিয়েছে, নয়তো হাতের কাছে মন দিয়েছে।

যেমন এখন। সে ঠিক বুঝতে পেরেছিল, নতুন জামা দেখাতে, শাড়ি দেখাতে চৌকাঠে ঠেস দিয়ে এসে দাঁড়িয়েছে ছুঁট।

অথচ ঢেমনা যে কত বিরক্ত হয়, রাগ করে, তা-ও যে ছুঁড়ি না বোঝে এমন নয়, কিন্তু কথায় আছে, স্বভাব দোষ ছাড়ানো যায় না। বেটাছেলের সামনে সেজেগুজে শরীরটা একবার

হাজির করতে না পারলে এ সব মেয়ের পেটের ভাত হজম হয় না।

আজ ঢেমনার ইচ্ছা করছিল উননের একটা কাঠ তুলে ওই মুখটা ঠিক জালিয়ে দেবে। পোড়া মুখটা নিয়ে আর কোনোদিন যাতে তার সামনে ন্যাকামা করতে না আসে।

‘ঢেমনা!’ কুন্তি আর এক পা কাছে এসে দাঁড়াল। ঢেমনা ভাঙা মাছ ঢেকে রেখে উননের হাঁড়ি চাপাতে যাবে—ঠক করে হাঁড়ি হাত থেকে মাটিতে পড়ে গেল। আনুমানিকের বাসন, শক্ত সিমেন্টের গায়ে ঠোকা হোগে তলার দিকটা নৈকে ছমড়ে গেল।

‘আহা, করিস কি!’ কুন্তি হিস হিস করে উঠল। জিনিসপত্তর এত নষ্ট হয় তোর হাতে—এত ক্ষতি করিস তুই বাবুর—’

আর সহ্য হল না। হুয়ে হাত বাড়িয়ে উননের একটা কাঠ টেনে তুলে ঢেমনা কুন্তির দিকে রাখা গেল।

‘আঁ, করিস কি, করিস কি—ওরে বাস্—’ কুন্তি একটা লাফ দিয়ে চৌকাঠ ডিঙিয়ে পাশের ঘরে ছুটে গেল তারপর দড়াম করে দরজা বন্ধ করে ওদিক থেকে চিটাকনি তুলে দিল।

‘তোকে ঠিক আমি পুড়িয়ে মারব। তোমার মুখটা যদি একদিন জালিয়ে না দিয়েছি আমার নাম সুবলচন্দ্র নয়।’ হাড়ের কাঠ দাউ দাউ করে জলছিল। সেটা শূন্যে উঠিয়ে বসে ঢেমনা দরজার এপাশে দাঁড়িয়ে রীতিমত লাকাতে শুরু করল।

দরজার ওপাশ থেকে কুন্তি ভাটি কাটাইল। ‘হুঁ, সুবলচন্দ্র মা আর কিছু—ঢেমনা, ঢেমনা—যেমন চেহারা তেমন একটা বদখত নাম।’

‘শয়তান মেয়েছেলে, বজ্রাতি মেয়েছেলে নষ্ট মেয়েছেলে।’ ঢেমনার ইচ্ছা করছিল হাড়ি নিয়ে কপাল ভেঙ্গে ফেলে পাশের ঘরে ঢুকে পড়ে। হুঁ, সুবলচন্দ্রর সঙ্গে তার আর একটা নাম, এই ঢেমনা নামটাও বাপ মা খুঁজে দিয়েছেন বলা এসে মোটেই হুশে করে না।

এই নিয়ে ওঘর থেকে বাজে মেয়েছেলেটা যতই টিটকারি দিক —তার রাগ আর এক জায়গায়, অশ্রু ঝরনি নিয়ে। ‘আর কোনোদিন আমার সামনে এসে দাঁড়াবি তো মাথি মেরে তোর কোমর যদি ভেঙ্গে না দিয়েছি তো আমার নাম সুবলচন্দর না।’ রেগে গেলে ঢেমনা কেমন ঝাঁড়ের মতন গর্জন করতে পারে ওপাশে দাঁড়িয়ে কুস্তি বেশ টের পাচ্ছিল তা।

‘গুণ্ডা, কলকাতা থেকে বাবু একটা গুণ্ডা ধরে নিয়ে এয়েছেন— কেন যে তাকে ধরে নিয়ে এল আর কেন যে থালা থালা ভাত গেলানো হচ্ছে আমি আজও বুঝতে পারলাম না।’ কুস্তির গলাও কম যাচ্ছে না।

‘তোর বাপের ভাত খাচ্ছি, তোর চৌদ্দ পুরুষের দানা গিলছি, ছোটলোক মেয়ে।’ সব কটা দাঁত ছড়িয়ে দিয়ে ঢেমনা কপাটের এপাশ থেকে হাতের অঙনটা শূন্যে নাড়তে লাগল। ‘তোর মুখের দিকে তাকালে থুথু ফেসতে ইচ্ছে করে, তোর গতরের দিকে চোখ পড়লেই মনে হয় ওখানে রাজ্যের পোকা কিলবিল করছে।’

‘এই গতরের জন্তাই তো রাতের বেলা তোর ছটফটানি শুরু হয়, চোখে ঘুম আসে না, এই মুখের জন্ত চব্বিশঘণ্টা তোর ‘জন্ত থেকে লাল্য ঝরছে—’

‘উছ, নর্দমা নর্দমা, দুর্গন্ধ—’

দুজনেই সমান জোরে চোঁচাচ্ছিল, হঠাৎ একসঙ্গে দুজনের গলা ধেমেল গেল। বাইরে মোটর সাইকেলের শব্দ শোনা গেল। বাবু বাড়ি ফিরলেন।

রান্নাঘরের পিছনে ওদিকে বৈঁচি খোপের আড়াল থেকে টপ করে লাল রঙের গোল চাঁদ লাফিয়ে আকাশে উঠে গেল। ঢেমনা চুপ করে জানালায় দাঁড়িয়ে ছবিটা দেখতে লাগল।

খুব যে মনোযোগ দিয়ে চাঁদটাকে সে দেখছিল তা নয়। প্রথম প্রথম এসব জিনিস দেখে সে খুবই অবাক হত। ছমাস আগের কথা। যেমন সকাল বেলায় হলদে রোদ, ঘাসের মাথায় মুক্তার মতন টলটলে শিশির, ছপুরের রোদে ঝিমানো আকাশ, দূরের আকাশে ভেসে যাওয়া চিল, রাতে অন্ধকার গাছপালার জটলা, খৈ ছিটানো তারার ঝিলিমিলি, এবং কোনোদিন রূপোর থালার মতন, ঝলসানো রুটির মতন চাঁদ। চাঁদ না থাকলে কালো ধমধমে রাত, অথবা এক একদিন এই অন্ধকারের মধ্যে বৃষ্টির একটানা ঝমঝম শব্দ। অবাক হয়ে সব দেখত, কান পেতে শুনত। কিন্তু ছদিন না যেতেই সব কেমন পুরনো হয়ে গেল। যেন কিছুই আর চমক থাকল না।

পাশের ঘরের ওই কুস্তি ছুঁড়ির মতন। সেজেগুজে হ্যাজাকের আলোর নিচে বাদলা পোকাকার মতন ছোটোছুটি করে বাবুর তোয়াজ করতে যে এখন উঠে পড়ে লেগে গেছে। হুঁ, বাবু খেতে বসেছে, কুস্তি পরিবেশন করছে।

না, নতুন কিছুই রইল না আর ঢেমনার শহরে চোখ ছটিতে, বরং এসব দেখে তার এখন গা বমি বমি করে।

‘এই ঢেমনা।’

ঢেমনা চমকে উঠল। চাঁদ দেখা হল না। ঘাড় ঘুরিয়ে দরজায় চোখ রেখে ভুরু কোঁচকাল।

‘কি হয়েছে।’

‘মাছের খোলে এত নুন দিয়েছিস!’

‘কে বলেছে।’ ঢেমনার চাপা গলা ফুঁসে উঠল।

‘বাবু বলেছে, তোর মনিব।’ চিকন দাঁত ছড়িয়ে কুস্তি হাসল। কেন না এখন আর গুণ্ডাটাকে ভয় নেই। বাবু ঘরে আছে।

এখন ঢেমনার লক্ষ্য বক্ষ্য একেবারে বন্ধ, বাঁড়ের মতন চোঁচাচ্ছে না, উননের কাঠ তুলে কুস্তির মুখে ঠেলে দিতেও ছুটে আসছে না। সাপের মাথায় ধুলো পড়ার মতন চুপটি করে রান্নাঘরে দাঁড়িয়ে আছে। যেন এই জন্তাই কুস্তি না হেসে পারল না। ‘হুঁ, মুন কাটা হয়েছে বলে বাবু মাছের ঝোলটা মুখে তুলতে পারল না।’

ঢেমনা চুপ করে রইল।

‘বুঝলি?’ কুস্তি আবার বলল, ‘বাবু বলেছে একটু সাবধান হয়ে রান্নাবান্না করো।’ কুস্তি ভুরু নাচিয়ে কথা বলল, যেন ঢেমনাকে এমন একটা উপদেশ দিতে পেরে তার ভাল লাগছিল।

‘তুই যা, এখান থেকে সরে যা।’ ঢেমনার মাথাটা আবার গরম হয়ে উঠল। কোন রকমে সামলে নিল। চাপা গলায় বলল, ‘হাতের পাঁচ আঙুল সমান না, পাঁচদিনই কিছু একরকম রান্না হয় না।’

বাটি হাতে করে কুস্তি বাবুর জন্ত আরও ভাত নিতে এসেছে। ‘হাঁড়িটা এদিকে বাড়িয়ে দে।’ কুস্তি চৌকাঠে দাঁড়িয়ে কথা বলছিল।

ঢেমনা কথা না বলে ভাতের হাঁড়ি কুস্তির সামনে ঠেলে দিল। কুস্তি হাতা ডুবিয়ে হাঁড়ি থেকে ভাত তুলতে লাগল। আঁচসটা আঁট করে কোমরে জড়িয়েছে। ঝোলানো বেগীটা পেঁচিয়ে ওপরের দিকে তুলে খোঁপার মতন করেছে। এবং ঢেমনা দেখল ইতিমধ্যেই, যেন বাবুর বাড়ি ফেরার ক’ মিনিটের মধ্যেই মাথার চুলে ছোটো বেলফুল গুঁজে নিয়েছে ছুঁড়ি। মানে সজ্জাটা আর একটু বাড়িয়ে দিয়েছে। না কি বাবু নিজের হাতে ফুল ছোটো ওখানে গুঁজে দিল। ঢেমনা ভাবতে লাগল। কুস্তি ভাতের বাটি তুলে নিয়ে দরজা থেকে সরে গেল। যাবার আগে একটা ঠোট মোচড়ানো হাসি ঢেমনাকে উপহার দিয়ে গেল।

এবার আর ঢেমনা ভেমন একটা রাগ করল না। কেন না মোচড় দেওয়া ঠোটের হাসির চেয়েও মারাত্মক জিনিস এই মাত্র তার নজরে পড়ল। হুঁ, খোঁপায় ফুল।

যেন চিন্তাটা ধারাল ছুরি হয়ে তার বুকের ভিতর ফালা ফালা করে দিতে লাগল।

অর্থাৎ এ থেকে বোঝা যায়, বেণীয়া মেয়ে কত নিঃ আশ্বারা পাচ্ছে বাবুর কাছে। না, ঢেমনা ভাবল তার এই চিন্তাটাও খুব একটা ঠেলে দেবার নয়। বাবু হয়তো বাড়ি ফেরার সময় হাতে করে বেলফুল নিয়ে এসেছিল। ঘরে এসে খেতে বসার আগে ওই বেড়ালের মতন ছোট্ট গোলগাল মাথাটা কোলের কাছে টেনে নিয়ে আনি করে দুটো ফুল গুঁজে দিয়েছে। কেনই বা অমন চিন্তা না করবে ঢেমনা। সাবান, স্নো, পাউডার, গন্ধ তেল, আঁস্তা অঁস্তা সব কিছুই আদায় করছে ছুঁড়ি বাবুর কাছ থেকে। শাড়ি জামা তো আছেই। তাও বেশ ভাল, দামী জামা কাপড়। বাড়ির নৌ দিদের পবার মতন জিনিস।

কাজেই বাড়ির পোয়ের মতন আহ্লাদ করে খোঁচায় ফুল গুঁজে দেওয়া বাকি থাকবে কেন।

বাকি কিছুই নেই। ঢেমনা সব টের পায়।

হাতের মুঠ পাকিয়ে শরীরটা শক্ত করে বখে সে টাঁদটাক দেখতে লাগল। ওদিকের তেঁতুল গাছের মাথায় ঝেঁপে গেছে। এখন আর লাল রুটির চেহারা নেই, তোল খাওয়া একটা রুণের খালা হয়ে ঝকঝক করছে।

তবে কি ঢেমনা আবার শহরে ফিরে যাবে—যমন ছিল সেখানে? রুটির গাড়ি নিয়ে বাড়ি বাড়ি বিলোবে? বনজঙ্গলের দেশে এসে কলকাতার রাস্তার ছবিটাই এক একদিন নতুন করে দেখতে আরম্ভ করে সে। যেন ঐ জীবনটাই তার ভাল ছিল। বেলবাটার বস্তির

হেলে। কলের ধোঁয়া, বাস মরীর ঘড়-ঘড়, গাড়ির ভিতর এক গাদা মানুষের হাসি কান্না হৈ-রৈ চিংকার, রাস্তায় গিজ গিজ মানুষ। পাড়ায় বারোয়ারী দুর্গাপূজা, কালিপূজা, মাঠেই আকাশ কাটানো শব্দ, আর এ সবের মাঝখানে ধোঁয়ে না খোঁয়ে আঠারোটা বছর ঢেমনার একটু একটু করে বড় হয়ে ওঠা। বাবা বছর বয়স পর্যন্ত বেলেঘাটা চৌহদ্দীর মধ্যে ছিল। ডাঙুলি খেলেছে, ঘুড়ি উড়িয়েছে, খালের জলে মাছ পকিয়েছে, দোকান ভেঙে শেয়ালদার রাস্তায় ছুটে গিয়ে ট্রাম বাস পৌড়ানো দেখেছে। তার বড় হতে একদিন বাবা মারা গেল।

রোগা একটা মানুষ। সারা মুখে কাঁচাশাকা দাড়ি। চেহারাটা পরিষ্কার মনে আছে ঢেমনার। শেয়ালদার ফুটপাথে বসে গামছা বেঁচত।

হুঁ, বাবা মরল আর ঢেমনাকেও তেঁবো বছর বয়সে কুজি-রোজ্জগারের ধান্দায় শহরে বেড়িয়ে পড়তে হ'ল। বেলেঘাটার আকাশ বাতাস আর তাকে ধরে রাখতে পারল না।

শেয়ালদা থেকে আরম্ভ করে লালবাজার, লালবাজার থেকে আরম্ভ করে ভবানীপুর, ওদিকে বেহালা, উত্তরে বনানীর মাথার ওপর আকাশটা অনেক বড় হয়ে গেল। আর বাতাস। কত রকম বাতাস যে ঢেমনার গায়ে লাগল, আর বাতাসে ভর করে চলা কত রকম গন্ধ তার নাকে লাগল ভাবলে সে এখন অবাক হয়। চায়ের দোকানে চাকরি, হোটেলে বাসন মাজার কাজ, অ্যাসিড কারখানায় শিলিবোতল ধোয়া, কাঁধে মায়া রাউজ নিয়ে পাড়ায় পাড়ায় ঘুরে, বাড়ি বাড়ি ঘুরে ক'দিন ব্যবসা চালাবার চেষ্টা। হুঁ, বাকুইপুর থেকে ঝিঙে বেগুন এনে বৈঠকখানার বাজারে বেপারীদের হাতে তুলে দেওয়া—অনেক কিছু করেছে সে, অনেক কিছু দেখেছে।

দেখতে দেখতে জীবনের কুড়িটা বছর পার হয়ে গেল। এখন তার বয়স একুশ। মুখে রোঁয়া রোঁয়া গোঁক, দাড়িটা আর ভাল

করে গজাল না—হয়তো আর গজাবে না, ধরে রেখেছে সে। এই জন্তু তার মাথাব্যথা নেই। অনেকেরই এমন হয়। রোঁয়া রোঁয়া গোঁফ, গালটা ছোট ছেলের মতন পালিশ নরম।

তা বলে শরীরটা নরম কি? কলকাতার রাস্তার রোদ বৃষ্টি ধুলো ধোঁয়া লেগে লেগে গায়ের চামড়া যেন পোড়া রং ধরেছে, তেমনি আমার মতন শক্ত হয়ে গেছে মাথা পিঠ গলা বুক।

হুঁ, বুকটা বেশ ছড়িয়ে পড়েছে, গড়নটাও চমৎকার লম্বা হয়েছে। নাকটা উচু, চোখ মাঝারী।

না, এতকাল আরশীর সামনে দাঁড়ানো, কি মুখের সামনে আরশী ধরে নাক চোখ দাঁত মুখের হাঁ খুঁটিয়ে দেখার তার সময় ছিল না, সুযোগও ছিল না। এখন এখানে বাবুর বাড়িতে এসে নিজের চেহারাটা ভাল করে দেখে সে, দেখতে হয়। এই জন্তু একটা হাত-আয়না যোগাড় করতে হয়েছে তাকে, গাঁয়ের হাট থেকে নিজের পয়সায় কিনে এনেছে। রাত্রে কাজ কর্ম চুকিয়ে তার ছোট শোবার ঘরে বসে কেরোসিনের লফটা সামনে রেখে বালিশের তলা থেকে হাত-আয়না বার করে যখন মুখটা দেখতে থাকে, অনেক মুখ মনে পড়ে তার, এই কুড়ি একুশ বছরের জীবনে কত মুখ দেখল সে, কত নাক চোখ ভুরু। ‘কিন্তু আমার এই চেহারা, এই শরীর?’ ভাবতে থাকে ঢেমনা, ‘পীরিত করার মত নয়?’

তখন সে মনে করতে চেষ্টা করে, ঢেমনা সতেরো বছর বয়স থেকে, মানে শরীরটা যখন ঢেঙা হতে শুরু করল, বুকের ছাতি একটু একটু করে ছড়াতে আরম্ভ করল, রোঁয়া রোঁয়া গোঁফ নাকের নিচে কালচে রেখা ফেলে মাথাচাড়া দিয়ে উঠল, আর গলার স্বর বদলে গেল, ধর্মতলার চায়ের দোকানের চাকরিটা ছেড়ে দিয়ে সায়া রাউজ কাঁধে নিয়ে কলকাতার রাস্তায় ঘোরাঘুরি শুরু হল; বেহালা, খিদিরপুর, শ্রামবাজার, বরানগর, উল্টাডাঙা, নারকেলডাঙা—হুঁ, সেদিন থেকে আজ পর্যন্ত, আজ দুমাস ধরে না হয় এই বনজঙ্গলের দেশে একটা

বাড়িতে এসে ঠেক খেয়েছে, তা না হলে মেয়েছেলে সে কম দেখেছে ?
নাকি তারা কেউ তার দিকে তাকায়নি ? না কি তাকিয়ে একবার
দুবার ঠোঁট মোচড়ানো হাসি হেসে নাকের ডগা কঁচকে তখন
আবার অশ্রুদিকে মুখটা ঘুরিয়ে নিয়েছে ?

মনে করতে পারে না, কিছুই মনে করতে পারে না ঢেমনা ।
তার সময় হয়নি কোনো মেয়েছেলের দিকে তেমন করে তাকাবার,
তেমন করে কাউকে বিচার করার । তার শরীর দেখে, নাক চোখ
চুল গায়ের রং দেখে, তাদের এক এক জনের চেহারা কেমন হত,
ভাবতে গিয়ে আজ যেন অথৈ জলে পড়ে হাবুডুবু খায় সে । তাই
হাট থেকে এই ছোট্ট আরশী কিনে এনে রাত্রে ঘরে বসে কেরোসিনের
লম্ফ জ্বলে মুখটা এত খুঁটিয়ে পরীক্ষা করা ।

‘আমার এই চেহারা, এই শরীর, কোনো মেয়েছেলের চোখে
ভাল লাগল না ?’

বিছানায় বসে লম্বা লম্বা নিশ্বাস ছেড়ে সে ভাবতে থাকে ।
হয়তো আরশী নামিয়ে একসময় পাশে সরিয়ে রাখে । ফুঁ দিয়ে লম্ফটা
নিভিয়ে দেয় । উঁহ ঘুম আসে না চোখে । বিছানায় শুয়ে চাঁদটাকে
দেখে । হলদে চেহারা ধরেছে এখন । তেঁতুল গাছের মাথার ওপর
দিয়ে এতবড় আকাশটা ডিঙিয়ে জানালার কাছে নেমে অরো রুগীর
মতন ঢুলুঢুলু চোখ নিয়ে চাঁদটা যেন তার দিকেই তাকিয়ে থাকে ।

‘এই ঢেমনা !’

ঢেমনা চুপ করে থাকে উত্তর দেয় না ।

‘কি হল, ঘুমিয়ে গড়লি।’ দরজায় ঘা দেয় ছুঁড়ি। বাঁশের দরজা থরথর করে কাঁপে। ‘কী মুশকিল, দোবটা খোল একবার, কথা আছে।’

‘বাতি নভিয়ে শুয়ে পড়েছি।’ ঢেমনা কড়া সুরে জবাব দেয়।

‘একটি বার খোল, আলোটা জ্বলে নে।’ নরম গলার কাতরানি, যেন গলে যেতে চাইছে বজ্জাত মেয়ে। ঢেমনা দাঁতে দাঁত ঘষে চুপ করে থাকে। এত রাতে হঠাৎ এখানে তার কী দরকার পড়ল, কিছুটা যে সে অনুমান করতে না পারে এমন না।

কাল সকালে রেলস্টেশনের বাজারে যেতে হবে, বাবুর সিগারেট ফুরিয়েছে, সিগারেট আনতে হবে, সেই কবে আবার হাট বসবে, হাটের জন্ত বসে থাকলে চলবে না। হুঁ, সিগারেট, পাউরুটি, দাড়ি কামানোর ব্রেড যে কোনো একটা জিনিসের ফরমায়েস নিয়ে রাত ছপুরে তাকে জ্বালাতন করতে এসেছে মাগী। অর্থাৎ সকালে ঘুম থেকে উঠে যে কথা বললে চলত, যে কাজে পাঠালে চলত, সেটা এখনই এসে জানান না দিয়ে গেলে যেন চলছিল না ছুঁটে মেয়ের।

হুঁ, এখনই দরজা খোলো, আলো জ্বালো,—অর্থাৎ এই মাঝরাতে আর একবার, শেষবারের মতন আমার শরীরটা দেখে, সজ্জা দেখে, চুলের ফুল দেখে তুমি ভোররাত পর্যন্ত বিছানায় গড়িয়ে জ্বলতে থাকো।

‘ঢেমনা!’


‘হবে না, আমি এখন উঠতে পারব না।’

‘বাবুর ফরমাস আছে।’

‘কাল সকালে ফরমাস শোনা যাবে।’

‘ইস, মনিবের খাস মনিবের পরিস—আর তার কাজে তোর আলসেমী।’

ঢেমনার ইচ্ছা করছিল একটা লাকড়ি দিয়ে দরজা খুলে বেরিয়ে যায়, আচ্ছা করে বজ্জাতের চুলটা টেবেরে দেয়।



কিন্তু বাবু ঘরে আছে, হয়তো এখনো ঘুমোয়নি, চিন্তা করে দাঁ^{টার}
দাঁত চেপে অন্ধকারে চুপ থেকে হাতের মৃঠ দুটো পাকাত লাগল।

‘এই উঠলি?’

ঢেমনা শুনল না। যেন ঘুমিয়ে পড়েছে। ইচ্ছা করে নাক
টেনে টেনে নাক ডাকার ঢং করতে লাগল।

কিন্তু ছুঁড়ি নাছোড়বান্দা। বাঁশের বেড়ার গায়ে ঝাঁচড় কাটতে
লাগল, আস্তে কিল দিয়ে থুপথুপ শব্দ করতে লাগল।

‘আমি এখনই গিয়ে বাবুকে বলছি।’

‘কি বলবি?’ ঢেমনার আর চুপ থাক হল না।

‘তুই এক।’ বেইমান, নিয়কহারাম। বেড়ার গায়ে মুখটা চেপে
ধরে কুন্তি হিস হিস করে উঠল। মনিবের খাচ্ছিস মনিবের পরচ্ছিস,
আর তার কাজে তোর যত গাফিলতি—আলসেমী।’

‘সারাদিনই খাচ্ছি, অনেক কাজ করা হয়।’

কিছুতেই আর শুয়ে থাকা হল না, বিছানায় উঠ বসল ঢেমনা।

অন্ধকারে দরজার দিকে চোখ রেখে একটা একটা কাজের ফিরিস্তি
দেয়। ‘উঠান বাঁটি দেওয়া, জল তোলা, হাটবান্দার করা, কাঠ কাটা,
ছবেলা জল তোলা, বান্না, এঁটো সাফ করা, কুত্তার সেবা-যত্ন করা,
ফুলগাছে জল দেওয়া—ভোর পাঁচটা থেকে রাত দশটা, কত আর খাটা
যায়।’

‘যেন বসির খেতে পরতে দিতে আদর করে কলকাতা থেকে
তাকে নিয়ে এসেছে তোর মনিব।’

কুন্তিও তার কাজের ফিরিস্তি দেয়। ‘নাকি আমি বসে বসে
খাচ্ছি। বাবুর জামাকাপড় গুছিয়ে রাখা, চানের জল গামছা এগিয়ে
দেওয়া, বিছানা করে দেওয়া, পানটা জলটা হাতে তুলে দেওয়া, তার
ওপর পাখার বাতাস, মশারী খাটানো, ঘর সাজানো—’

‘তোর গোবায়’, ঢেমনা সঙ্গে সঙ্গে কামড় বসিয়ে দিল। ‘বাবুর
জন্তু খাটাখাটনি করে তোর লাভ ছাড়া লোকসান হচ্ছে না কিছু।

‘জাল শুকানো, গাব সেক করা, জ্বালে রং দেওয়া, মাছের পেট গেলে রোদে শুকিয়ে শুঁটকি করা, সব ছেড়ে ছুড়ে বাবুর কাছে এসে তুই মহানুখে আছিস।’

দরজার ওপিঠ থেকে কুস্তি ফুঁসে উঠল। ‘সুখটা কি শুনি! খাটছি তাই ছুটো খেতে পরতে পারছি— তুই কিছু উপোস আছিস? না নেংটো হয়ে আছিস?’

ঢেমনা গলার নিচে হাসল। তার এই ঘিনঘিনে হাসি কুস্তিকে আরও চটিয়ে দিল।

‘তাই তো বলছি, তুই বেইমান নিমকহারাম—’

‘আমি শালা চাকর, চাকর হয়ে আছি—’ অন্ধকারে ঢেমনা গলা খিঁচিয়ে উঠল। ‘কিন্তু তুই আর চাকরাণী নেই—বিবি হয়ে আছিস, কোথায় জাল নিয়ে, মাছ নিয়ে বাপের ডেরায় দিন কাটছিল, গায়ের গন্ধে ভূত পালাত, এখন তোর গায়ে বাহারের শাড়ি জামা, মাথায় গন্ধ তেল—ছনো কিরিম পাউন্ডারের ছড়াছড়ি, খোঁপায় ফুল।’

‘তাই তো বলছি, তোর চোখ টাটায়, রাতদিন কেবল আমার হিংসে, ভাল করে আমার দিকে তাকাতে পারিস না।’

‘তোর দিকে চোখ রাখলে বমি আসে, গা জ্বালা করে, পেট গুলাতে থাকে—’

‘ইতর ছোটলোক, শুনছি না কি, আমার কানে এসেছে সব, কলকাতার রাস্তায় কুত্তার মতন উপোস থেকে সারাদিন ফ্যা ফ্যা করে ঘুরতিস।’

‘হুঁ, তোর বাবার মুখে শুনেছিস সব, তোর নাঙের মুখে শোনা কথা—’

‘শুণা, আমি এখনি গিয়ে বাবুকে বলব, কলকাতা থেকে পাকা বদমাস বাড়ীতে আমদানী করা হয়েছে। এখনি এটাকে তাড়িয়ে দিক।’

‘তোর বাবুর নিকুচি করি।’ ঢেমনা বিছানা থেকে লাফিয়ে দরজার

কাছে ছুটে গেল। ‘রাত ছপুৱে এসে জালাতে আৱন্তু কৰেছিস—তোৱ
মাথাত সব কটা চুল যদি—’ বলতে বলতে দৰজা খুলে সে বেরিয়ে এল।

কুস্তিও কিছু বোকা মেয়ে না, সঙ্গে সঙ্গে দূৰে সূৰে গেল।
উঠোনেৰ ওপাশে লেবু গাছৰ নিচে দাঁড়িয়ে হি-হি কৰে হাসতে
লাগল। জ্যোৎস্নায় অন্ধকাৰে ঝোপেৰ নিচে কেমন অদ্ভুত লাগছিল
ছিপছিপে মূৰ্তিটা। হেঁয়ালীৰ মতন ঠেকছিল, এভাবে এত ৰাত্ৰে তাৰ
ঘৰেৰ দৰজায় এসে জোয়ান ছুঁড়ি গায়ে পড়ে ঝগড়া কৰছে, তাড়া
খেয়ে ঝোপেৰ তলায় ছুটে গিয়ে চাপা গলায় হাসছে।

কি চাইছে ও, কোন ফৰমাস নিয়ে এসেছে বাবুৱ ?

‘কি হল বল এখন কি কৰতে হবে।’ ঢেমনা উঠোনে নেমে গেল।
ছপা এগিয়ে এল কুস্তি।

‘তোৱ ঘৰে দেশলাই আছে, দুটো কাঠি দে, মাইৰি আমাৰ লক্ষটা
নিভে গেছে, বিছানায় এত ছাৱপোকা।’

এইভাৱে এত ভূমিকা। ঢেমনা হতভম্ব হয়ে গেল। একটু চুপ
থেকে পৰে গজগজ কৰে উঠল। ‘তবে বলছিলি বাবুৱ ফৰমাস
আছে।’

‘তা না হলে তুই দৰজা খুলে বেরোতিস না যে।’ কুস্তিৰ গলায়
অভিমানৰ সূৰ ফুটল। ‘আমায় ছাৱপোকা কামড়াচ্ছে, ঘুমোতে
পাৰছি না, ঘৰে আলো নেই, দেশলাই নেই—শুনলে তোৱ ভালই
লাগত।’

‘হুঁ, তা তো লাগতই, অনেক সুখ পাচ্ছিস এ বাড়িতে এসে।
দেখে আমাৰ চোখ টাটায়, কাজেই মাঝেমাঝে যদি দুঃখ পাস,
ছাৱপোকাৰ কামড়ে ঘুমোতে না পাৰিস, শুনে ভালই লাগে—’ মুখ
বঁকিয়ে ঢেমনা একদলা থুথু ফেলল।

‘ইস, এত শক্ৰতা কৰিস তুই আমাৰ সঙ্গে।’ কুস্তি আৰো ছপা
এগিয়ে এল। অথচ তোৱ দেশ এক জায়গায়, আমাৰ দেশ আৰ এক
জায়গায়। তুই কলকাতাৰ ৰাস্তায় ঘূৰে কুটি বেচতিস, আমি এই

গাঁয়ে বিলের ধারে বাবার ঘরে বসে গাব সেদ্ধ করে জাল রং করতাম, জাল শুকোতাম, মাছের পেট গেলে রোদে শুকিয়ে শুঁটকি করতাম। তুই আমায় চিনতিস না, আমিও তোকে চিনতাম না। বাবুর বাড়িতে তোর চাকরি হল, আমারও চাকরি হল। দুচার দিন বেশ ভালয় ভালয় কাটল, আমার সঙ্গে গল্পটল্প করলি, ভাব করলি, ওমা দু'টো দিন গেল না, তোর হিংসে আরম্ভ হল, জ্বলুনি আরম্ভ হল, আমায় দেখলেই তোর মেজাজ খারাপ, চোখ লাল—যেন হঠাৎ তোর কি ক্ষতি করে বসলাম, ভাবলে সময় সময় মনে এত কষ্ট হয়—’

‘থাক আর ঝাকামো করতে হবে না।’ ঢেমনার মন এবারও গলল না। যেন জিবটা আরও শক্ত হয়ে উঠল। ‘তোকে সাবধান করে দিচ্ছি, আমার সামনে কখনো আসবি না, মাথা গরম করে কী করতে কী করে বসি ঠিক নেই।’

‘ইস্ আবার সেই মেজাজ, ষণ্ডাণ্ডার মতন কথা—’ কুন্তি যেমন ছ’পা এগিয়ে এসেছিল, আবার ছ’পা পিছনে সরে গেল।

তেঁতুল গাছে পেঁচা ডেকে উঠল। এক ঝলক বাতাস উঠে গাছপালার সর সর শব্দ হল। বাবলা ঝোপের পিছনে চাঁদটা আরো খানিকটা ঢলে পড়েছে। বর্ষার মতন চিকন এক ফালি জ্যোৎস্না লম্বা হয়ে কুন্তির পায়ের কাছে এসে ঠেকেছে।

উহুঁ, তখন সে বিশ্বাস করত না, পাখির মতন অমন সরু পাতলা নরম পা নিয়ে ছুঁড়ি বিলের ধারে ছুটোছুটি করে জালে রং দিত। এত বড় এক একটা জাল। একবারেই গোটা বিল ছেঁকে নেওয়া যেত। গাবের কষ মাখিয়ে ভাদ্রের গনগনে রোদে বড় বড় জাল মেলে শুকোতে দিয়েই কি মেয়ের ছুটি ছিল! তারপর শুরু হত হোগলার চাটাইয়ের ওপর ছড়িয়ে দেওয়া পচা শোল, বোয়াল, লেঠার ওপর নাচানাচি করে নাড়িভুড়ি আলগা করা। মাছি ভনভন করত। রোদে গরমে লাল গাল বেয়ে কুলকুল করে বৃষ্টির মতন ঘামের ঢল নামত। উহুঁ তার পরেও জিরোনো চলত না, বাঁশের চটায় গাঁথে

নিয়ে পেট বার করা রাজ্যের মাছ খাড়া করে করে বিলের ধারে পুঁতে দিতে হত। হুঁ, সারাদিন রোদ লাগে এমন করে সার দিয়ে বাঁশের আগায় সব রাখতে হত। তারপর লগা হাতে নিয়ে কাক তাড়ানো, শকুন তাড়ানো, শেয়াল তাড়ানো। পাখির পায়ের সরু ছিপছিপে নরম পায়ে ছুটে ছুটে এত সব করা।

সত্যি, ঢেমনার বিশ্বাস হত না শুনে।

উঠানের ওধারের লেবু ঝোপের ছায়ায় বসে কুন্তি গল্প করত। আর চোখ নামিয়ে নামিয়ে ঢেমনা তার ছিমছাম পায়ের পাতা ছুটো দেখত।

তার ইচ্ছা করত পা ছুটো কোলে নিয়ে আদর করে হাত বুলিয়ে দেয়। কেন না ওই নরম পায়ের উপর দিয়ে অনেক ধকল গেছে। কথাটা ভাবলেও তার কষ্ট লাগত।

আর এখন ?

সুন্দর পা ছুটোর কাছে মাঝরাতের জ্যোৎস্না চিকচিক করছে দেখেও ঢেমনা চোখ সরিয়ে আনল।

উহুঁ, উঠানেই আর দাঁড়াতে পারল না সে। ঘরে ঢুকে খটাস করে বাঁশের দরজা বন্ধ করে দিল। তারপর দেশলাইয়ের ক'টা কাঠি নিয়ে জানালা গলিয়ে বাইরে ছুঁড়ে দিল।

না, ঢেমনা দেখল না। ঠোট টিপে কুন্তি হাসছিল আর মুয়ে মুয়ে কাঠি কুড়োচ্ছিল।

কিন্তু ঢেমনা যেটুকু দেখে এসেছে তাই যথেষ্ট।

তার মগজের ভিতর দাউ দাউ করে আগুন জ্বলছিল। সরু হালকা পাখির পা থেকে ঘাসের গন্ধ, জল কাদার গন্ধ, শামুক গুলি মাছের আসের গন্ধ অনেক দিন আগেই ধুয়ে মুছে গেছে। রোজ সাবান মেখে সে সব খারাপ গন্ধ দূর করতে ছুঁড়িকে কম বেগ পেতে হয় নি। তারপর তেল মেখে মেখে রোদে পোড়া, জলে দাগ ধরা পা একদিন মোমের পুতুলের পা হয়ে উঠল পালিশ চকচকে। ময়লার চিহ্নটুকু

রইল না। তারপর একদিন আলতার পৌঁচ লেগে রাঙা বৌয়ের পায়ের মতন পা ছোটো টুকটুক করতে লাগল।

টেমনা সব দেখছিল। দেখে চুপ করে থাকত।

আজ সেই পায়ে বাহারের চটি উঠেছে।

ছপুরে বাবু মোটরবাইক নিয়ে শহরে গিয়েছিল। আসবার সময় কী সব কিনে এনেছে টেমনা জানে না। শহরে গেলে বাবু এটা ওটা কিনে আনে।

তবে অন্য সব সওদার সঙ্গে এক জোড়া চটিও যে আজ আনা হয়েছে তাতে সন্দেহ ছিল না। আর সেই চটি পরে বজ্জাত ছপুর রাতে উঠোনে নেমেছে, টেমনার দরজায় এসে ঘা দিয়েছে। দেশলাইয়ের কাঠি চাই। তার মানে দোর খুলে বেরিয়ে এসে টেমনা দেখুক, আহ্লাদ করে বাবু আমাকে কী উপহার এনে দিয়েছে।

অন্ধকারে টেমনা ঠোট কামড়াতে লাগল। ভাবতে লাগল। তার খালি খোলা পায়ের পাতায় হাজারটা মশা ছল ফোটাচ্ছিল, খেয়াল ছিল না। একটা বড় ছোরা তার হৃৎপিণ্ডটাকে ফালা ফালা করছিল।

হুঁ, দূরের মানুষ কাছের মানুষ—ছোট বড় মাঝারি, কত রকম মানুষ তাকে দেখতে হয়েছে। অথচ বাড়ির কাছে তাদের বেলেঘাটার বস্তির খোয়া-ওঠা এবড়ো খেবড়ো রাস্তাটা যেখানে শেষ হয়েছে, সেখানে মস্তবড় একটা কুম্ভচূড়া গাছ ফি-বছর চৈত্রের শেষে আকাশে আগুন লাগিয়ে দিয়ে হা-হা করে হাসতে থাকে, ঠিক তার পাশেই দক্ষিণ মুখো লাল রঙের চার তলা বাড়িটা। বাড়ির মানুষগুলিকে কোনদিনই যেন সে দেখতে পেত না। অথচ ওই বাড়ির ফুটফুটে

হেঁলো, ছোটবেলায় যাকে নিমু বলে ডাকা হয়েছে, ফরসা নাহুশ মুহুশ চেহারা, একদিন রাস্তায় নেমে বস্তির ছেলে ঢেমনার সঙ্গে ডাংগুলি খেলেছে, ঘুড়ি উড়িয়েছে, চুপটি করে বাড়ি থেকে বেরিয়ে এসে চাউলপাট্রির সড়ক ধরে ঠিক ক্যানেলের পারে চলে গেছে। ঢেমনা বঁড়শী ফেলে লেঠা তুলত, নিমু চুপ করে পাশে বসে দেখত। পকেট ভর্তি করে বাদাম ভাজা নিয়ে গেছে বড়লোকের ছেলে, ঢেমনা যদি একবার ছিপটা নিমুকে ধরতে দিয়েছে, নিমু খুশী হয়ে এত বাদাম ভাজা ঢেমনার হাতে তুলে দিয়েছে।

হুঁ, সেসব দেখা ছোটবেলার দেখা সেদিনের মেলামেশা অন্তরকম মেলামেশা। যেমন বর্ষার মাঠের জল। চারতলা ছ'তলা খোলার ঘর টিনের ঘর একঘর হয়ে মিশে থাকে। কারো বাপ গামছা বেচে, কারো বাপ মোটর গাড়ি চড়ে বেড়ায়, কে লুন পাস্তা খেল, কে ক্ষীর রসগোল্লা খেল বোঝা যায় না। বোঝা যায় তখন, যখন আর একটু বয়স বাড়ে। কার গায়ে ছেঁড়া গেঞ্জি, কার গায়ে দামী লিনেন, কার পাস্তা খাওয়া চেহারা, কার দুধ মাখন খাওয়া চকচকে শরীর, এক নজর দেখে তারা চিনতে পারে। যেমন বর্ষার জলভরা মাঠ আশ্বিনের শেষে খটখটে চেহারা ধরল। উঁচু নিচু এই গর্তে সেই গর্তে কোনটা খাল, কোনটা দীঘি, কোনটা নদী পরিষ্কার হয়ে গেল, সব কিছুর তখন একেবারে আলাদা চেহারা, তখন আর চারতলার ছেলে টিনের বস্তির ছেলের সঙ্গে মিশে ঘুড়ি ওড়ায় না, ডাংগুলি খেলে না। ছিপ ফেলে মাছ ধরে না। একজন আর একজনকে চিনতেই পারে না।

তাই বলা হচ্ছিল, সায়া রাউজের বস্তা কাঁধে ফেলে ঢেমনা কলকাতার এই রাস্তা সেই রাস্তা এই গলি সেই গলি ধরে ঘুরত। হুস করে তার পাশ দিয়ে এতবড় একটা কালো মোটর চলে গেল, আর সেই গাড়ির ভিতর দামী জামা জুতো পরা ফরসা চেহারার সুন্দর মানুষটি বসে আছে।

হুঁ, নাম নিমাইবাবু, বেলেঘাটা চাউলপাট্রির রাস্তার কৃষ্ণচূড়া ফুল-

গাছওয়ালা জমকালো লাল বাড়ির সেই ছোট্ট নিমু, ঢেমনা চিনল না। নিমাইবাবুও চিনতে পারে না, একটা ফেরিওয়ালা যাচ্ছে, কলকাতা শহরে শত শত ফেরিওয়ালা রাস্তায় ঘোরে, গাড়ির জানলা দিয়ে মুখ বাড়িয়ে তার মুখটা চিনতে হবে এমন কি কথা। তবু তো ওটা ছিল নেবুতলার রাস্তা। বেলেঘাটার রাস্তায়, যেখানে দুজন একসঙ্গে বড় হয়েছে, একত্র ছোটোছুটি করে খেলাধুলা করেছে, কতদিন ধূপকাঠির প্যাকেট বগলে নিয়ে বা সায়া রাউজের বোঁচকা কাঁধে ফেলে ঢেমনা হেঁটে হেঁটে বাড়ি ফিরেছে, বাড়ি থেকে বেরিয়ে শেয়ালদার রাস্তা ধরেছে। নিমু গাড়ি ছুটিয়ে পাশ কেটে বেরিয়ে গেছে। কাউকে কেউ চেনে নি। দেখে নি। তাই হয়। ছোটবেলার চেনার স্মৃতিটা একবার ছিঁড়ে গেলে, দেখাদেখির খেলা ভেঙে গেলে সেই স্মৃতি জোড়া লাগতে চায় না, সেই খেলা আর যেন জমে না।

হুঁ. বিশেষ করে যেখানে খোলার বস্তু ও আকাশছোঁয়া চারতলা বাড়ি, যেখানে মোটর হাঁকিয়ে চলা, আর একজনের হাঁটাপথ।

কিন্তু ঈশ্বরের মনে সেদিন কি ছিল কে জানে।

জোর একপশলা বৃষ্টি হয়ে গেছে সন্ধ্যার দিকে। ফাল্গুন মাস। বৃষ্টি ধরল কিন্তু মেঘ কাটল না। তার ঝিরঝিরে একটা হাওয়া ছিল। ধর্মতলা হয়ে শেয়ালদার দিকে ফিরছিল ঢেমনা। নেবুতলার ভিতর দিয়ে সার্পেনটাইন লেন ধরে হাঁটছে। জল হয়ে পুরনো পীচের রাস্তা কেমন পিছল হয়ে আছে, জায়গায় জায়গায় পা পড়লে ছপছপ শব্দ হচ্ছে। হয়তো আবহাওয়া তেমন সুবিধার ছিল না বলে, রাস্তায়, বিশেষ করে সার্পেনটাইন লেনের একটা গলির ভিতর লোকজন বড় একটা ছিল না। তাছাড়া একটু রাত হয়েছে যেন। ধর্মতলায় দু একজন মহাজনের সঙ্গে কথাবার্তা বলে সেখান থেকে বেরোতে একটু দেরী করেছিল ঢেমনা। আবার সঙ্গে কিছু কাপড়জামাও ছিল। তাড়াতাড়ি শেয়ালদায় পৌঁছে বেলেঘাটার বাস ধরবে বলে সে নেবুতলার ভিতর দিয়ে আসছিল। হুঁ, দেখল একটা কালো রঙের প্রাইভেট গাড়ি

তার পাশ কাটিয়ে সোঁ করে সামনের দিকে এগিয়ে গেল। বেশ জেরে গাড়িটা ছুটে গেল। একটা বাঁক ছিল ওখানটায়। কাজেই একবার এক নজর গাড়িটা দেখা গেল। তারপর আর দেখা গেল না। বাঁক ঘোরার সঙ্গে সঙ্গে পিছনের লাল রঙটা অদৃশ্য হল। এমন কত গাড়ি আসছে কত গাড়ি যাচ্ছে, কে আর এই নিয়ে মাথা ঘামায়। রাস্তা পিছল ছিল, তাছাড়া পায়ে টায়ারের চঞ্চল। ঢেমনা টিপে টিপে পথ এগোচ্ছিল। কিন্তু প্রাইভেট গাড়িটা সামনের বাঁক ঘুরে অদৃশ্য হওয়ার সঙ্গে সঙ্গে আচমকা একটা বিল্ডী কড়কড় আওয়াজ ওদিক থেকে ভেসে এল। যেন হঠাৎ জ্বম হয়ে একটা পশু বিকট শব্দ করে চৈঁচিয়ে উঠে তখনি আবার ধেমে গেল। ঢেমনা অনুমান করল, গাড়িটা ব্রেক কষতে গিয়ে এমন আওয়াজ করেছে। এবং এও অনুমান করল, এই মাত্র কালো রঙের যে গাড়িটা তার পাশে দিয়ে চলে গেছে ওটাই কোনো অ্যাকসিডেন্ট বাধিয়েছে, অথবা অ্যাকসিডেন্ট এড়াতে গিয়ে জোরে ব্রেক কষেছে।

ঢেমনা একটু পা চাଲিয়ে এগিয়ে গেল। বাঁক ঘুরতে সে দেখতে পেল তার অনুমান মিথ্যা হয়নি। কালো রঙের একটা গাড়ি একটা লাইট পোস্টের গায়ের উপর গিয়ে পড়েছে। গাড়িটা কাত হয়ে আছে। লাইট পোস্টের কিছুই হয়নি, কেবল তলার দিকে সিমেন্ট খানিকটা খসে পড়েছে, গাড়ির সামনের চাকা ছোটো তখনো ঘুরছিল। হেডলাইট ছোটোব একটা নিভে গেল আর একটি জ্বলছিল। এবং দেখা গেল, গাড়িটার কাছে গিয়ে সে দাঁড়ানোর সঙ্গে সঙ্গে এদিকের অর্ধাং গাড়ির যে পাশটা মাটি থেকে উঠে আছে, সামনের দরজা খুলে একটি পুরুষ কোনরকমে ঘাড় নুইয়ে শরীরটা কুঁজো করে ভিতর থেকে বেরিয়ে এল।

মানুষটাকে ঢেমনা হঠাৎ ঠিক চিনতে পারে না। কিন্তু গাড়ির ভিতর আর একজন ছিল, একটি মেয়ে। যেন অবিবাহিতা মেয়ে। অল্প বয়স। গাড়ির ওধারের জানালার গায়ে মাথা কাত হয়ে পড়ে

আছে। চোখ বুজে আছে। মেয়েটির জ্ঞান ছিল কি না বোঝা যাচ্ছিল না। যাই হোক, ঢেমনা আর একনজর দেখেই পুরুষটিকে চিনল, কিন্তু তত চট করে বড়লোকের ছেলেটি চিনতে পারল না। কাজেই আগ বাড়িয়ে ঢেমনাকেই নিজের পরিচয় দিতে হয়েছিল।

এবং পরিচয় পাবার পর, সেখানে না, হাসপাতালের দরজায়, ঢেমনাকে দুহাতে জড়িয়ে ধরে নিমাইবাবু আবেগে প্রায় কেঁদে ফেলেছিল।

খুবই স্বাভাবিক। এমন একটা বিপদে ছোটবেলার একটি সাথী ছুটে এসে নানাভাবে সাহায্য করল—আর তা-ও কিরকম জায়গাটি, কেমন অবস্থায়, শহরের একটা ভদ্রপাড়া, এত রাত করে পাড়ার ভিতর দিয়ে মদ খেয়ে গাড়ি চালানো। গাড়ি থেকে বেরিয়ে আসার সঙ্গে সঙ্গে নিমাইয়ের মুখ থেকে চড়া গন্ধ বেরিয়েছিল, এই জ্ঞান আরো বেশি ঘাবড়ে গিয়েছিল ঢেমনা—তা ছাড়া সঙ্গে যে মেয়েটি ছিল, পাড়ার লোকে যদি চেপে ধরত, পরিচয় জিজ্ঞেস করত, তো তখন সহুস্তর দেওয়া নিমাইয়ের পক্ষে অসুবিধা ছিল, কোন আত্মীয়ের পরিচয় সেখানে খাটত না। হুঁ বান্ধবী, কিন্তু এ কোন্ জাতের বান্ধবী, পুরুষ মদ খেয়ে গাড়ি চালাচ্ছে আর পাশে নিশ্চিন্ত মনে বসে আছে মেয়েটি। তবু রক্ষা, কোন মানুষকে চাপা দেয়নি নিমাই বা গাড়িটা কারো রোয়াকে বা দরজায় তুলে দেয়নি। তা হলেও এমন একটা বিশ্রী শব্দ শুনে কিছু লোক বাড়ি থেকে বেরিয়ে রাস্তায় নেমে এসেছিল। হু একজন চটাচটি করছিল, চোখ রাঙিয়েছিল, কেন না মুখের গন্ধটা তো কিছুতেই লুকেতে পারছিল না নিমাই। এভাবে এত রাত্রে একটা পাড়ার ভিতর গাড়ি নিয়ে ঢোকা, যেন কেউ কেউ পুলিশে খবর দেবার কথা বলেছিল—ঢেমনা হাত জোড় করে তাদের শাস্ত করেছে, তাদের কাছে ক্ষমা চেয়েছে এবং বৃষ্টি হয়ে রাস্তাটা ভিজ়ে থাকার দরুন যে গাড়ির চাকা পিছলে গিয়ে এমনধারা হয়েছে, একথাও

সে তাদের বুঝিয়েছিল। আর বার বার বলেছিল, তার পরিচিত মানুষ^{তে} তার বন্ধু, বিশিষ্ট ঘরের ছেলে, এক পাড়ায় তারা থাকে।

তখন পাড়ার লোক কিছুটা শান্ত হয়। হু একজন সহানুভূতিও দেখায়। একজন ছুটে গিয়ে একটা ট্যাক্সি ডেকে আনে। কেন না, নিমাইয়ের গাড়িটা বেশ ভাল জখম হয়েছিল। এদিকে মেয়েটির এই অবস্থা, জ্ঞান ছিল না, যেন মাথায় চোট লেগেছিল, নিমাইয়ের কপালের একটা পাশ কেটে গিয়ে রক্ত পড়ছিল। গাড়িটা পাড়ার মানুষদের জিম্মায় রেখে ঢেমনা তখনি দুজনকে ট্যাক্সিতে তুলে নিয়ে নীলরতন সরকার হাসপাতালে চলে যায়। প্রাথমিক চিকিৎসার পর নিমাইকে তখনি ছেড়ে দেওয়া হয়, মেয়েটিকে ইমার্জেন্সী ওয়ার্ডে রাখা হয়।

হুঁ, তখন সেই রাতে হাসপাতালের সিঁড়ি দিয়ে নামবার মুখে ঢেমনাকে জড়িয়ে ধরে কি করে যে নিমাই কৃতজ্ঞতা জানাবে ঠিক করতে পারছিল না। এবং একশোবার করে ঢেমনার কাছে ক্ষমা চাইছিল। তার ছেলেবেলার বন্ধু, এতকাল পব দেয়া, আর এভাবে তাকে এতবড় একটা বিপদ থেকে বাঁচানো, অকপটে সব কথাই সে ঢেমনাকে বলে ফেলল। হুঁ, খুবই অপরাধ হয়েছে তার। ধর্মতলার একটা বার থেকে মেয়েটিকে নিয়ে শেয়ালদার একটা হোটেলে যাচ্ছিল, সেখানে ঘণ্টা দুয়েকের জন্ত ঘর ভাড়া করে দুজন আনন্দ করত। আগেও হু একবার মেয়েটিকে নিয়ে সে বার-এ গেছে, হোটেলে ঘর ভাড়া করে দু'জন একনঙ্গে কিছুক্ষণ কাটিয়েছে। কিন্তু আজ যে এমন বিপদ ঘটবে যাই হোক, মন্দের ভাগ, ঢেমনার সঙ্গে দেখা হয়ে গেল। এবং নিমাই আশা করছিল, এক পাড়ার মানুষ, ঢেমনা সবই জানল, কিন্তু পাড়ার কাউকে, কি নিমাইদের বাড়ির কারো কাছে এ সব কথা ঢেমনা কোনোদিন প্রকাশ করবে না। চেপে যাবে। 'তাই হবে, এজন্ত তোকে ভাবতে হবে না, এতটাই যখন করলাম তখন এটুকু বিশ্বাস আমাকে করতে পারিস।' ঢেমনা তার

আগে হাত রেখে সাঙ্খ্যনা দিয়েছিল। নিমাই নিশ্চিন্ত হয়েছিল।
নিমাইকে ট্যান্সি করে বাড়ি পাঠিয়ে দিয়ে সেই রাতে ঢেমনা আবার
সার্পেনটাইন লেনে ফিরে যায়। গাড়িটাকে রাত্রে মতন একটা
গ্যারেজে রাখার ব্যবস্থা করে প্রায় রাত ছ'টোর সময় সে বাড়ি ফেরে।

পরদিন নিমাই নিজেই এসে গাড়িটা ফিরিয়ে নিয়ে গেল। এবং
মেয়েটি নাকি পরদিন বিকেলে হাসপাতাল থেকে ছাড়া পেয়েছিল।
আঘাত যে খুব একটা পেয়েছিল তা নয়, মাথায় একটু চোট লেগেছিল,
সেই সময় গাড়িটা হঠাৎ ঝাঁকুনি খেতে অজ্ঞান হয়ে পড়ে। ডাক্তাররা
নিমাইকে তাই বলেছিল। পরদিনই মেয়েটি সম্পূর্ণ সুস্থ হয়ে উঠে
নিজের ঠিকানায় ফিরে যায়।

তারপরেও সেই মেয়েটাকে নিয়ে নিমাই বার-এ হোটেলে যেত
কিনা ঢেমনা আর জিজ্ঞেস করত না, বেশ একটু সঙ্কোচবোধ করত।
সেদিন বেকায়দায় পড়ে সব কথা সে ঢেমনাকে বলে ফেলেছিল ঠিকই,
তা বলে পরে আবার এই নিয়ে নিজে থেকে কিছু জানতে চাওয়াটা
ঢেমনার রুচিতে বাধত। নিমাই এই ব্যাপারে একেবারে চুপ ছিল।
ঢেমনাও চুপ থাকত। তবে ছ'জনের দেখাদেখির মাত্রাটা বেড়ে
গেল। এদিক থেকে অবশ্য নিমাইয়ের উৎসাহটাই বেশি ছিল।
প্রায়ই সে হাঁটতে হাঁটতে ঢেমনাদের বাড়িতে চলে যেত, ঢেমনার
সেই নোংরা ছোট ঘরে ঢুকে তার ময়লা বিছানার ওপর অকাতরে বসে
পড়ে গর জুড়ে দিত, মুড়ি তেলভাজা দিয়ে ছ'জনে এক সঙ্গে চা খেত।
আর নিমাই তখন প্রায়ই বলত, কলকাতা আর ভাল লাগে না, আর
যেন এভাবে দিন কাটছে না, একটা কিছু করতে না পারলে যেন
আর চলছে না।

তাই তো, কি করতে চায় সে। ঢেমনা চুপ করে শুনতো আর
নিমাইয়ের মুখের দিকে তাকিয়ে থাকত। ভাবত, বড় লোকের
ছেলে। বাবার অগাধ পয়সা। কাঠের কারখানা, গেল্লির কারখানা
এবং আরো একটা কিলের যেন ব্যবসা আছে তাদের। বাবা কাকরা

সে সব কারখানা ও ব্যবসা-বাণিজ্য দেখে । নিমাইকে কিছুই করতে দেয় না । তেমন লেখাপড়াও শেখেনি । মার কাছে চাইলেই হাত খরচের টাকা পায় । বাবার কাছে পায় । একমাত্র ছেলে । হঠাৎ সে কিছু একটা করতে চাইছে শুনে ঢেমনা অবাক হত ; আবার হতও না, অর্থাৎ নেহাত গল্প করার জন্তু এসব বলছে সে, ঢেমনা অনুমান করে নিত । কিন্তু না, যখনই দেখা হয়েছে তখনই নিমাই ঠিক একটা কথাই বলেছে, কলকাতা আর ভাল লাগছে না, বেলেঘাটা তো নয়ই—এখানকার আবহাওয়াই তার আর সহ্য হচ্ছে না, বিষের মতন মনে হচ্ছে, সব কিছুতে অকুচি ধরে গেছে । এখান থেকে পালাতে না পারলে সে শক্ত অমুখে পড়বে, নয়তো পাগল হয়ে যাবে ।

তখন ঢেমনা চিন্তা করতে আরম্ভ করল ।

নিমাইয়ের সঙ্গে বসে বেশিক্ষণ গল্প করা তার হয়ে উঠত না । খেটে-খাওয়া মানুষ সে । সায়া-ব্লাউজের ব্যবসাটা ছেড়ে দিয়েছিল । সারাদিন বোঁচকা কাঁধে করে নিয়ে পায়ে হেঁটে এত ঘোরাঘুরি যেন তার সহ্য হচ্ছিল না । প্রায়ই শরীরটা খারাপ হত । ইদানিং বাগমারীর একটা পাঁউরুটির কারখানায় চাকরি নিয়েছিল সে । তাতেও যথেষ্ট ঘোরাঘুরি ছিল । তবে সাইকেল রিক্সার মতন একটা গাড়ি নিয়ে ঘুরতে হত । দোকানে দোকানে এবং দরকার হলে বাবুদের বাড়িতে রুটি দিয়ে আসতে হত । কাজটায় হাল্কা মা তেমন কিছুই ছিল না । সায়া-ব্লাউজের ব্যবসায় ঝুঁকি ছিল । প্রায়ই ধারে জিনিস বেচতে হত । আর সেসব দাম পরে আদায় করতে প্রাণ বেরিয়ে যেত । রুটির কারখানার চাকরিতে সে সব অসুবিধা ছিল না । কোম্পানির লোক এসে দোকানে দোকানে বিল দিয়ে রুটির টাকা তুলে নিয়ে যেত । ঢেমনার কাজ ছিল কেবল রুটি বিলি করা । সপ্তাহের শেষে মাইনে পেত । নিমাইদের বাড়িতেও রুটি দিতে আরম্ভ করল সে । নিমাই বাড়িতে বলে দিয়েছিল

যাতে ঢেমনার কাছ থেকে রুটি নেওয়া হয়। আগের রুটিওয়ালাকে রুটি দিতে বারণ করা হল। এখন রোজ সকালে ওবাড়ি রুটি দিতে গিয়ে নিমাইয়ের সঙ্গে তো দেখা হতই, নিমাইয়ের বাবার সঙ্গেও ঢেমনার দেখা হত, এবং একটা দুটো কথাও হত। ফরসা টুকটুকে চেহারার ছোটখাটো মানুষটি। খুব আন্তরিক কথা বলত। মাথার সব কটা চুল সাদা হয়ে গিয়েছিল। দেখলেই মনে হত অত্যন্ত ঠাণ্ডা মেজাজের মানুষ।

না, নিমাই সম্পর্কে বুড়োর সঙ্গে ঢেমনার তখন পর্যন্ত কোনো কথা হত না। ঢেমনাও তার কোন কিছু তুলত না, তাঁদের একমাত্র ছেলে নিমাই, শুনেছিল তার চারটি বোন আছে। তিন জনের বিয়ে হয়ে গেছে। একটি বোন এখনও ইঙ্কুলে পড়ে। ঢেমনার ছোট। রীনা। রীনাকে ঢেমনা চিনত। কৃষ্ণচূড়া গাছওয়াল লাল রঙের চারতলা বাড়িটার সামনে বিকেল পাঁচটা বাজতে কালো রঙের একটা টাউস গাড়ি এসে দাঁড়ায়। পরীর মতন ফুটফুটে ফ্রক পরা মেয়েটি বইখাতা বগলে নিয়ে গাড়িটার থেকে লাফিয়ে নেমে বাড়ির ভিতর ছুটে যাচ্ছে, কতদিন এই দৃশ্য ঢেমনা দেখেছে।

এত বড় বাড়ি, ফুলের বাগান, পিছনে প্রকাণ্ড ফলের বাগান, দু-দু'টো গাড়ি, ঠাকুর চাকর দারোয়ান। এদিকে বুড়ো বাবা মা এখনো বেঁচে, কত বড় দু'টো কারখান নিজেদের, আদরের ছোট একটি বোন, যে-সব বোনের বিয়ে হয়ে গিয়েছিল তাদের মধ্যেও একটি না একটি, প্রতি সপ্তাহে ছোট ভাইটিকে দেখতে আসছে— তাদের কারো কারো ছেলেমেয়ে হয়েছে, নিমাইকে দেখলেই ভাগ্নে ভাগ্নীরা মামা মামা করে আনন্দে দিশেহারা হচ্ছে, হুঁ, এত সুখ এত আনন্দ, এত সচ্ছন্দতা, এমন সুন্দর সাজানো সংসার, অথচ ভিতবে ভিতরে কা একটা যন্ত্রণা নিয়ে নিমাই ছটফট করছিল। কিছুই তার ভাল লাগছিল না।

ওবাড়ি রুটি দিতে আরম্ভ করবার পর থেকে জিনিসটা আরো

বেশি খারাপ লাগছিল ঢেমনার। সে ঠিক বুঝতে পারে না, কেন নিমাই এমন পালাই পালাই করছিল। কলকাতা তার ভাল লাগছিল না। বেশ তো, শহরে না বেরুলেই পারে সে, বেলেঘাটা ভাল লাগছে না, না-ই বা লাগল, কিন্তু এমন চমৎকার যার বাড়ি, বাড়ির সুখ শান্তি, আদর মমতা কমে গিয়েছিল বলে ঢেমনা একবারও কি ভাবতে পারত। কিন্তু বাড়িও নিমাইয়ের ভাল লাগছিল না। সারাক্ষণ একটা অস্বস্তি, একটা উদাস উদাস ভাব নিয়ে ভুগছে।

এটা অবশ্য ঢেমনার নিজের ভাবনা, নিমাইকে সরাসরি এই নিয়ে প্রশ্ন করে নি, ঢেমনার যেন মনে হত, সেদিন রাত্রে সার্পেনটাইন লেনে এমন একটা বিক্রী ব্যাপার ঘটিয়ে নিমাই খুব দমে গিয়েছিল।

বাইরের লোক যেমন তেমন, তার ছেলেবেলার সাথী, এক জায়গায়, এক পাড়ায় থেকে যে বড় হয়েছে ঠিক তার কাছে সে এভাবে ধরা পড়ে গেল, তার চরিত্রের এমন একটা কালো দিক ঢেমনা জেনে গেল। যেন এই লজ্জা, এই দুঃখ কিছুতেই সে ভুলতে পারছিল না। অথচ তার সমবয়সী ঢেমনা, কত দুঃখ কষ্টে মানুষ, আজও কষ্টের শেষ হয়নি, মাথার ঘাম পায়ে ফেলে বুড়ো বিধবা মাকে, ছোট ছোটো ভাই-বোনকে খাওয়াচ্ছে। আর এত সুখে থেকে, এত নিশ্চিত্ত আরামের জীবন ভোগ করে কিনা নিমাই সংসারের অন্ধকার পথটাই বেছে নিল, লোকে শুনলে থুথু ফেলবে, নাক সিঁটকোবে, এমন জিনিষ নিয়ে সে মেতে রইল—।

কাজেই নিজের ভিতর একটা ঘেন্না আসতে পারে, আরামের সুখের জীবন আর সে চাইছে না, অন্য জীবন চাইছে। সংসারের প্রায় সব মানুষই কাজ করছে, খেটে খাচ্ছে, বেঁচে থাকার জন্তু সবাই কষ্ট করছে, যেন নিমাইও এখন থেকে তাই চাইছিল একটা কিছু করবে সে, একটু কষ্ট ভোগ করবে।

আর ঢেমনা যখন পুরোপুরি তাকে জেনেই গেছে, তখন এই

মানুষটির কাছেই ভিতরের যন্ত্রণার কথা, ছটফটানির কথা বলে সে হয়তো শান্তি খুঁজছিল।

অবশ্য এর সবটাই ঢেমনার অনুমান। এখন আসলে নিমাইয়ের মনে অনুতাপ এসেছিল কিনা, না কি, যেহেতু ঢেমনা তার চরিত্রের অন্ধকার দিকটা দেখে ফেলেছিল, এইজন্য বন্ধুকে খুশী রাখতে এবং তার সম্পর্কে ঢেমনা আর যাতে কোনরকম খারাপ ধারণা না রাখে তাই তার কাছে রোজ এসব কথা বলত, ঢেমনা ঠিক বুঝতে পারত না। অর্থাৎ উল্টো দিকটাও সে সন্দেহ করেছিল। আবার ঢেমনা এ-ও চিন্তা করত, যদি তাকে খুশী রাখতে, তার মন ভোলাতে নিমাই এসব বলবে, তো একদিনের বলাই তো যথেষ্ট, রোজ রোজ কেন এসব কথা বলতে আসবে। নিশ্চয় এই জীবনটার ওপর, সেই সঙ্গে বাবা-মা বাড়ি-ঘর, এই বেলেঘাটা, এই কলকাতা শহরটার ওপর তার বিতৃষ্ণা জন্মে গেছে। চাইলেই বাবা-মার কাছে টাকা পাওয়া যায়, আর সে টাকা খরচ করার রাস্তার অভাব নেই কলকাতা শহরে, পকেট থেকে টাকা বার করলেই মেয়েছেলে এসে জোটে, পা পাড়ালেই মদের দোকান, ছ'ঘণ্টা ফুটি করার মতন কামরা ভাড়া পাওয়া যায়, এমন শ'য়ে শ'য়ে হোটেল এই শহরের মাঠে-ঘাটে ছড়িয়ে আছে। কাজেই এখানে আর না।

নিমাই তার যন্ত্রণার কথা বলত, ঢেমনা শুনত। শুনে চুপ করে থাকত। এ ছাড়া আর কী করতে পারত সে। এমন টাকাওয়ালার বাপের ছেলে, সে কাজ করতে চাইছে, কষ্ট করতে চাইছে—তাকে কি পরামর্শ দিতে পারত ঢেমনা। ঢেমনার মতন রোদে জলে ঘুরে কুটির গাড়ি চালাত নিমাই? নাকি ধূপকাঠির প্যাকেট নিয়ে রাস্তায় রাস্তায় ঘুরত।

তা না হয় ঘুরল। কিন্তু এই বেলেঘাটা, এই শহরটাই যে তার কাছে বিশ্বের মতন ঠেকছে। এখানে কাজ নিয়েও তো আটকে থাকা তার পক্ষে সম্ভব হত না।

বলতে কি, নিমাই যেমন মনের অশান্তি নিয়ে ভুগছিল তেমনি আবার নিমাইয়ের কথা চিন্তা করে ঢেমনাও ভিতরে ভিতরে কম অশান্তি পাচ্ছিল না।

এর মধ্যে হঠাৎ একদিন নিমাইয়ের মুখে হাসি দেখা দিল। যেন তার চোখের রং আবার ফিরে এসেছে, চেহারাটা চকচক করছে। কি ব্যাপার? ঢেমনার ঘরে ঢুকে তার ময়লা বিছানার ওপর সিঁকের জামা কাপড় নিয়ে নিজেই বসে পড়ল আর ঠোঁট টিপে হাসতে আরম্ভ করল।

ঢেমনা অবাক। ক’দিনের মধ্যে নিমাইকে এত হাসিখুশী দেখেনি সে। যেন এতদিন পর সে একটা রাত্তা খুঁজে পেয়েছে, আলোর সন্ধান পেয়েছে, আর তাকে অন্ধকারে মুখ গোমড়া করে বসে থেকে লম্বা লম্বা নিশ্বাস ফেলতে হবে না।

‘কি হল’, ঢেমনা একটু ঠাট্টার শুরে বলল, ‘আজ যেন অমাবস্য়ার আকাশে চাঁদ উঠছে?’

‘তোকে এখনি আমাদের বাড়ি যেতে হবে—বাবা ডাকছে।’

‘বুড়ো কর্তা!’ ঢেমনা ঢোক গিলল। ‘হঠাৎ আমাকে?’

‘হুঁ’, বড় বড় চোখ দুটো ঢেমনার মুখের ওপর একটু সময় ধরে রেখে নিমাই কী যেন ভাবল, তারপর আবার হাসল, শব্দ করে হাসল। ‘আর এই বেলেঘাটার নরকে থেকে যন্ত্রণা ভোগ করতে হবে না।’

‘কোথায় যাচ্ছিস, বাইরে কোথাও চাকরি-টাকরি নিয়েছিস নাকি?’

‘ব-কলম—আমায় চাকরি দেবে কে!’ ঢেমনার পিঠে আস্তে একটা চাপড় বসিয়ে নিমাই ছোট করে একটা নিশ্বাস ফেলল। ‘হুঁ, তবে কারো বাড়িতে চাকরি করার কথা যদি বলিস, তা পারব, বাসন-মাজা জল-তোলা বা হোটেল রেস্টোরাঁয় বয়গিরি।’

‘ফাজলামো রাখ। বুড়ো কর্তা আমায় কেন ডেকেছেন শুনি?’

‘আমার সঙ্গে তোকে যেতে হবে।’

‘কোথায় ?’

‘আমাদের দেশের বাড়িতে ।’

‘বেড়াতে যাচ্ছিস নাকি সেখানে. ক’দিন থাকবি ?’ ঢেমনা খুশী হল ।

নিমাই মাথা নাড়ল ।

‘ক’দিন না, পাকাপাকিভাবে সেখানে থেকে যাব—তাই ঠিক হয়েছে, বাবা রাজি হয়েছে ।’

একটু চিন্তা করে ঢেমনা বলল, ‘তা আমাকে সঙ্গে নিয়ে যেতে চাইছিস কেন, রুটির কারখানায় নতুন চাকরি নিয়েছি, খুব বেশি দিন তো সেখানে গিয়ে থাকতে পারব না ।’

‘ওফ !’ নিমাই ভুরু কঁচকালো । ‘রুটির কারখানার চাকরিটা তোর কাছে খুব বড় হয়ে গেল—তুই বাবার সঙ্গে কথা বল, বাবা তোকে যা বলার বলবে ।’

ঢেমনা আবার একটু ভাবল । তারপর বলল, ‘তোদের দেশের বাড়ি যেন কোথায় ?’ রুটি দিতে গিয়ে বুড়োকর্তার মুখে একদিন কথাটা সে শুনেছিল । এখানে তাক্সা মূর্গির ডিম যোগাড় করার অনুবিধা হচ্ছে । কর্তাবাবুকে ডাক্তার রোজ একটা করে ডিম খেতে বলে দিয়েছে । তাই বুড়া সেদিন দুঃখ করছিল, তাঁর দেশের বাড়িতে কত হাঁস মুগি, দেখবার শুনবার লোক নেই, কত ডিম নষ্ট হচ্ছে ।

‘হুঁ, বেশি দূরে না ।’ নিমাই বলল, ‘কলকাতা থেকে ট্রেনে এক ঘণ্টার রাস্তা । বারাসতের নাম শুনেছিস ?’

ঢেমনা ঘাড় কাৎ করেছিল ।

নিমাই বলল, ‘বারাসতের ট্রুস্টেশন পরেই আমাদের দেশের বাড়ি ।’

অ, তাহলে এমন হতে পারে, ঢেমনা তখনই আবার চিন্তা করল, নিমাই এই প্রথম সেখানে যাচ্ছে, রাস্তাঘাটের গোলমাল হতে পারে, তাই বুড়া কর্তা ঢেমনাকেও সঙ্গে যেতে বলছে । নিমাইকে সেখানে পৌঁছে দিয়ে ঢেমনা ফিরে আসবে ।

‘তুই আর কোনোদিন সেখানে গিয়েছিস?’ ঢেমনা প্রশ্ন করল।

‘গিয়েছি বৈ কি।’ নিমাই চোখ বড় করল। ‘চমৎকার জায়গা, তবে খুব ছোটবেলায় গিয়েছিলাম, বাবার সঙ্গে একবার, কাকার সঙ্গে একবার—বড় হয়ে আর যাওয়া হল কোথায়!’ একটু থেমে থেকে আবার সে বলল, ‘এসব জায়গার তুলনায় সেখানটা স্বর্গ। কত গাছ, কত বড় বড় মাঠ, অফুরন্ত রোদ, সারাক্ষণ হু হু হাওয়া। শরীর মন আপনা থেকে ঝরঝরে হয়ে যায়।’

‘তা তো হবেই, পাড়ারগার সঙ্গে শহরের, বিশেষ করে এই বেলেঘাটা কলকাতার তুলনা হয় নাকি, নোংরার ডিপো, তেমনি ঘিঞ্জি—একটা গাছের পাতা ভাল করে চোখে পড়ে না।’

ঢেমনা বড় করে নিশ্বাস ফেলেছিল।

‘তাই আমি ঠিক করেছি দেশে গিয়ে থাকব, আমাদের জমিজমা সেখানে কম না। চাষবাসও হয়, সে সব কাজের জন্ত লোক আছে, তবে একজন গিয়ে সেখানে থাকা দরকার, নিজেরা দেখাশোনা না করলে কোন কাজই তেমন ভালভাবে হয় না, তাছাড়া জিনিসপত্র চুরি যায়, নষ্ট হয়। আমি সেখানে গিয়ে থাকব শুনে বাবা খুব খুশী, তখনি রাজি হয়ে গেল।’

‘তা তো হবেনই।’ ঢেমনা মাথা নাড়ল। ‘তাছাড়া ঘরদোরও সেখানে খালি পড়ে আছে নিশ্চয়ই? মানুষ না থাকলে বাড়িও নষ্ট হয়ে যায়।’

‘তা হচ্ছে বৈ কি। কত বড় শোবার ঘর, রান্নাঘর, ভাঁড়ার ঘর, স্নানের ঘর সবই করা হয়েছিল, আমরা ভাইবোনেরা যখন ছোট ছিলাম তখন আমাদের সঙ্গে নিয়ে বাবা মা সেখানে মাঝে মাঝে থাকত, পনেরো দিন একমাস কাটিয়ে আসতাম আমরা। তারপর আর যাওয়া হয়ে উঠত না। এখানে বাবার কাজ বেড়ে গেল, ছোটো কারখানা দেখাশোনা করার পর তাঁর আর দেশে যাতায়াতের

সময় হত না। কাকারা অবশ্য এখনো মাঝে মাঝে যান। তাঁরা তাঁদের হিসাবে দেখাশোনা করেন।’

‘তা মন্দ কি, তুই এখন বড় হয়েছিস, তুই গিয়ে তোদের জমিজমা, বাড়িঘর ঘাখ, খুব ভাল কথা।’

‘তা ছাড়া একটা বড় বিল আছে ওখানে। অনেকদিন থেকে বাবার ওটা কেনার ইচ্ছা, কিন্তু বাবা সময় পায় না, তা বিল কিনে ফেলে রাখলে তো কাজ হয় না, বাবা বলল, আমি যদি ওখানে যাই তো ওটা এখনি কিনে নেওয়া হবে। মাছের চাষ করব আমি, যাকে বলে ফিশারী—খুব চমৎকার হয়, তাই না?’ নিমাই চোখ নামাল।

ঢেমনা মাথা ঝাঁকাল, ‘করতে পারলে খুবই ভাল, এ দিনে মাছের ব্যবসার মতন এমন লাভের ব্যবসা আর দুটো হয় না।’

‘করব, একটা কিছু করতে চাইছি আমি—তোকে বলেছি, এখানে আর এক দণ্ড আমার থাকতে ইচ্ছে করছে না। আমার মনে হয় এই বেলেঘাটার বাড়িতে থাকলে আমি মরে যাব।’

ঢেমনা আর কিছু বলছিল না। নিমাই থেমে থাকল না। ‘কিন্তু একটি মানুষ সঙ্গে চাই—বন্ধু, কর্মচারী—যা-ই বলিস, তা না হলে অত নির্জনতার মধ্যে হাঁপিয়ে ওঠব, তা বলে কি আর সেখানে মানুষ নেই, আছে সব চাষী, জেলে, তাদের সঙ্গে কতক্ষণ কথা বলা যায়, প্রাণের কথা বলার মতন একজন সঙ্গীর দরকার।’

এবার ঢেমনা হেসে ফেলেছিল।

‘তেমন একটি সঙ্গী বাছতে গিয়ে কি তুই শেষটায় আমাকে বেছে নিলি?’

‘নিশ্চয়। তোর মতন এত বড় বিশ্বাসী বন্ধু আমার আর কে আছে বল, আমরা একসঙ্গে এক জায়গায় বড় হয়েছি; ডাংগুলি খেলেছি, দুজনে এই বেলেঘাটার খালের জলে মাছ ধরেছি, ঘুড়ি উড়িয়েছি—তোর কথাই আমি বলালম, বাবা এক কথায় রাজি হয়ে গেল।’

টেমনা আবার চুপ করে রইল। হাতের নখ খুঁটছিল সে তখন।
যেন কথাটা চিন্তা করছিল।

নিমাই বলল, ‘তোমার কোনো রকম অসুবিধা হবে না সেখানে,
এইজন্য আমি দায়ী রইলাম। এর মধ্যে চিন্তা করার কিছু নেই।
কুটির কারখানায় তুমি চাকরি করছিস, না হয় আমার কাছে থেক
গেলি, হুঁ আমার কর্মচারী—আমার অ্যাসিস্ট্যান্ট হিসাবে সেখানে
আমার সঙ্গে থাকবি—তা বলে তোকে যে একটা সাধারণ কর্মচারীর
মতন দেখব তা কখনো মনে করিস না—অস্তুতঃ এই ভুল ধারণাটা
আমার সম্পর্কে করবি না। এখানে যেমন তুমি আমার বন্ধু, সেখানেও
বন্ধু হয়েই থাকবি। আর হুঁ, টাকাকড়ি—সেটা বাবা তোকে বলবে,
আমার তো মনে হয় কুটির কারখানায় তুমি এখন যা পাচ্ছিস তার
চেয়ে বেশি ছাড়া কম দেওয়া হবে না তোকে—আর খাওয়া দাওয়া
তো আমার সঙ্গেই হবে—’

‘তুমি থাম তো :’ যেন টেমনা ধমক দিয়ে উঠল। ‘টাকাকড়ির
কথা আমি বলেছি নাকি—’

‘আহা, তুমি বলবি কেন, সেটা আমি দেখব,—টাকাকড়িটাই তো
এখানে আসল, এখানকার চাকরি ছেড়ে আমার সঙ্গে যাচ্ছিস—
এখানে তোমার মা ভাই বোনেরা রইল, তাদের কথা চিন্তা করতে হবে
না? তারা এখানে খাবে কি?’

টেমনা আর কথা বলছিল না।

নিমাই বলল, ‘তোমার কথা পেলেই আমি এদিককার কেনাকাটা
সেরে ফেলি। দুটো মানুষ এক জায়গায় গিয়ে বাস করছি,
বিছানাপত্র, বাসনকোসন সব কিছুই লাগবে। আর আমি কি
ঠিক করেছি জানিস? একটা মোটর-বাইক কিনে ফেলব। এটা
ওটা টুকিটাকি অনেক কিছু দরকার হবে সেখানে। অজ পাড়ারগাঁ,
হুণ্ডায় একদিন হাট, কিন্তু তার জন্য তো বসে থাকলে চলবে না—
তখন মোটর-বাইক চালিয়ে সাঁ করে বারাসতে ঘুরে আসা যাবে।

আধঘণ্টা কুড়ি মিনিটও লাগবে না। ছুট করে মনে কর সিগারেট
ফুরিয়ে গেল, কাপড় কাচার সাবান নেই—হাটের দিনের জুতা হাঁ করে
বসে না থাকলেও আমাদের চলবে।’

এবার ঢেমনা শব্দ করে হাসল।

‘হক কেটে এখন থেকেই সব ঠিক করে ফেলেছিস। তা একটা
মোটর-সাইকেল কিনতে বেশ কিছু টাকা বেরিয়ে যাবে।’

‘যাবে, তা আর করার কী—যেটার দরকার সেটা কিনতেই হবে।
এই জুতা বাবা টাকা দিতে পেছপা হবে না।’ অবার একটু হাসল
নিমাই। ‘চল্লিশ হাজার টাকা দিয়ে আমরা গাঁয়ের ওই বিলটা যখন
কিনে নিচ্ছি তো সেখানে তিন হাজার সাড়ে তিন হাজার টাকা খরচ
করে আমরা একটা মোটর-বাইক কিনে দিতে বাবা নিশ্চয়ই পরোয়া
করবে না, বুঝতে পারছিস, আমি ওটা দেখাশোনা করব, ফিশারী করব
তুনে বাবা এত খুশী হয়েছে —’

তাই তো। ঢেমনা ঢোক গিলল। কত টাকার মালিক নিমাইয়ের
বাপ। একটা মোটর-বাইকের টাকা কিছুই না তাদের কাছে।

‘যাক গে তুই তো এখন কাজে বোরোচ্ছিস।’ হাতের ঘড়ি
দেখে নিমাই উঠে দাঁড়াল। ‘আমি চলি, বিকেলে বাবার সঙ্গে দেখা
করবি।’

বিকেলে বুড়ো কত’ার সঙ্গে দেখা করেছিল ঢেমনা। ছোটখাটো
সুন্দর মানুষটি অমায়িক মিষ্টি হেসে অনেক কিছু বলেছিল, অনেক
কিছু বুঝিয়েছিল ঢেমনাকে। কিন্তু শেষ পর্যন্ত বুড়ো আর হাসছিল
না, গম্ভীর হয়ে গিয়েছিল, গলার স্বরও কাঁপছিল, তারপর হঠাৎ মুখটা
কেমন কাঁদো কাঁদো হয়ে গেল, গলার স্বরটা আরো বেশি কেঁপে
উঠল। তখন, হুঁ, ঠিক তখনই ঢেমনার হাতছটো জড়িয়ে ধরল এতবড়
মানুষটা। ‘তুমি তার সঙ্গে থাকবে, তাই সাহস পাচ্ছি খোকাকে
পাঠাতে। তার সাংসারিক জ্ঞান বলতে গেলে কিছুই নেই—কদিন
ধরে বাড়িতে মনমরা হয়ে থাকতে দেখতাম, সেদিন হঠাৎ বলল, দেশে

গিয়ে থাকবে, আমি না করলাম না, একটা কিছু করতে চাইছে, বিলটা এমনিও আমি কিনতাম, যদি ও মাছের চাষ করে, অবশ্য কতটা করতে পারবে জানি না, তা হলেও একটা কিছু কাজ নিয়ে থাকা ভাল। কিন্তু একলা পাঠাতে কিছুতেই আমার মন সায় দিচ্ছিল না, তারপর যখন তোমার কথা বলল, আমি মনে জোর পেলাম—কাজেই বুঝতে পারছি বাবা, একমাত্র তোমার ওপর ভরসা করে নিমুকে সেখানে পাঠাচ্ছি, তোমার ওপর আমার বিশ্বাস আছে, একপাড়ার মানুষ, তুজন একজায়গায় বড় হয়েছে, তোমার ছেলেবেলার সাথী সে, তার ভালমন্দ তুমি যতটা দেখবে, এমন আর কেউ দেখবে না। ভাবব, আমার আর এক ছেলে নিমুর সঙ্গে দেশে আছে, হুঁ, নিমুর একটি ভাই—কাজেই হুঁভাই যেখানে একত্র আছে, আমার আর দুশ্চিন্তা করার কিছুই রইল না।’

‘আমি যদি সঙ্গে থাকি, নিমুর জন্তু আপনাকে ভাবতে হবে না।’
 তেমনাও বেশ বড় গলায় সেদিন বুড়োকে আশ্বাস দিতে পেরেছিল।

‘হুঁ, তুমি সঙ্গে থাকবে, তুমি নিমুর সঙ্গে যাবে। এটা আমার অনুরোধ বাবা। এ বিষয়ে কিন্তু আর দ্বিমত করো না। খোকা যখন একটা কিছু করতে চাইছে, কল্লক, তোমার বেলেঘাটার বাসার জন্তু চিন্তা করতে হবে না। এখানকার খরচপত্র চালাবার ভার আমার ওপর ছেড়ে দিয়ে তুমি নিশ্চিন্ত থাকতে পার—আর সেখানেও হাত খরচের জন্তু তোমার যখনই টাকার দরকার হবে নিমুর কাছ থেকে চেয়ে নেবে।’ একটু থেমে থেকে বুড়া বলেছিল, ‘রান্নার জন্তু একটি লোকের দরকার, এখান থেকে লোক নিয়ে গেলে অনেক টাকা মাইনে চাইবে, বরং ওখানেই তোমরা কাউকে ঠিক করে নিও, বয়স্থা বিধবা অথচ গরিব এমন একটি মেয়েহলে যোগাড় করা গাঁয়ে কিছু শক্ত হবে না।’

‘বুড়োর এই প্রস্তাবটা তেমনা হাত নেড়ে উড়িয়ে দিয়েছিল। ‘কিছু দরকার হবে না রান্নার লোকের, খামকা পয়সা নষ্ট, মোটে তো আমরা

হুজুন মানুষ—হুটো ফুটিয়ে নিতে আমিই পারব, নিজের হাতে রেঁধে খেয়ে আমার অভ্যাস আছে।’

‘তা তো থাকবেই।’ বুড়ো মাথা নেড়েছিল। ‘যাকে বলে পোড় খাওয়া মানুষ তুমি, হুঃখ কষ্টের মধ্যে বড় হয়েছ—এ তো আর নিম্ন নয় যে আজ পর্যন্ত গায়ে আঁচড়টি লাগল না।’ বলতে বলতে বুড়োর চোখের কোণ চিকচিক করে উঠেছিল।

হঁ, আজও ঢেমনা রান্না করছে। রান্না করছে, কাঠ কাটছে, জল তুলছে, বাসন মাজছে। নিম্নর যাতে কোনোরকম অসুবিধে না হয়। তার বাবু—তার মনিব।

রান্না খারাপ হলে বাবু চোখ লাল করছে, মেজাজ খারাপ করছে, ঘরের কাজে ত্রুটি দেখলে চোঁচামেচি করছে। মনিব তো, করবেই। চিরকাল করে।

এসব ঢেমনা গায়ে মাখছে না।

বা যদি কখনো গায়ে লাগে, দাঁতে দাঁত চেপে চূপ করে থাকবে।

কেমনা বিশ্বাসের সলতেটা এখনো সে নিভতে দিচ্ছে না। নিভে যাচ্ছে দেখলেই বুড়োর চোখ হুটো তার মনে পড়ে। কৃষ্ণচূড়া ফুল-গাছওয়াল। মস্ত বাড়ির দোতলার বারান্দায় আরাম কেদারায় শুয়ে সুখী মানুষটা। বেলেঘাটার বোলাটে আকাশ দেখছে। তবে কিনা সেটা বেলেঘাটার আকাশ।

কিন্তু এখানে আকাশ একেবারে নীল, এই আকাশ নিয়ে তিনি

চিন্তা করুন। রোদটা কত ভাঙ্গা, বাতাস পরিষ্কার। তার ওপর
ছেলের জিন্সাদার হয়ে আছে একটি পোড় খাওয়া শক্ত মানুষ।

তাই কোনোরকম ভয় ভাবনা না করে বুড়ো মনিঅর্ডার করে,
কখনো লোক মারফৎ টাকা পাঠাচ্ছে।

বিল কেনা হয়ে গেছে। দলিল রেজিস্ট্রারীর কাজ শেষ।

হঁ, মাছের চাষ আরম্ভ হয়েছে। দু দফায় দু মন বাউস কাতলার
পোনা ছাড়া হয়েছে।

মোটর বাইক এসে গেছে। নিম্ন খুব ব্যস্ত। ছুটোছুটির শেষ
নেই। চিঠি পেয়ে বুড়ো নিশ্চিন্ত। সব কাজ সুন্দরভাবে এগোচ্ছে।

কেনই বা এগোবে না। ঢেমনা সঙ্গে আছে যে।

কিন্তু বুড়ো কি জানে, পোড় খাওয়া শক্ত ঢেমনা এই ছমাসে আরও
পুড়েছে, পুড়ে আঙরা হয়ে গেছে?

কিন্তু তার এ আবার কথা ঢেমনা জানায় না, জানতে দেয়নি
বুড়োকে।

বিশ্বাসের সমতেটা বুড়ো তার হাতে তুলে দিয়েছিল। সেটা
ফুঁ দিয়ে নিভিয়ে দিতে তার কষ্ট হচ্ছে।

ঢেমনা দেখছে, অপেক্ষা করছে। আবার যদি ঢেমনাকে কাজে
লাগে।

ছেলেবেলার সাথীকে নিমাইবাবু একদিন ভুলে গিয়েছিল, সার্পেন-
টাইন লেনের বাদলার রাতে আবার তাকে মনে পড়েছিল, ঢেমনাকে
কাজে লেগেছিল।

তবে কিনা সেদিনের ভুলে যাওয়াটা স্বাভাবিক নিয়মে ঘটেছিল।
কচি পাতা বড় হলে লাল রং মুছে যায়। ক্যানালের ধারে ছিপ
কিনে মাছ ধরতে বসে দুটি শিশুর গলাগলি করে চিনাবাদাম ভাঙ্গা
খাওয়া, বড় হয়ে কে কবে মনে রাখে। ঢেমনাও কি মনে রেখেছিল?

কিন্তু আজ? আজ ইচ্ছা করে নিমাইবাবু এই দরকারী মানুষটাকে
ভুলে গেছে।

হুঁ, তার দরকার আছে, তবে সেটা রান্নার জন্ত, জল তোলার জন্ত, কাঠ কাটার জন্ত, উঠোন ঝাঁট দেবার জন্ত। তা না হলে বাড়ির চাকরকে কোন মনিব সারাক্ষণ মনে নিয়ে বসে থাকে।

এমনটা হবে ঢেমনা বুঝেছিল। যেদিন একগাল হেসে লখিন্দর তার ঝিনুকডাঙার বিল বড়বাবুকে বেচে দিয়ে কোঁচড় ভর্তি করে কাগজের নোটগুলি তুলে নিয়ে গেল। কোঁচড় ভরে টাকা নিয়ে গেল, কিন্তু গালের হাসিটা বাবুর পায়ের কাছে রেখে গেল। হাসি দিয়ে বাবুর মন গলিয়ে গেল সে, তার কারণ ছিল, এখন থেকে বিলের সহ বাবুর নামে হয়ে গেল কিন্তু বিলের খবরদারী লখিন্দর নিজের হাতে রাখবে, রাখতে চায়, এটা তার অনুরোধ।

জেলের ছেলে। জলের গন্ধ, মাছের গন্ধ ছাড়া যে সে বাঁচতে পারবে না। মরে যাবে।

হুঁ, বিলের খবরদারী। জলে ভিজ়ে রোদে পুড়ে বাবুর পক্ষে সম্ভব না বিল দেখাশোনা করা, তাছাড়া কখন কেমন মাছের চারা ফেলতে হয়, ডিম ছাড়তে হয় বাবুর তা জানা নেই। পয়সা খরচ করে বাইরের জন লাগিয়ে কিছু লাভ নেই, লখিন্দরের লোকজন আছে, তারা রোজ জাল ফেলে চারা মাছ খেলিয়ে খেলিয়ে বড় করে তুলবে। যত বেশি জাল পড়বে জলে, বিলের পোনা তত তাড়াতাড়ি বাড়বে। তার মানে বাবুর পয়সা সকাল সকাল উঠে আসবে। তার ওপর চোর ছেঁচড়ের আনাগোনা রাতদিন লেগেই আছে। কখন কোন ফাঁকে মাছ তুলে নিয়ে যাবে, বাবু টেরও পাবে না। লখিন্দর সব বোঝাল বাবুকে আর হাসল। যদি কেবল লখিন্দর একলা এসে বাবুকে বোঝাত আর গালভরা হাসি উপহার দিত তো বাবু বুঝি দোমনা করত, এমন এককথায় বিলের দখলদারী জেলের হাতে ছেড়ে দিত না।

আর একজন এসেছিল। পাকা চুল কোঁচকানো চামড়া নিয়ে লখিন্দর কথা বলছিল আর তার পিছনে চুপ করে দাঁড়িয়ে মাথা ভরা

মেঘের মতন কালো চুল ও ঝকঝকে নতুন শরীরটা নিয়ে মানুষটা হাসছিল না ঠিক, পাতলা ঠোঁট দুটো ছড়িয়ে সাদা চিকন দাঁতের ঝিলিক তুলে থেকে থেকে চিকুর হানছিল।

তখনই বিপদ বুঝতে পেরেছিল ঢেমনা। চিতাবাঘিনীর চোখের মতন চকচক করছিল মেয়ের চোখ।

তাই তো, চিরকালের মতন বাবা ঠাকুরদার সম্পত্তি হাত ছাড়া হয়ে যাচ্ছে। শহর থেকে এসে বাবুজী'শ বিহার এতবড় জমা, বলতে গেলে একটা জমিদারী, ক'টা কাগজের নোট ছড়িয়ে দিয়ে কিনে নিচ্ছে, এর উত্তেজনা, এর চমক উনিশ বছরের নতুন ছুঁপিও দোলা লাগিয়েছিল, তার বুকের ওঠা-পড়া দেখে ঢেমনা বুঝে গিয়েছিল।

বাবা চুপ করতে মেয়ে বুঝিয়েছিল, ‘ঝিনুকডাঙ্গার চার দিকে সাপের গর্ত, ফনিমনসার ঝোপ, আপনার সাধ্য কি সেখানে পা ফেলবেন। কত ঝানু ঝানু জেলেতে সাপে কেটেছে, শেয়ালের কামড় খেয়ে পাগল হয়ে গেছে কতজন--মাছের চাষ করবেন বলে আপনাকে গিয়ে সাপ শেয়ালের মধ্যে ঘোরাঘুরি করতে হবে এমন কি কথা—’

‘উহু’, বুড়া কর্তার ছেলে আপনি, বুড়া কর্তা এ দেশের রাজা।’ লখিন্দর বুঝিয়েছিল। ‘আপনার সুখ সুবিধা আমরা দেখব। সখ করে আপনি গাঁয়ে এসে থাকতে চাইছেন—এ আমাদের কত বড় আহ্লাদ!’

মেয়ে বলল, ‘মাছের চাষ করতে চাইছেন, টাকা দিয়েছেন যখন আটকাবে না কিছু, কাজ ঠিক চলতে থাকবে, পোনা ছাড়া হবে, মাছ বড় হবে, তারপর জাল দিয়ে ছৌঁকে তুলে বাছাই করা মাছ আপনার উঠানে এনে ফেলা হবে। তারপর সেই মাছ আপনি নিজের খান কি হাটে চালান দেন সে আপনি বুঝবেন।’

‘নিজের আর কত খাব।’ বাবু হেসে উত্তর করেছিল। ‘একলা কত মাছ খাওয়া যায়!’

‘তবে আমাদের কিছু বিলিয়ে দেবেন।’ ভুরু নাচিয়ে লখিন্দরের যুবতী মেয়ে হেসেছিল। সেই চিকুর হানা হাসি।

ঢেমনা তখনই বুঝেছিল, বাবুর মাছের চাষ হয়ে গেল।

লখিন্দর কোঁচড়ে বেঁধে নোটের কাঁড়ি নিয়ে চলে গেল। যাবার সময় বাবুর জন্ম গালভরা হাসি উপহার রেখে গেল। আর হাসির সঙ্গে তার পাখোয়াজ মেয়েকে : যার পেটে পেটে বুদ্ধি, চোখেমুখে ছুঁটামি।

‘হুঁ, বাবুর খাওয়া কেমন করে চলছে, রান্নাবান্না করে কে, ঘরদোর অগোছাল হয়ে আছে—সঙ্গে মেয়েছেলে নেই, বাবুর খুবই কষ্ট হচ্ছে। বাবুরা হলেন আমাদের দেশের রাজা, কত বড়মানুষ তেনারা, কত পয়সার মালিক। তুই একটু থেকে সব গোছগাছ করে দিয়ে যা কুস্তি, যাতে বাবুর কোনোরকম অসুবিধা না হয়।’

বাপের আদেশ কুস্তি মাথা পেতে নিয়েছিল।

যেন এই জন্ম মেয়ে তৈরী হয়েই এসেছিল। খুশী হয়ে তখনি বাবুর ঘর ছয়ার গোছাতে লেগে গেল। বিছানাপাটি ঝাড়াঝাড়ি আরম্ভ হল। বাস্পেটরার জায়গায় বাস্পেটরা গেল, টেবিলটা জানলার ধারে সরে গেল, জামাকাপড় আলনায় উঠল।

‘এগুলো ? এ সব কার ?’ কিছু ময়লা মতন জামা কাপড় বেছে আলাদা করে ফেলল লখিন্দরের মেয়ে। পাকা চোখ। এক নজর দেখেই বুঝল, রাজার ছেলের গায়ে এসব জিনিস ওঠে না।

‘এগুলো ঢেমনার।’ বাবু সঙ্গে সঙ্গে উত্তর করল।

‘ঢেমনা ?’ চমকে উঠেছিল কুস্তি। চোখ আড় করে চৌকাঠের কাছে দাঁড়াল, কালো লম্বা চেহারার মানুষটাকে এই প্রায় ভাল করে দেখল। তখন উঠোনে বাপের সঙ্গে দাঁড়িয়ে কেবল বাবুকেই দেখেছিল, বাবুর সঙ্গে কথা বলছিল। আর একটা জোয়ান পুরুষের দিকে চোখ ফেরাবার সময় ছিল না। ‘আপনার চাকর ?’

ঢেমনাকে দেখা শেষ করে বাবুর দিকে চোখ ফিরিয়েছিল কুস্তি।

বাবু মাথা নেড়েছিল। এবং হেসে বলেছিল, ‘আমার বন্ধু।’

‘বন্ধু!’ যেন আর একবার চমকে উঠেছিল লখিন্দরের মেয়ে।

আর একবার ঢেমনাকে দেখেছিল। ফিক্ করে হেসে বাবুর মুখের দিকে তাকিয়ে বলেছিল, ‘তা চাকর যদি বন্ধুর মতন কাজ করে, চাকরও বন্ধু হয়, ভাইয়ের মতন কাজ করলে চাকরকে ভাই বলতেও বাধা থাকে না।’

‘তা অবশ্য থাকে না।’ বাবু বিড় বিড় করে উত্তর করেছিল। শুনে ঢেমনা একটা লম্বা নিশ্বাস ফেলেছিল।

অর্থাৎ হাওয়া তখন থেকেই ঘুরতে আরম্ভ করেছিল।

ঢেমনার জামা কাপড় আলাদা হয়ে গেল, বিছানা আলাদা হয়ে গেল। বাবুর সঙ্গে চাকরের একত্র থাকা, এক সঙ্গে ওঠা-বসা ভাল লাগল না ছুঁড়ির। ঢেমনার থাকার জন্তু আলাদা ঘর ঠিক হল। ছোট ঘরে তার জিনিসপত্র চলে গেল।

কিন্তু প্রথম দু’ চার দিন তার ছোট ঘরেও গেছে লখিন্দরের মেয়ে। ফ্যাল ফ্যাল করে ঢেমনাকে দেখত। তা তো দেখবেই, ঢেমনা ভাবত, চাকর হোক আর যাই হোক, একটা জোয়ান মরদ সে। বাবুর যদি মাজাঘষা পালিশ ফরসা টুকটুকে চেহারা হয়, ঢেমনার কাঠখাট্টা শক্ত মজবুত কালো শরীরটারও তো একটা রূপ আছে, আর সেই রূপ যদি যুবতী মেয়ের মনে মেশা ধরিয়ে দেয় তো সেটা খুব দোষের হয় কি।

তাই ঢেমনার ভালই লাগত মেয়েটাকে দেখলে।

‘তোমার এই বিদগুটে নাম রাখল কে?’—হি-হি করে হাসত ছুঁড়ি।

‘মা,’ ঢেমনা গম্ভীর হয়ে উত্তর করত।

‘ওই নাম বাদ দিয়ে দে।’ সেদিন টুক কবে ঢেমনার ময়লা বিছানার ওপর বসে পড়েছিল লখিন্দরের মেয়ে। ঢেমনা খুশী হয়েছিল। যেন তার চোখেও একটু নেশা লেগেছিল। এমন পাতলা

ছিপছিপে গড়ন, এমন সারাক্ষণ ঝিলিক দেওয়া কালো চোখের হাসি, বাঁশ পাতার মতন পাতলা ছোটো ঠোঁট।

হুঁ, ছুরি করে ঢেমনা দীর্ঘশ্বাস ফেলেছিল।

কিন্তু এ ছ'টার দিন।

‘না, মা বাপের দেওয়া নাম বাদ দেওয়া যায় না।’ ঢেমনা বলেছিল, ‘তবে তো এই গায়ের ময়লা রংটাও ছুরি দিয়ে চেঁছে ফেলতে হয়।’

চোখ কপালে তুলেছিল মেয়ে।

‘ছুরি দিয়ে চেঁছে গায়ের রং তোলা যায় নাকি ?’

‘ওই আর কি।’ ঢেমনা মিটিমিটি হাসছিল। ‘মানে রং তুলতে গিয়ে চামড়াটা চেঁছে তুলতে হবে।’

‘তবে যে তুই মরে যাবি।’

‘কাজেই আমার নামটাও বাদ দেওয়া চলবে না। তা হলে আমি মরে যাব।’

একটু গম্ভীর থেকে কুস্তি বলেছিল, ‘তা তো বটেই। থাক্ তবে তোর ওই নাম।’ বলে তখনই আবার হি-হি করে হাসতে আরম্ভ করেছিল।

‘ঢেমনা, ঢেমনা।’

ঢেমনার মনে হচ্ছিল, ওই নামটা বার বার আউড়ে ছুঁড়ির ভালই লাগছিল। হুঁ, ঢেমনার চোখে একটু যেন নেশা ধরতে শুরু করেছিল। তার এত কাছে কোনো মেয়ে আর আসেনি, কোনদিন কোনো যুবতী তার বিছানায় বসেনি। কোনোদিন এতক্ষণ কারো সঙ্গে সে কথা বলেনি। আর সময়ই বা সে পেল কোথায়। সারাজীবন যেমন হাঁটা আর হাঁটা, ঘোরা আর ঘোরা। কখনও ধূপকাঠির প্যাকেট বগলে, কখনও শায়া ব্লাউজের বোঁচকা মাথায়, তারপর এল তিনচাকার রুটির গাড়ি, রোজে ঘোরা বৃষ্টিতে ঘোরা। চূপ করে এক জায়গায় দাঁড়াতে পেরেছে কি? হুঁ দণ্ড কারো সঙ্গে কথা বলেছে ?

হঁ, তবে কি মেয়েহেলে দেখেনি? ঢের দেখেছে এই জীবনে। তার কাছ থেকে ধূপকাঠি রেখেছে, শায়া ব্রাউজ কিনেছে, না কিনলেও দর কষাকষি করেছে, কিন্তু সে তো জানালায় দাঁড়িয়ে, রকে দাঁড়িয়ে হাত বাড়িয়ে জিনিস দেওয়া, হাত বাড়িয়ে জিনিস নেওয়া। কেউ এভাবে বিছানায় বসেনি। কেউ তার নাম নিয়ে এমন রগড় করেনি, হি হি করে হাসেনি।

‘তোমার বাপ মার রং খুব ময়লা ছিল?’

‘হঁ।’ ঢেমনা উত্তর করেছিল। ‘কাজেই রংটাও বাদ দেওয়া যাবে না।’

যেন তারপর হঠাৎ কী ভাবতে ভাবতে যুবতী তার বিছানা ছেড়ে উঠে দাঁড়িয়েছিল। চোখে মুখে ছুঁটামির হাসিটা ঝিলিক দিয়ে উঠেছিল।

‘কোনো মেয়ে তোকে ভাল বেসেছিল?’

‘হঁ,’ ঢেমনা মাথা নেড়েছিল।

‘তুই? তুইও ভালবেসে ছিলি?’

‘তা বেসেছিলাম বৈ কি।’ ঢেমনা এখন চিন্তা করে, কেন জানি নে ছট করে সেদিন একটা মিছে কথা বলে ফেলেছিল।

কালো চোখ দুটো গোল হয়ে উঠেছিল লখিন্দরের মেয়ের। একটা ঢোক গিলেছিল। যেন সরস গল্প শুনবে বলে তার জিভে জল এসেছিল।

তখুনি আবার ধপ করে তার বিছানায় বসে পড়েছিল।

‘শুনি শুনি? কেমন ছিল মেয়েটা দেখতে?’

‘ঠিক এমন।’ ঢেমনা হাতের আঙুলটা কুন্ঠির দিকে বাড়িয়ে দিয়েছিল।

‘ইস, আমার মতন। আমার মতন এমন ফরসা রং, এমন সরু কোমর, এমন মেঘের মতন কুচকুচে চুল মাথায়, তুই পেয়েছিলি কোথায় শুনি?’

‘টের মেয়ে ছড়িয়ে আছে কলকাতা শহরে।’ এর চেয়েও অনেক সুন্দরী মেয়ে, ডানাকাটা সব পরী রাস্তা ঘাটে, অলিতে গলিতে, রকে বারান্দায় ছাদে সিঁড়িতে চোখে পড়ে।’

শুনে মুখটা কালো করে ফেলেছিল যুবতী। ঢেমনার ভাল লেগেছিল থমথমে মুখটা দেখতে। কালো চোখ দুটো যেন একটু ফ্যাকাশে হয়ে গিয়েছিল।

‘হুঁ, তারপর কী হল সেই মেয়ের? কোথায় তোর সঙ্গে দেখা হত?’

‘জানালায় এসে দাঁড়াত। ধূপকাঠির প্যাকেট নিয়ে আমি ওদের জানালার নিচে গিয়ে দাঁড়াতাম।’

‘তারপর?’

‘দর জিজ্ঞেস করত, ধূপকাঠির প্যাকেট হাতে তুলে নিয়ে নেড়েচেড়ে দেখত।’

‘রাখত না নিশ্চয়ই? রোজ কি আর কেউ ধূপকাঠি রাখে?’ লখিন্দরের মেয়ের চোখে আবার হাসির ঝিলিক লেগেছিল।

ঢেমনা হেসেছিল।

‘না, তা রাখত না।’

‘মানে একটু চোখের দেখা, একটু কথা বলা?’

‘হুঁ, তাছাড়া রোজ ওই জানালার কাছে গিয়ে আমি দাঁড়াব কেন, আর ওই বা গরাদে কপাল ঠেকিয়ে আমার জন্তু অপেক্ষা করবে কেন।’

‘তারপর? বাড়িতে ঢুকতে তোর সাহস হত না, আর ওই মেয়েও ভিতর থেকে বেরিয়ে আসতে পারত না, তাই না?’

‘হুঁ।’

‘আহা বড় কষ্টের ভালবাসা।’

কুস্তি বড় করে নিখাস ফেলেছিল। ‘বাড়ির মানুষ বেশি কড়াকড়ি করলে ভালবাসার মেনাই অনুবিধা।’

‘এদিক থেকে তোমার খুব সুবিধে।’

প্রথম দুচার দিন লখিন্দরের মেয়েকে তুমি করেই যেন বলেছিল
টেমনা, ‘এখন খুশী বাড়ি থেকে বেরিয়ে আসছ, বাবা কিছু বলছে না।’

‘কী বলবে, কেন বলবে!’ ফৌস করে উঠেছিল কুস্তি। ‘ধমক
দিয়ে বুড়োকে সঙ্গে সঙ্গে ঠাণ্ডা করে দেব না! ইস, আমাকে আবার
কিছু বলবে, সাহস কত।’

‘পাখোয়াজ মেয়ে।’ টেমনা তার চোখ মুখের অবস্থা দেখে
বাঁচে না। ‘তুমি তো হুটহাট বাড়ি থেকে বেরিয়ে আসছ। বাপ
কি একদিনও কিছু বলছে না?’

‘কেন বলবে শুনি?’ কুস্তি এবার দাঁত খিঁচিয়ে উঠেছিল।
‘আমি কি বে-লাইনে হাঁটাচলা করি যে বুড়ো কথায় কথায় আমায়
শাসন করতে আসবে? এই তো তুই একটা জোয়ান ছেলে,
একলা ঘরে তোর বিছানায় বসে আছি, কিন্তু একবার আমার গায়ে
হাত দে দিকিনি?’

‘দেব?’ হাসতে হাসতে টেমনা ডান হাতটা বাড়িয়ে দিয়েছিল।

‘খান্নড় মেরে গালের মাংসটা উড়িয়ে দেব না? ঘুঘি মেরে
নাকটা খেঁতো করে দেব যে।’ কুস্তি সত্যি হাতের মুঠো পাকিয়ে
তুলেছিল। টেমনা তখনি হাত গুটিয়ে নিয়েছিল।

‘ব্বাস, তেজ আছে বটে মেয়ের।’

‘তেজ আছে বলেই বাবা কিছু বলে না।’

‘এটা ভাল, তেজ থাকা ভাল। মেয়েছেলের তেজ না থাকলে
রাতারাতি টকে যায়, দুর্গন্ধ বেরয়।’

‘ইস্ কথার কী ছিরি দেখ, শহরে ছেলে, তায় কিনা আবার
ফেরিওয়াল, মুখটা খুব আছে—’ কুস্তি এবার ঝলক দিয়ে উঠেছিল।
‘এখন বল তোর সেই মেয়ের কী হল—’

‘ঐ যে বললাম, বাড়ি থেকে বেরতে দেয় না, ছটকট করছিল,
আমারও ইচ্ছে করত, কাছে বসিয়ে গল্প করি—কী করা যায় ভেবে

ভেবে শেষটায় একদিন একটা বুদ্ধি মাথায় এল। আগের দিন ওকে বলে গেলাম, আমি কাল ছপুরে রাস্তার উল্টোদিকে লাল রঙের চিঠির বাস্কাটার কাছে দাঁড়িয়ে থাকব, ও চুপি চুপি বাড়ি থেকে বেরিয়ে আসবে। তখন ওর মা ঘুমোয়, দিদি ঘুমোয়, বাপ আপিসে চলে যায়, রাস্তাটাও ফাঁকা থাকে—ও বেরিয়ে এলে ছুজনে গিয়ে একটা চায়ের দোকানে ঢুকব। ছুজন একসঙ্গে বসে চা খাব, গল্প করব—’

‘তারপর?’ লখিন্দরের মেয়ে চোখের পলক ফেলছিল না। ভালবাসার গল্পটা তার খুব মনে ধরেছে, ঢেমনা বুঝতে পারছিল। একটা মিছে গল্প বলে গাঁয়ের ছুঁড়িকে খুব তাক লাগিয়ে দিতে পেরেছে দেখে ঢেমনা সেদিন বেশ মজা পাচ্ছিল।

‘মেয়েটা বুদ্ধি শেষ পর্যন্ত আর বেরতে পারল না? সেজে গুজে বাড়ি থেকে বেরবে আর অমনি মার ঘুম ভেঙে গেল, নাকি দিদির?’ প্রশ্ন করে চেয়ে রইল কুস্তি।

ঢেমনা মাথা নেড়েছিল। লম্বা লম্বা ছোটো নিশ্বাস ফেলেছিল।

‘বেরিয়েছিল ঠিকই। বাড়ি থেকে বেরিয়ে সেই চওড়া রাস্তার অর্ধেকটা পার হয়ে এসেছিল।’

‘তারপর? তখন বুদ্ধি পেছন থেকে জানালা দিয়ে দিদি দেখে ফেলল, নাকি মা?’

‘কেউ না, কেউ দেখেনি, সব তখন নাক ডাকিয়ে অঘোরে ঘুমোচ্ছিল। অর্ধেক রাস্তা পার হয়েছে, আর ঠিক তখন পেছন থেকে একটা লরী এসে ধাক্কা দিল।’

‘আঁ!’ চমকে উঠেছিল কুস্তি। যেন হঠাৎ ভয়ে আঁতকে উঠে খপ করে ঢেমনার একটা হাত চেপে ধরেছিল। যেন শ্বাস পড়ছিল না। তারপর একটু পরে হাতটা সরিয়ে নিয়েছিল লখিন্দরের মেয়ে, ধরা গলায় বলেছিল, ‘তুই কি করলি, তখন হাসপাতালে নিয়ে গেলি ওকে?’

‘কাকে আর হাসপাতালে নিয়ে যাব’, বিবল গলায় ঢেমনা

বলেছিল, ‘ছোটো চাকা চলে গেছে বুকের ওপর দিয়ে—একেবারে চ্যাপ্টা হয়ে গেছে, ওখানেই থাণ্টা শেষ—’

তারপর আর অনেকক্ষণ কথা বলেনি কুন্তি। তারপর যখন কথা বলছিল তার ছুঁটামি ভরা কালো চোখ ছোটোও হলহল করছিল। ‘আহা! তোর কপালটা বড় মন্দ। একটা মেয়ে ভালবেসেছিল, সেও রইল না, লরী চাপা পড়ে মরে গেল।’

‘সে আর বলতে।’ ঢেমনা মুখ ঘুরিয়ে জানালা দিয়ে গলা বাড়িয়ে থুথু ফেলেছিল।

তারপর বাবুর ডাক শুনে লখিন্দরের মেয়ে বাবুর ঘরে চলে গেছে। যাই হোক, প্রথম ছ-একদিন ঢেমনার ছোট ঘরেও এসেছিল ছুঁড়ি। এসে ভালবাসার গল্প শুনত। অবাক হয়ে ঢেমনাকে দেখত। হুঁ, মাথায় তেল পড়ে না, গায়ে ময়লা জামা আছে, তার জামা কাপড় হেঁড়া, ময়লা বিছানা, তা হলেও তো পুরুষ, একটা জোয়ান ছেলে। বাবুর যদি একরকম রূপ, জোয়ান চাকরের আর এক রূপ। যেন তাই দেখতে কুন্তি ছুটে ছুটে সামনে এসে দাঁড়িয়েছে। বাবু বাইক নিয়ে চলে গেছে, নেবুতলার ঠাণ্ডা ছায়ায় ঢেমনার পাশে বসে ছুঁড়ি গল্প করেছে। অর্থাৎ মনটা তখনও সরল ছিল। ভিতরে ভেজ ছিল, পাখোয়াজ মেয়ে, প্রথম থেকেই চোখেমুখে ছুঁটামি। তা হলেও প্যাচ ছিল না, বাবুর খাওয়ার দিকে নজর রাখত, ঢেমনা কী খাচ্ছে না খাচ্ছে ছবার উকি দিয়ে দেখে গেছে।

ঐ ছ-চারদিন।

তারপর বাতাস ঘুরে গেল।

আরম্ভ হল ঢেমনাকে দেখে ঠোঁট মোচড়ানো হাসি, নাক কোঁচকানো। যেন একটা ঘেমার ভাব, দৃষ্টির মধ্যে তাক্কিল্য।

আর সারাক্ষণ বাবুর ঘরে।

বাবুর মাছের চাষ লখিন্দর নিজে দেখছে, বাবুর চল্লিশ হাজার টাকা দিয়ে কেনা ছ’শো বিঘার বিল লখিন্দরের লোকজন দিনরাত

পাহারা দিচ্ছে। বাবু খায়দায়, বিশ্রাম করে বেড়ায়, কিছু কেনাকাটার দরকার হলে মোটর বাইক ছুটিয়ে শহরে চলে যায়। শহর থেকে ফিরে এসে উঠানে পা দিয়ে, দরাজ গলায় ডাকে, 'কুস্তি কুস্তি',—কুস্তি ঘর থেকে ছুটে বেরিয়ে আসে। বাবুকে দেখে হি-হি করে হাসে—চব্বিশঘণ্টা কুস্তি এখন এবাড়ি।

অর্থাৎ ঢেমনা বুঝতে পারল, বিলের কাজ ধারন্ত হয়েছে। ছুঁড়ির চোখের ছুঁটামিটা আর শুধু চোখের মধো লেগে নেই, চোখ থেকে মনে নেমে এসেছে। ঢেমনার বুকের ভিতর হু হু করে উঠল।

তারপর দু'মাসে সে অনেক দেখেছে, অনেক কিছু সয়েও গেছে।

বেশি বাড়াবাড়ি দেখলে এখন চোখ বুজে থাকে। কিন্তু ঐ যে, বজ্জাত মেয়ে যখন ঝাকামো করতে আসে, নতুন শাড়ি জামা দেখাতে, খোঁপার ফুল দেখাতে, পায়ের চটি দেখাতে সামনে এসে দাঁড়ায়, মিষ্টি গলায় 'ঢেমনা ঢেমনা' ডাকে, তখন আর সে সহ্য করতে পারে না, তার মাথায় খুন চেপে যায়, উননের চেলা কাঠ ভুলে মুখটা পুড়িয়ে দিতে পারলে তবে যেন আক্কেশ মেটে। রাগ কমে।

‘এই ঢেমনা!’

ঢেমনা মুখ তুলছিল না। কুই মাছের আঁশ ছাড়াছিল। এতবড় মাছ পাঠিয়ে দিয়েছে লখিন্দর। একটা মানুষ বয়ে আনতে পারে না।

বাবু মাছ দেখে মহা খুশী।

কালিয়া হবে পেটি দিয়ে। পিঠের টুকরোগুলো কড়া করে ভাজতে হবে। বাবুর পাশে দাঁড়িয়ে কুস্তিও মাছ দেখছিল তখন। ঢেমনাকে

রান্নার নির্দেশ দিচ্ছিল ছ'জনে মিলে। 'আর মুড়োটা দিয়ে হবে ঘণ্ট।'

'হুঁ, মুড়িঘণ্ট। চমৎকার হবে।' বাবু কুস্তির কথায় সায় দিয়েছিল। সব বলা-টলা শেষ করে ছ'জনে সরে গেছে। এখন তার চোখের সামনেই কুস্তির হাত ধরে হাঁটে বাবু। হাত ধরাধরি করে ছ'জনে ওদিকের বাগানে বেড়াতে গেছে।

কিন্তু আবার ছুঁড়ি এসেছে কেন! একলা এসেছে।

টেমনা মুখ তুলছিল না। কথা বলছিল না।

'এই টেমনা, এদিকে তাকা না।'

'বললেই হয় কী বলার আছে, কাছ করছি চাখে দেখছিস না?'

'আহা! কাছ তো তাকে করতেই হবে। মাইনে নিচ্ছিস, খোরাক পাচ্ছিস। বসে থাকতে তাকে আনা হয়নি।'

'এখান থেকে তুই সরে যা, আমার হাতে এটা কী দেখছিস তো।'

'তোরা হাতে বাঁটি।' মাছ কাটার এই প্রকাণ্ড বাঁটিও লখিন্দর কামার বাড়ি থেকে গড়িয়ে বাবুকে এনে উপহার দিয়েছে। কলকাতা থেকে যে বাঁটি আনা হয়েছিল তা দিয়ে লাউ কুমড়া বেগুন পটল কোটা যায়, ঝিনুকডাঙা বিলের এতবড় কাতলা মাছ কাটা যায় না। এ সব পুরনো মাছ। কোন্টার কত বয়স হয়েছে লখিন্দর এখন নিজেই ভুলে গেছে। হুঁ, কই কাতলা শোল বোয়াল। স্মাওলা ধরে গেছে কোনোটার গায়ে। কাজেই যেমন মাছ তেমন তার পেট কাটার জন্তু, গলা কাটার বড় বড় অস্থ চাই। বাঁটি দেখে বাবু খুণী হয়েছিল। 'এ দিয়ে যে মানুষ কুচিয়ে কাটা যাবে, লখিন্দর।'

'মানুষ।' লখিন্দর বুঝি বাবুর কথা শুনে অবাক হয়েছিল। সাদা ভুরু ছোটো কুঁচকে বাবুর কচিপনা মুখটা দেখেছিল। তারপর গাল ছড়িয়ে হেসেছিল। 'মানুষ কাটতে আপনার ঐ পটল ঝিঙের বাঁটি আছে, আমার এই বাঁটি দিয়ে হাতি কুচিয়ে কাটুন না বাবু, মোষ কুচিয়ে কাটুন, কেমন কচ কচ করে নেমে যায় দেখবেন। আটকাবে না কোথাও।'

লখিন্দরের কথা শুনে বাবু খুব হেসেছিল।

সেই বঁটি হাতে তুলে ঢেমনা কুস্তিকে দেখাল। কিন্তু কুস্তি ভয় পেল না। চেষ্টা না। বাবু বাগানে আছে। ঢেমনা ইচ্ছা করলেই এখন কিছু করতে পারবে না, তার খুব জানা ছিল। তাই বঁটি দেখে সে খিলখিল করে হাসল।

‘আমায় কাটবি নাকি?’

‘তুই এখান থেকে সরে যা, আমায় কাজ করতে দে।’

‘তোমার কাজ দেখতেই বাবু আমায় পাঠাল। মাছ কাটা খারাপ হলে বাবু ভীষণ রাগ করবে। খণ্ডগুলো বড় বড় হবে। পিস্তটা টেনে ছিঁড়তে গেলে গেলে মাছ ভেতো হয়ে যাবে। মুখে দেওয়া যাবে না।’

ঢেমনা চুপ করে থেকে মাছের পেট চিরছিল। মাছের গন্ধে মাথার ওপর রাজ্যের কাক এসে জুটেছে। কা-কা শব্দে বাড়ি মাথায় তুলেছে। রান্নাঘরের পিছনে চালতা গাছের নিচে হোগলার চাটাই বিছিয়ে ঢেমনা মাছ কুটছিল।

‘বুঝলি, পিস্ত গলিয়ে ফেললে সেই মাছ বাবু আর মুখে তুলতে পারবে না।’ এবার গলা বাড়িয়ে ঢেমনার মুখের কাছে মুখ নামিয়ে ছুঁড়ি কথা বলতে লাগল। ঢেমনা হাতের বঁটি রেখে দিল। কী করবে ঠিক বুঝতে পারছিল না। তার মাথার ভিতর আগুন জ্বলছিল।

হাতের কাজ বন্ধ রেখে হঠাৎ এমন গুম হয়ে ঢেমনা বসে রইল দেখে কুস্তি ঘেন আরো মজা পেল।

‘আচ্ছা, আমি কথা বলতে এলে তুই এত চটিস কেন?’

ঢেমনা চোখ তুলল। ‘তোকে বলেছি, আমি যখন কাজ করি, আমার সঙ্গে কথা বলবি না। আমার সামনে একদম আসবি না।’

‘আহা! আমি না এলে এটা ওটা তোকে করতে বলে দেবে কে, বাবু এসে বলবে? তোমার যা বুদ্ধি, হয়তো পেটির মাছ ভাজতে শুরু করবি, পিঠের মাছ খোলে দিবি।’

‘বেশ তো বাগানে বসে গল্প করছিলি বাবুর সঙ্গে, এখানে আবার মরতে এলি কেন ?’

‘ও, আসল রাগ তোর এখানে, বাবুর সঙ্গে কথা বলি আর তাই দেখে হিংসেয় তোর পেট অলে যায় ।’ হাতের আঙুল দিয়ে কুস্তি চিবুক ঠোঁট চেপে ধরে নতুন করে হাসতে আরম্ভ করল, যেন হাসি লুকোতে মুখে এভাবে আঙুল চাপা দিল । কাজেই লম্বা কসাঁ আঙুলে একটা নতুন জিনিস ঢেমনার চোখে পড়ল । পাথর বসানো এত বড় একটা আংটি রোদের টুকরো নেমে ঝকঝক করছে ।

‘কি দেখছিস অমন করে ?’

‘কিছু না ।’ ঢেমনা তখনি মুখ নামিয়ে বাঁটিটা তুলে নিল । ঘাড় শুঁজে লুকিয়ে একটা দীর্ঘশ্বাস ফেলল ।

কুস্তিও আর দাঁড়ায় না, যে জিনিস দেখাবার জন্ত এসেছিল, তা দেখানো হয়ে গেছে, এবার ছোঁড়া নতুন ঘরে পুড়তে থাকুক ।

‘বুঝলি, যেমন বলে গেলাম সে ভাবে সব করবি, গোলমাল হলে বাবু তোর পিঠের ছাল তুলবে ।’ বলতে বলতে লখিন্দরের মেয়ে বাগানের দিকে চলে গেল ।

ঢেমনা চুপ করে রইল । অর্থাৎ এসব কথা শোনাও তার অভ্যাস হয়ে গেছে । যেমন ছ’মাসে অনেক কিছু দেখে চোখ ছটোর অভ্যাস হয়ে গেছে ।

আজ আর সে দাঁত খিঁচোল না, হৈ হৈ করল না, হাতের বাঁট তুলে ধরেছিল ঠিকই, কিন্তু ঐ পর্যন্ত, মেয়েটাকে তাড়া করল না ।

উছ, রাগ না হিংসা না, অলুনি পুড়নি—কিছুই না, কী আর অলবে, কি পুড়বে, পুড়ে পুড়ে কাঠ ছাই হয়ে গেলে আর আগুন থাকে ? কাজেই সব আগুন, সব পোড়া শেষ করে দিয়ে এখন সে ছাইয়ের পিণ্ড হয়ে এখানে পড়ে আছে ।

উছ, জেদ অভিমান কিছুই আর ভেতরে নেই তার । কদিন ছিল । এক একবার তার ইচ্ছা হয়েছে কলকাতায় ফিরে যায়,

গিয়ে কৃষ্ণচূড়া ফুলগাছওয়ালা বাড়ির দোতলার বারান্দায় উঠে বুড়ো কর্তাকে তার বিশ্বাসের সলতেটা ফিরিয়ে দেয়, দিয়ে বলে, ‘আমাকে দিয়ে হল না, আপনি আর কাউকে দেশে পাঠান, আর কেউ গিয়ে আপনার খোকার ভালমন্দ দেখুক—আমি হেরে গেছি, পালিয়ে এসেছি।’

‘খোকা কী করছে সেখানে?’ ঘোলাটে চোখ দুটো তুলে কর্তা প্রশ্ন করত।

‘মাছের চাষ করছে।’ কর্তার শুকনো সাদা পা দুটোর দিকে চোখ রেখে সে বলত, ‘হু মণ চারা পোনা বিলের জলে ছাড়া হয়েছে।’

‘তো তুই চলে এলি কেন!’ কর্তা ব্যাকুল হয়ে উঠত। ‘সাংসারিক বোধবুদ্ধি নেই ছোড়ার, নিমুকে একলা রেখে এলি, তাকে দেখবে কে এখন?’

ঢেমনা চুপ করে থাকত। তাই তো, এই প্রশ্নের কী উত্তর দিত সে। লখিন্দর দেখছে, লখিন্দরের মেয়ে দেখছে আপনার খোকাকে, বলতে পারত কি? পারত না। আমার ভাল লাগে না, জলে ডাঙ্গায় কাদা মাটির দেশে মন টেকে না। তার চেয়ে কলকাতার বাঁধানো রাস্তায় ঘুরে ঘুরে কুটির গাড়ি চালাব, তাই ফিরে এসেছি— বলতে পারত কি সে? পারত না, চুপ করে থাকত।

বুড়োর ঐ ব্যাকুল চোখ, কাতর চেহারাটা দেখতে হবে—ভয় পেয়ে কলকাতায় ফিরে যাবার ইচ্ছাটা ঢেমনাকে শেষ পর্যন্ত স্থগিত রাখতে হয়েছে।

অভিমানে? কার ওপর অভিমান করবে? অভিমান তখনই খাটে যখন কেউ মুখ ফিরিয়ে তাকায়। নিমুর সময় নেই ঢেমনার দিকে তাকাবার।

ঢেমনা কাঠ কাটছে, জল তুলছে, বাটনা বাটছে, রান্না নামাচ্ছে। তার কর্তব্য করে যাচ্ছে সে। চিরকাল কষ্ট করেছে। এখানেও

কষ্ট করতে এসেছে। তাই তো বুড়োকে বলে এসেছে ঢেমনা, 'আমার হাতে সব ছেড়ে দিন, আমি খোকার সুখসুবিধা দেখব, আঁচড়টি তার গায়ে লাগতে দেব না।'

তাই ভেবে, নিম্বর এতটুকু অসুবিধা না হয় চিন্তা করে, ঢেমনা যদি সারাদিন রান্না আর জল তোলা, বাসন মাজা আর কাপড় কাচা নিয়ে মুখ বুজে খাটতে থাকে তো এই নিয়ে মাথা ঘামাবার কিছু আছে নাকি। নিমাই মাথা ঘামায় না।

তাই দেখছে ঢেমনা। বাবু তার দিকে তাকায়ও না।

কিন্তু কোনোদিন কি তাকাবে না? সার্পেনটাইন লেনের সেই বাদশার রাত কি আর একবার ফিরে আসবে না?

ঢেমনা সেই অপেক্ষায় আছে।

ওপরটা ছাড়াই হয়ে গেছে ঠিকই। জেদের আগুন নিভে গেছে, অভিমানের উত্তাপ জুড়িয়ে গেছে।

কিন্তু ছাইয়ের নিচের আগুন এখনো ধিকধিক করছে। যেন এইজন্ম কলকাতায় ফিরে যাওয়া হবে না। একটা কারণ। সে দেখবে। যে খেলা আরম্ভ হয়েছে তার শেষ দেখবে।

তাই চাকরের চেয়েও বেশি চাকর বনে গিয়ে সে চুপ করে আছে।

আশ্বিনের সকাল। বাবুর বাগানে শিউলি ফুটেছে। ঝলক দিয়ে দিয়ে ওদিক থেকে হাওয়া শিউলির গন্ধ ভাসিয়ে নিয়ে আসছে।

একটা খিলখিল হাসির শব্দও শোনা যাচ্ছিল। বাগানে বসবার জন্ম, পাশাপাশি দু'জন বসে যায় এমন ক'টা কাঠের চেয়ার পাতা হয়েছে। বাবু ছুতোর ডাকিয়ে তৈরি করেছেন। কর্তার আমলে চেয়ার ছিল না। গিন্নিকে নিয়ে, ছেসেমেয়েদের নিয়ে কর্তা বুঝি ঘাসের ওপর বসে পড়তেন। হুঁ, ওখানে ভূর ভূর শিউলির গন্ধ, খিলখিল হাসি। ঢেমনার চারপাশে মাছি ভন ভন করছিল, মাথার ওপর কাকের দল নতুন করে কা কা করে উঠল। মাছের

পেটের ভিতর হাত ঢুকিয়ে ঢেমনা নাড়িভুঁড়ি টেনে বার করল।
পিস্তটা সাবধানে ছিঁড়ে টেনে বের করল। মাছের গায়ে লাগল
না। কিন্তু নখের আঁচড় লেগে থলেটা হাতের মধ্যে ফেটে গিয়ে
তার হাতের তেলো আঙুল নখ আরও নীল হয়ে গেল।

কলকাতার বরফপচা মাছের কালচে পিস্ত দেখেছে সে। এত
গাঢ় সবুজ নীল রং কোনোদিন দেখেনি। হাতটা চোখের সামনে
তুলে ঢেমনা ঘুরিয়ে ফিরিয়ে দেখতে লাগল।

‘এই যে দাদা, নমস্কার।’

ঢেমনা থমকে দাঁড়াল। চাকরকে দেখে নমস্কার! অবাক হয়ে
মানুষটার মুখ দেখে ঢেমনা।

‘চিনতে পারলেন না।’ সাদা দাঁত ছড়িয়ে মানুষটা হাসছে।

‘না, চিনতে পারলাম না।’ ঢেমনা ভুরু কঁচকাল।

‘আমার নাম মদন। মদন কৈবর্ত।’

ঢেমনার হাতে তেলের টিন। হাতে চলেছে। আজ গাঁয়ের হাট।
সরষের তেল আনতে হবে। মশলাপস্তুরও ফুরিয়েছে। মশলাপাতি
আনতে হবে। কিন্তু রাস্তার মাঝপথে এই নমস্কারের ঘটনা কেন।

‘কে তুমি?’ ঢেমনা বিরক্ত হয়ে প্রশ্ন করল।

‘ঐ যে বললাম, আমার নাম মদন। মদন কৈবর্ত। আমি
লখিম্ভর দাসের লোক।’

‘অ।’ এবার ঢেমনা চিনল, অর্থাৎ চিনতে পেরেছে এমন ভদ্র
করে মাথাটা কাৎ করল।

তাহাড়া জোয়ান ছেলে মদন। গৌফের রেখা সব দেখা দিয়েছে।
চোখ দুটো ঝকঝক করছে। বুকটা চেতিয়ে উঠেছে। কাঁধে মাংসের
গোছ ঊঁকি দিতে আরম্ভ করেছে।

‘আমি আপনাকে ঐ ছাতিম গাছটার নিচে থাকতেই দেখে চিনে
ফেলেছি।’ আঙুল দিয়ে মদন দূরের একটা গাছ দেখাল। ‘বাবুর
বাড়ির লোক হাটে চলেছে।’

‘আমি বাবুর চাকর।’ ঢেমনা ঘাড় বেঁকিয়ে থুথু ফেলল।

‘এই জন্মই দাঁড়িয়ে পড়লাম, ভাবলাম দাদাকে একটা কথা বলব।’
মদন আর একগার দাঁত ছড়িয়ে হাসল। ভুরু কুঁচকে রেখে হাঁটতে
লাগল। মদন সঙ্গে সঙ্গে চলল।

‘এই নিন দাদা বিড়ি খান।’

মদন টাঁক থেকে বিড়ির বাগুিল ও দেশলাই বার করে ঢেমনার
হাতে তুলে দিল।

‘হুঁ, কী কথা?’ বিড়ি ধরিয়ে ঢেমনা চোখ আড় করে মদনের
মুখটা দেখল।

‘আমুন না, এই গাছতলাটায় বসি, হাটের দেরি আছে। এখনো
তেমন ভাল করে জমেনি।’

‘উহু, দেরি হয়ে গেলে মুশকিল হবে। মুর্গি ছলে রেখে এসেছি,
ফিরে গিয়ে মাংস পাক করতে হবে। টাইম মতন রান্না নামিয়ে না
দিতে পারলে বাবু আমার পিঠের ছাল তুলে ফেলবে।’

‘বাবু খুব কড়া?’

‘হুঁ।’ তাহলেও অশ্বখ গাছের ঠাণ্ডা ছায়াটা দেখে ঢেমনা দাঁড়িয়ে
পড়ার লোভ সামলাতে পারল না। তাহাড়া হেঁটে হেঁটে বিড়ি টেনে
তেমন সুখ পাচ্ছিল না।

‘বসো দাদা, বসো।’

মদনের দেখাদেখি ঢেমনা একটা মোটা শিকড়ের ওপর বসল।
তেলের টিনটা নামিয়ে পাশে রাখল। অশ্বখ পাতার বুপরির ভিতর

ছোট ছোট অগুস্তি পাখি এসে জুড়েছে। কিচির মিচির শব্দে কান পাতা যাচ্ছিল না।

টেমনা চোখ তুলে পাখি দেখছিল।

মদন টেমনার মুখ দেখছিল।

‘তবে কিনা’, টেমনা চোখ নামিয়ে বলল, ‘বাবুর চেয়েও বাবুনি বেশি কড়া।’

মদনের চোখ ছোটো গোল হয়ে গেল, শব্দটা তার কাছে নতুন ঠেকল, হাঁ করে টেমনার দিকে চেয়ে রইল। টেমনা জোরে জোবে বিড়ি টানতে লাগল।

‘বাবু তো বৌ আনেনি, এখনো শাদি হয়নি শুনেছিলাম যেন?’ মদন বিড়ি বিড়ি করে উঠল।

টেমনা গলার ভিতর কেমন একটা শব্দ করে হাসল। ‘দেশলাইটা দেখি?’

মদন হাত বাড়িয়ে দেশলাই দিল। টেমনা পোড়া বিড়িটা ধরিয়ে নিল। তারপর মদনের চোখের দিকে তাকিয়ে দাঁত ছড়িয়ে হাসল।

‘শাদি না করলেও বাবুনি থাকতে দোষ কি, বাবুদের এমন একটা ছোটো থাকে!’

কেমন যেন স্বন্দর মধ্যে পড়ে গিয়ে মদন ছটফট করতে লাগল। টেমনার মুখের দিক থেকে চোখ ছোটো সরাতে পারছিল না। কিছুক্ষণ চুপ থেকে, পরে আন্তে নিচু গলায় বলল, ‘কিন্তু বাবুর বাড়িতে সেদিন তো কোনো মেয়েছেলে দেখলাম না?’

‘চোখ না থাকলে কেমন করে দেখবে ভাই,’ টেমনা খুতনি তুলে গাছের পাতা দেখতে দেখতে বলল, ‘তোমার যদি চোখ খোলা থাকত ঠিকই দেখতে পেতে।’

‘লখিন্দর কাকার মেয়ে কুস্তি ছাড়া আর কোনো মেয়েছেলে আমার চোখে পড়ল না।’ মদন বলল।

‘ঐ, ঐ তো দেখে এয়েছ, হুঁ ঠিকই দেখেছ।’ ঢেমনা জোরে মাথা ঝাঁকাল।

মদন হঠাৎ গুম হয়ে গেল। ঢেমনার দিকে আর চোখ ছিল না। মাটির দিকে চোখ রেখে কী যেন খুব ভাবতে লাগল। বিড়ির বাণ্ডিলটা সে খুলে রেখেছিল।

ঢেমনা হাত বাড়িয়ে আর একটা বিড়ি তুলে নিয়ে ধরাল।

‘বাবু আমার কড়া না’, এক মুখ ধাঁয়া ছেড়ে ঢেমনা বলল, ‘তোমাদের ঐ লখিন্দরের মেয়েই ও বাড়ি গিয়ে বেশি চোটপাট করেছে, আমি চাকর, তাই সারাক্ষণ কেবল আমাকে চোখ রাঙায়।’

‘বাবুর আশ্চর্য্য পেয়েছে।’ মদন একটা লম্বা শ্বাস ফেলল। ‘ঐ কথাটাই দাদাকে বলব বলে ছাতিম গাছটার নিচে দাঁড়িয়ে পড়লাম।’

‘কোন কথা!’ ঢেমনা যেন নতুন কথা শুনতে চাইছিল, মদনের চোখ দুটো ভাল করে দেখল।

‘খুব সাজগোজ বেড়ে গেছে ছুঁড়ির’, মদন থুথু ফেলল। ‘হনো মাখে, কিরিম ঘষে মুখে, বাহারের শাড়ি বেলাউজ গায়ে, পায়ে নকশা কর’ জুতো। গাব সেদ কবে জাল রং করত, পচা মাছের পেট দার করে শুঁটকি দিত, সেই ছুঁড়িকে এখন চেনা যায় না।’

‘হুঁ, বাতারাতি ভাল পাল্টে গেছে, ঠিকই বলেছ ভাই, লখিন্দরের মেয়ে কউ বলবে না এখন, তাই তো আমি নাম দিয়েছি বাবুনি, তার মানে বিবি, যেমন মেজাজ তেমন চালচলন।’ ঢেমনা গলার নিচে হাসল।

‘তা না হয় ভাল ভাল শাড়ি-বেলাউজ পরল, জুতো পাবে হাঁটল, কিন্তু কিনা এমন সব কীর্তি করেছে দেখলে চোখ কপালে ওঠে দাদা—’

‘কি কীর্তি ভাই?’ নতুন করে কীর্তির কথা শুনতে ঢেমনা দু কান খাড়া করে ধরল।

‘পরশর নিল থেকে ফিরছিল কাল সন্ধ্যাবেলা, হুঁ আমাদের

জাতভাই, আমার দোস্ত—বাবুদের বাগানের পেছন দিকের জাজাল ধরে রেল ইন্সটিশনে যাবে, তার কুটুম আসবার কথা বনগাঁ থেকে, বাগানের ভেতর আচমকা খিলখিল হাসির আওয়াজ শুনে সুপুর্নি-গাছের বেড়ার কাঁক দিয়ে একবার উঁকি মেরে দেখল, কে এমন ভর-সজ্জায় মজার হাসি হাসে। মেয়েছেলের গলা, তাই পরাশরের মেজাজ গরম হয়ে গেল, অল্পবয়সের ছোঁড়া, আমার বয়সী, আমার চেয়েও দেখতে ভাগড়া, এই বুকের ছাতি, এই পুরু গর্দান—’

‘তারপর ? কী দেখল উঁকি দিয়ে ভেতরে ?’

‘তোমার বাবু কুস্তিকে জড়িয়ে ধরে আচ্ছা করে চুমু খাচ্ছে, নয়া কাঠের বেঞ্চি বিছিয়েছে বাবু বাগানে, আমাদের পেছলাদ ছুতোরের হাতের তৈরি বেঞ্চি, এই তো হু চার দিন আগে চারখানা বেঞ্চি বাগানের চার কোণায় বসিয়ে দিয়ে এসেছে পেছলাদ দাদা, আমার সঙ্গে পরশু নারায়ণপুরের হাটে দেখা, বললে ভাল মজুরী পেয়েছে—’

‘হু’, তারপর ?’ ঢেমনা মেরুদাঁড়া সোজা করে বসল। তার হাতের বিড়ি নিভে গেছে। বিড়ি টানতে ভুলে গেছে। মদনের দিক থেকে চোখ ছুটি ফেরাতে পারছে না।

‘ঐ যে’, মদন ফৌস করে একটা নিশ্বাস ফেলল, ‘পরশর দাঁড়িয়ে থেকে কীতিটা দেখল। বেঞ্চির ওপর বাবু, বাবুর গা ঘেঁষে কুস্তি বসে আছে, বাবু হু-হু’বার কুস্তিকে বুকের ওপর টেনে নিয়ে বেশ ভাল করে চুমু খেয়েছে আর বেলাজ মেয়ে খিলখিল করে হাসছে।’

ঢেমনার মেরুদাঁড়ায় একটা ঠাণ্ডা স্রোতের কাঁপুনি লাগল। অথচ গনগন করছিল আশ্বিনের রোদ। মাথার ওপর গাছের ডালে পাখির কিচকিচি শব্দ আর ধামছিল না। কতক্ষণ কেমন যেন শুম মেরে রইল ঢেমনা। মদন আর একটা বিড়ি ধরিয়ে জোরে টানতে শুরু করেছে।

‘হু’, হু বার কেশে গলাটা পরিষ্কার করে নিয়ে ঢেমনা বলল, ‘ঐ

কথাটাই ঠিক বলেছে ভাই, বেলাজ মেয়ে তোমাদের লখিন্দরের বেটির লজ্জা শরম বলতে কিছু নেই—একেবারে নষ্ট মেয়ে, এখানে এসে অবদি তো আমি দেখছি—’

‘উহঁ, ও কথা বলা না দাদা, তোমার ওই কথাটা ঠিক হল না। তোমরা শহরে মানুষ, তোমাদের নিন্দা করছি না, তুমি তো সোনার মানুষ। সবাই বলছে তোমার মতন একটা খাঁটি লোক, বিশ্বাসী লোক খুব কম দেখা যায়, সারাদিন মুখটি বুজে বাবুর কামকাজ করছে, তবে কিনা তোমার ঐ বাবুর পয়সার গরম, তাই তেনার যা মনে চাইছে তাই করেছে—হঁ, ঐ বাবু এসে কুস্তির মাথাটা ধোয়েছে, ছুঁড়িকে রাতারাতি নষ্ট করে দিল।’

‘উহঁ, কথাটা ঠিক হল না।’ ঢেমনা জোরে মাথা ঝাঁকাল। ‘আমার বাবুর মতন অমন খাঁটি চরিত্রের লোক হয় না, আমি তো জানি, এক পাড়ার মানুষ আমরা, কোনদিন ডাইনে বাঁয়ে তাঁকে তাকাতে দেখিনি, পয়সাওলা বাপেরছেলে—কত কিছু করতে পারে, কলকাতা শহরে পয়সা দিলে কী না পাওয়া যায়, উহঁ, যাকে বলে একেবারে তুলসী গঙ্গাজলে ধোয়া ভেতরটা, একটা মেয়েছেলের দিকে চোখ তুলে চাওয়া কাকে বলে জানে না—আর এখানে মানুষটা আসতে না আসতে কেমন যেন হয়ে গেল—ঐ ডাইনী মেয়ে, ঐ বজ্জাত ছুঁড়ি আমার বাবুর মাথাটা নষ্ট করে দিয়েছে—বাবুর স্বভাবটাকে রাতারাতি বদলে দিয়েছে শয়তানী।’

‘না দাদা, তুমি একচোখো মানুষ—তুমি তোমার বাবুর দোষ দেখতে চাইছ না—’ মদন রীতিমত উত্তেজিত হয়ে উঠল, চোখ লাল করে ফেলল। ‘আমরা জানি কুস্তি কেমন মেয়ে, যেমন আগুনের মতন রং, তেমনি তার ভেতরটা, ভয়ানক তেজী, ভয়ানক শক্ত, কেউ হাত বাড়াতে গেলে হাত পুড়ে গেছে, বে লাইনে হাঁটতে জানত না।’ রাগ করে নিভে যাওয়া বিড়িটা ছুঁড়ে ফেলে দিয়ে মদন একটা গরম নিশ্বাস ফেলল, চুপ করে রইল একটু সময়, তারপর বলল, ‘ঐ

তোমার বাবু, ওপরট! দেখলে মনে হয় কত যেন খাঁটি সোনা কিন্তু তা না, যাকে বলে পয়ল! নম্বরের লম্পট—’

‘এই, দেখ ভাই একটু সমালে-সুমলে কথাবার্তা বলবে, আমি তোমার সঙ্গে ভদ্রতা রেখেই কথা বলছি, কিন্তু তুমি আমার বাবুকে লম্পট-টম্পট ডাকতে আরম্ভ করেছ, তোমাদের মেয়ের দোষটা দেখছ না।’

‘কেন দেখব’, মদনের গলার স্বর চড়ে গেল। ‘পাঁচটা জোয়ান ছেলের সঙ্গে বিলের ধারে জাল শুকোত ছুঁড়ি, গাব সেদ করত, পচা মাছের পেট খুলে রোদে ছড়িয়ে দিত, উছ একটা দিন কোনোরকম গোলমাল হয়নি, সোমথ মেয়ে, আর আমরা উঠতি বয়সের ছেলে-ছোকরার দল। লখিন্দরের তো একটুখানি ব্যবসা ন’, কত বড় বিল ছিল তার, কত মাছ, কত কর্মচারী, আমি পরাশর বোধন বাবু রসিক নটবর আরো কতজন কুস্তির সঙ্গে মিলেমিশে আমরা জাল শুকিয়েছি, জালে গাবের কষ মাখিয়েছি। তারপর মাছ ধরা, বিলের জলে হৈ-হৈ করে সাঁতার কাটা—কুস্তি ঠিক সঙ্গে আছে, কেউ বলতে পারবে না, তার গায়ে কারো হোঁয়া লেগেছে, কি এর ওর সঙ্গে ওর ফাজলামো ইয়ার্কি চলেছে—কতু পাতায় যেমন জল ধরে না, তেমনি এতগুলো বেটাছেলের সঙ্গে থেকেও ও ধম্মাহোঁয়ার বাইরে থাকত—আজ কিনা তোমার বাবুর কাছে গিয়ে অমন ফুলের মতন মেয়ে নষ্ট হয়ে গেল।’

‘গেল কেন ‘ওখানে,’ ঢেমনাও ছেড়ে কথা বলল না, ‘তোমাদের লখিন্দর মেয়েকে ঘুষ দিয়ে বাবুর কাছ থেকে বিলের খবরদারি চেয়ে নিয়ে গেছে। হুঁ, যুবতী মেয়ে দেখিয়ে বাবুর মন ভুলিয়েছে, ওদিকে বিল বেচে চল্লিশ হাজার টাকাও পেল, তবু কিনা তার বিলের নেশা—মেয়ের চেয়ে ঝিনুকডাঙার বিল বুড়োর কাছে বেশি আদরের, তবেই এখন বোঝ, চব্বিশঘণ্টা একটা জোয়ান ছুঁড়ি পুরুষ মানুষের কাছে থাকলে সেই পুরুষটারই কা মন চঞ্চল হতে কতক্ষণ—’

মদন মাথা নাড়ল।

‘তা না হয় বুঝলাম লখিন্দরের দোষ —তার টাকার নেশা, বিলের নেশা—বাবুর ঘরে মেয়েহলে নেই, মেয়েকে পাঠিয়েছিল বাবুর ঘর দোর গুহিয়ে দিতে, সময়মতো বাবুর খাওয়া হয় কিনা দেখাশোনা করতে, বাপের কথা কুস্তি ঠেলতে পারেনি, সরল মনে ওখানে গেছে, আর সুযোগ পেয়ে বাবু কিনা শাড়ি দিয়ে, জামা জুতো দিয়ে, ছনো কিরিম গন্ধ তেল মাখতে দিয়ে নষ্ট করে ফেলল। ওফ্ কাল সন্ধ্যাবেলা ইষ্টিশানে যাবার সময় বাগানের ভিতর সেই দৃশ্য দেখে পরাশরের কি অবস্থা, উহু, ইষ্টিশানে আর যাওয়া হল না তার, সোজা আমার কাছে চলে এল। হারিকেন ছেলে আনি তখন ঘরে বসে বানান করে করে মহাভারতখানা পড়তে চেষ্টা করছিলাম। ঘটনাটা পরাশর খুঁটিয়ে বলল, তারপর মাথার চুল ছিঁড়তে আরম্ভ করল। ঘরে খুঁটির গায়ে মাথাটা ঠুকল ছবার, তারপর সে কি কান্না! অঝোরে কান্না।

‘কেন, কাঁদছিল কেন? ওই ছোঁড়ার এত মনে লাগবে কেন?’
টেমনা কপাল কোঁচকাল।

একটু সময় চুপ থেকে মদন বলল, ‘আহা মনে হুঃখ হবে না। বলেন কি দাদা। ও য় কুস্তির ভালবাসত, অবশ্য মনে মনেই ভালবেসেছে, মুখ ফুটে কিছু বলত না লখিন্দরের মেয়েকে, শহরে ছেলেদের মতন তো আর মেয়েহলে নিয়ে বেলেলাপনা করতে শিখিনি আমরা, চোখে মুখে থৈ ফুটিয়ে কথা বলে মেয়ের মন ভেজাতেও জানি না, আমরা সবাই কুস্তিকে ভেতরে ভেতরে ভালবেসেছি, তবে কিনা পরাশরটাই বেশি পাগল হয়েছি’, কৈবর্তের ছেলে হলে হবে কি, ছবি আঁকে চমৎকার। দুদিন কুস্তির মুখটা এঁকে এনে আমায় দেখিয়েছে, সে পটল-চোখ, তল ফুলের মতো নাক, টুসটুনে ঠোঁট, একেবারে কুস্তির মুখ’—দম নিয়ে মদন আবার বলল, আর কাল চোখের ওপর সে দেখল কিনা

বাবুর বুকের ওপর কুস্তি মুখটা রাখছে, আর বাবু ঝাড় নামিয়ে ছু-ছু'বার—'

‘নষ্ট মেয়ে, নষ্ট মেয়ে—ওই ছুঁড়ি আমার বাবুকে ধারাপ করেছে, আমার বাবু ডাইনে বাঁয়ে তাকাত না—’ তেলের টিন তুলে নিয়ে চেমনা উঠে দাঁড়াল।

‘না দাদা ও কথা বলো না।’ মদনও দাঁড়িয়ে পড়ল। ‘তোমার বাবুর পরিচয় আমরা পেয়ে গেছি—পয়সার গরম, মন যা চাইছে করেছে, সেদিন নটবর গিয়েছিল বারাসতে মোকদ্দমার কাজে। নটবর নিজের চোখে দেখল, বাবু গট গট করে একটা সরাবের দোকানে গিয়ে ঢুকল, ছাঁ বিলাতি সরাবের দোকান, তারপর খবরের কাগজে মুড়ে এতবড় বোতল হাতে করে দোকান থেকে বেরিয়ে এল। তারপর ছাঁ চাকর ভটভটি গাড়িটা চালিয়ে গাঁয়ের দিকে ফিরল।’

‘ওষুধ কিনে এনেছে।’ চেমনা চোখ বুজে বলল, ‘বাবুর কোমরে বেদনা আছে, ওষুধ কিনতে বারাসত যায়।’

‘ঐ তো, এমন এক সাধের চাকর পেয়েছে বড়লোক মানুষটা, যা মনে ধরছে করে যাচ্ছে, কেন না মনিবের দোষ ঢাকতে চাকর হাজারগুণ মিছা কথা বলবে, বাবু বেশ ভালই জেনে গেছে। কাজেই—’

‘দেখ ভাই সামলে স্তমলে কথা বলবে, আর একবার তোমার সাবধান করছি, এমন চাকর চাকর বলবে না।’

‘বলব, একশোবার বলব, তোমার মতন পা-চাটা চাকর ছোটো আছে নাকি।’

‘তবে রে শালা।’ চেমনা বুঝি তেলের টিনটাই ছুড়ে মারছিল, মদন লাফিয়ে দূরে সরে গেল।

‘আমরাও দেখে নেব, বুঝলি রে শালা, ভজ্বতা করে এতক্ষণ দাদা দাদা বলছিলাম—’ দূরে গিয়ে মদন একটা হাত শূণ্যে উচিয়ে

গলা কাটিয়ে চিৎকার করতে লাগল। ‘তোকে দেখব, তোর বাবুকেও দেখব। তোর বাবুর ঘাড়ে কটা মাথা আছে আমরা সবাই মিলে দেখতে চাই। আমরা কৈবর্তর ছেলে, অশ্রায় সহ্য করব না, আমাদের গাঁয়ে বসে আমাদের একটা মেয়েকে নিয়ে—’ মদন লাফিয়ে লাফিয়ে গর্জন করতে করতে পাশের ধান ক্ষেতে নেমে গেল। তারপর ক্ষেতের আল ধরে দৌড়াতে আরম্ভ করল।

ঢেমনার গলার ভিতর তেতো লাগছিল। ছবার ওয়াক করে থুথু ফেলল। তারপর কেমন যেন টলতে টলতে হাটের দিকে এগোতে লাগল।

তাই বলো, গাঁয়ের ছেলে গাঁয়ের মেয়ে পীরিতির রস তারাও বোঝে। কেন বুঝবে না। ঐ রস সবাই বোঝে। হাস মুগী বোঝে না? গরু ছাগল বোঝে না? ফড়িং টিকটিকি বোঝে না?

তবে কিনা ওটা প্রকাশ করার ধরনধারণ, নিবেদন করার রীতি-নীতি এক এক জায়গায় এক একরকম। মানুষের একরকম, ফড়িং-এর একরকম, টিকটিকি আরশোলার আর একরকম।

না, এই জিনিসের রস ঢেমনা পায়নি। কেমন করে পাবে। সারা জীবন তাকে পেটের ভাবনা ভাবতে হয়েছে। নিজের পেট, বিধবা মায়ের পেট আবার ছোট ছোটো ভাইবোনের পেট। আর মাথার ঘাম পায়ে ফেলে কলকাতার রাস্তা চষে বেড়াতে হয়েছে। অন্নচিন্তা চমৎকার। আর কোনো চিন্তা তার কাছে ঘেঁষতে দেয় নি।

তবে কিনা লখিন্দরের মেয়ের কাছে সেদিন বানিয়ে একটা পীরিতের গল্প বলে ফেলল সে। তা-ও শেষ রক্ষা করতে পারল না।

অনেক ঘাটে ভেসে ভেসে এবার তো মোহানা পেলাম। তোমার
অন্ত রূপ, তোমার পীরিতির স্বাদ আলাদা।

—যরে বো আছে না?

—হঁ, আছে। সে তো বাঁধানো পুতুর পাতকুয়া, রোজ সেখানে
নাইতে ভাল লাগে? তুমি মুক্ত অব্যাহত, তুমি সমুদ্র, তাই এখানে
ডুব দিতে এলাম।

এত সব শুনেছে ঢেমনা, চোখে দেখেছে। অলিতে গলিতে রকে
ময়দানে পার্কে হোটেলের দরজায়, শুঁড়িখানার সামনে। শেষ দেখা
দেখেছিল সার্পেনটাইন লেনে। ফাল্গুন মাসে বৃষ্টি হয়েছিল। বাদলার
রাত ধমধম করছিল।

কিন্তু আজ যে সে অণু গল্প শুনল।

পা-চাটা চাকর, তোমায় শালা দেখে নেব। শুনে ঢেমনার
কপালের রগ কাঁপছিল, কান দিয়ে হক্কা ছুটছিল। মাথাটা বনবন
করে ঘুরছিল।

কিন্তু তারপর সব থেমে গেল। ভিতরটা শান্ত হয়ে গেল। তার
চোখের কোণায় জল এল। তাই তো, চাকরকে চাকর বলেছে, আর
তো কিছু বলেনি ছোঁড়া। বরং আর যা বলেছে, কোনদিন সে শুনেছে,
না দেখেছে? দেখেনি ঢেমনা, শোনেনি।

তার ইচ্ছা করছিল আবার কান পেতে গল্পটা শোনে, ছবিটা
দেখে।

দশটা তাগড়া জোয়ান ছেলে ছুটোছুটি করে ভাঙ্গের রোদে জাল
শুকায়, শুকানো জাল আবার জলে ছুঁড়ে মারে, বিলের কালো জলে
ছলছল শব্দ বাজে, তারা টানে, জালের সঙ্গে মাছ আসে, মাছের সঙ্গে
শামুক গুগলি পানা গ্যাওলা—দশটা ছেলের সঙ্গে একটা মেয়ে খাবলা
মেয়ে মেয়ে জালের মাছ আলাদা করে হাঁড়িতে তুলে রাখে।

তারপর শামুক গুগলি ছাড়িয়ে ধরাধরি করে এতবড় জাল ডাঙ্গায়
তুলে টান টান করে রোজে ছড়িয়ে দেয়। তারপর তারা জলে নেমে

সাঁতার কাটে, ডুব দেয়। ডুব দিয়ে সাঁতার কেটে দূরে চলে যায়, তারপর আবার ভেসে ওঠে। দশটা ছেলের সঙ্গে একটা মেয়ে, আঙনের মতন গায়ের রং। মেঘের মতন চুল। তারা মনে মনে তাকে ভালবাসে। মুখ ফুটে কেউ কিছু বলে না। ছোঁয়াছুঁয়ি নেই, চোখে ইশারা করতে কেউ জানে না। পদ্মপাতায় জলের মতন সকলের সঙ্গে মেয়ে হি-হি করে হাসে, সাঁতার কাটে। তারপর ডুব দিয়ে অনেক দূরে চলে যায়। তখন দশটা ছেলেও সাঁতার কেটে তাকে ধরতে পারে না, পিছনে ছোটে। এই তাদের খেলা।

রক নেই পার্ক নেই ময়দান নেই, চায়ের দোকান নেই সিনেমা নেই। আছে শুধু মাথার ওপর প্রকাণ্ড একটা নীল আকাশ। কালো ছলছল বিলের জল। আর জল পিপির ডাক।

তবু তারা তাকে ভালবাসে। লুকিয়ে তার ছবি আঁকে। পটল চেরা চোখ, তিল ফুলের মত নাক, পাকা গোলাপ জামের মতন টুসটুসে ঠোঁট।

এভাবে তারা বড় হয়েছে, নাকের নিচে ভোমরার পাখার মতন চিকন কালো গোঁফ গজিয়েছে, ছাতি পুরু হয়েছে, কাঁধের মাংস ডেলা বাঁধতে শুরু করেছে এক এক জনের। আর ঠিক এখনই তাদের কাঁদতে হল।

একলা পরাশর কাঁদছে না, বোধন বাসু রসিক মদন নটবর—সবাই কাঁদছে, মাথার চুল ছিঁড়ছে, ঘরের খুঁটিতে তারা মাথা ঠুকছে।

ভেলের টিন হাতে ঝুলিয়ে ঢেমনা জোরে পা চালান। চাকর গাল খেয়ে তার একটুও খারাপ লাগছিল না।

যেন বাড়িটা বড় বেশি ঝিমিয়ে পড়েছে। সূর্য ডুবেল। হাট থেকে ফিরতে দেরি করে ফেলল সে। ইচ্ছা করেই দেরি করল। তার মনে হচ্ছিল একটা পাপ পুরীতে ঢুকছে সে। তাই রান্নার তেল নিয়ে ফেরার সময় কতবার কত গাছতলায় দাঁড়িয়েছে, বসেছে। আর চিন্তা করেছে এভাবে আর কতদিন চলবে। আর যেন ধৈর্য রাখা তার পক্ষে সম্ভব হবে না। অনেক বাকুদ জমেছে। ভিতরে এবার সে ফেটে পড়ুক, দাউ দাউ করে আগুন ছড়িয়ে পড়ুক, নিমাইবাবু চমকে উঠে দেখুক, ছাবরের কাজ করে ঢেমনা শেষ হয়ে যাবনি, দরকার হলে মানুষটা তেজ দেখাতে পারে, প্রতিবাদ করতে জানে, মুখ ফুটে কথা বলতে পারবে, এই অশ্রায় সে সহ্য করবে না। দশটা কৈবর্ত ছোঁড়ার পক্ষ হয়ে সে তোমায় শিক্ষা দেবে, হুঁ, একটু আগে মদন ছোঁড়া যেমন শাসিয়ে গেল, কলকাতার বড় মানুষটার ঘাড়ে কটা মাথা আছে আমরা দেখে নেব।

উঠোনে পা দিয়ে ঢেমনা লক্ষ্য করল, বাবুর শোবার ঘরের দরজা ভিতর থেকে বন্ধ। সেখানে বাঁধা কুকুর ছোটো দাওয়ার সামনে বসে ধুঁকছে, মাঝে মাঝে কাঁইকুঁই আওয়াজ করে উঠে গায়ের মশা মাছি তাড়াতে চেষ্টা করছে।

রোদ নিবে যাওয়ার দরুন সারা উঠোনে একটা কালচে ছায়া ছড়িয়ে পড়েছে, নেবু ঝোপের ওদিকটায় যেন এখনি অন্ধকার জমতে আরম্ভ করল। ঘরের পিছনে পেয়ারা গাছে ক'টা পাখি তখনো কিচকিচ করছিল। অশ্রু সব পাখিরা বাসায় ফিরে ইতিমধ্যে শান্ত হয়ে গেছে।

ঢেমনার পায়ের শব্দ পেয়ে কুকুর ছোটো একবারে উঠে দাঁড়ায়। ঘনঘন লেজ নাড়তে থাকে, জিভ বুলিয়ে দিয়ে গলায় ঘড়ঘড় শব্দ করতে আরম্ভ করে অর্থাৎ ঢেমনা বাড়ি নেই, তাদের এতটা সময় বেঁধে রাখা হয়েছে, সময়মত কেউ খেতে দেয়নি, নিজেরাও ছোটোছুটি করে এদিক ওদিক শিকার খুঁজে নেবে তারও পথ বন্ধ—নানাকারণে

ভিতরে রাগ হুঃখ অভিমান চেপে রেখে ছুটিতে চূপচাপ বসে এতক্ষণ
শুমে মরছিল, ঢেমনার দেখা পেয়ে তারা খুশী হল, আশস্ত হল,
উদ্বেজিত হয়ে শরীর কাঁপিয়ে জিভ বার করে জোরে লেজ নাড়তে
শুরু করে দিল।

কিন্তু ঢেমনা ছ'জনের একজনের দিকেও তাকাল না। অল্প সময়
হলে ছুটে গিয়ে সে শিকল খুলে দিত, মাথায় পিঠে হাত বুলিয়ে
'রাজা' 'বাহাদুর' ছুই সর্দারকে আদর করত। তারা আনন্দে সোজা হয়ে
দাঁড়িয়ে তার কোমর আঁকড়ে ধরত, তার হাত চাটত, শরীর চাটত।

আজ ঢেমনার মনের অবস্থা অশ্রুধর্ম : চোখ লাল করে বাবুর
শোবার ঘরের দরজাটা এক নজরে দেখে সোজা রান্নাঘরের দিকে হেঁটে
গেল সে। দরজার শিকল তুলে গিয়েছিল, শিকল নামিয়ে পাল্লা ছুটো
কাঁক করতে ভক্ করে একটা পচা গন্ধ লাফিয়ে তার নাক উঠে এল।
কারণটা বুঝল সে, কখন সেই মুগী কুটে ফেলে রেখে গেছে। হলুদ
মুন মাখিয়ে রেখে গেলেও হ'ত, কিন্তু তা আর রাখা হয়নি। কাটা
মাংস বাসি হয়ে এখন খারাপ গন্ধ ছাড়তে আরম্ভ করেছে। করুক।
এই মাংস ঢেমনা খাবে না। যার জন্তু রান্না হবে তার ভিতরটাও
এমন পচা দুর্গন্ধময়।

সে ভেবেছিল নেবুতলার সেই বাদলার রাতের ঘটনার পর
মানুষটার খুবই লজ্জা হয়েছে, অনুতাপ এসেছে। কিন্তু এখানে এসে
ঢেমনা দেখল, কিছুই না। ভিতরটা একই রকম আছে। যেন আরো
খারাপ হয়েছে, আরো অধঃপতন হয়েছে। দিনকতক পরে একটা
পালিশ চড়িয়ে নিমাইবাবু ভালমানুষ সাজতে চেষ্টা করেছিল। ওপরের
সেই পালিশ দেখে ঢেমনাও কেমন ধাঁধার মধ্যে পড়ে গিয়েছিল।

এইজন্তু ঢেমনারও আজ কম অনুতাপ হচ্ছে না। তেলের টিন
নামিয়ে রেখে ভিজ্জে গামছা দিয়ে সে কপালটা মুখটা মুছল।

আশ্বিনের সন্ধ্যার শুমট আরম্ভ হয়েছে। যেন বৃষ্টি হলে ভাল
লাগত।

চোখ তুলে একবার সে জানালার বাইরেটা দেখল। অন্ধকারে গাছপালা ঝাপসা হয়ে গেছে। একটা ছোটো জোনাকী এর মধ্যেই বেরিয়ে পড়েছে।

যাবার আগে সে কাঠ কেরোসিন হাতের কাছে নামিয়ে রেখে গিয়েছিল। এবার সব টেনে নিয়ে উননে আগুন দিতে বসল।

ভাত চাপিয়ে বাটনা বাটবে, তেল মশলা দিয়ে মাংস মাখবে। ভাত ফুটে গেলে মাংস চাপাবে।

কাঠ ধরাবার জন্তু ঢেমনা দেশলাই খুঁজতে লাগল।

‘ঢেমনা!’

পাশের দরজাটা নড়ে উঠল। দাঁতে দাঁত চেপে ঢেমনা দেশলাই জ্বালল। কিন্তু ফস্ করে কাঠিটা নিভে গেল। বিরক্ত হয়ে আবার সে দেশলাইয়ের কাঠি ঘসল।

‘এই আমি ডাকছি, কানে যাচ্ছে না!’

এবার ঢেমনা চমকে উঠল। চেনা মানুষ, পরিচিত স্বর। কিন্তু তা হলেও তার মনে হল অজ্ঞ কেউ তাকে ডাকছে, সুরটা অস্বাভাবিক। জলতরঙ্গের বাজনার মতন মিষ্টি আওয়াজ মোটা হয়ে গেছে, ঘোলাটে হয়ে গেছে।

‘ঢেমনা!’

‘কি চাইছিস!’ বিরক্ত চোখে ঢেমনা দরজাটা দেখল। তারপর আর তার মুখ দিয়ে কথা সরল না। চোখ গোল হয়ে গেল।

‘কি দেখছিস, আমার মুখের দিকে তাকিয়ে আছিস কেন?’ অজ্ঞদিনের মতন ঠোঁট মোচড়ানো হাসি না। হি-হি করে হাসল কুস্তি।

চোয়াল ছোটো শব্দ করে রাখল ঢেমনা।

‘ইস্, মুখ দিয়ে কথা সরছে না, মুখে কুলুপ এঁটে রেখেছে। এই ঢেমনা!’

ঢেমনার বুক ঢেলে একটা গাড় নিশ্বাস উঠে এল। ঠিক এই

জিনিস সে আশা করেনি, এখানে আশা করেনি। গা টলছে মেয়েটার, চোখ দুটো ফোলা ফোলা। চুলের সাজ নেই, গায়ের কাপড় এলোমেলো ঢিলেঢালা, সায়াটা বেরিয়ে আছে, জামার বোতাম খোলা।

তবে কি—আর ভাবতে হল না কিছু। পরিকার একটা গন্ধ ঢেমনার নাকে লাগল, দাঁড়াতে পারছে না কুস্তি, চৌকাঠ আঁকড়ে ধরে গলাটা এদিকে ঝুঁকিয়ে দিয়ে খিল খিল করে হাসতে লাগল। ‘এমন করে চেয়ে আছিস মাইরি, মনে হচ্ছে তুই একটা বাঘ, সৌন্দর্য বনের বাঘ, যেন এখনি লাফিয়ে ঘাড়ে পড়বি, তারপর আমার রক্ত চুষে খাবি হি-হিহি-হি—’

‘এখান থেকে তুই সরে যা।’ গলার রগ ফুলে উঠল ঢেমনার, নাকের ডগা কুঁকচে গেল। তার কথা বলতে ইচ্ছা করছিল না কিন্তু না বলে যেন উপায় ছিল না। ‘মদ খেয়েছিস।’

‘এটুখানি,— একটুকুন, আমার আঙুলের একটা কড়ার সমান।’ একটা আঙুল ঢেমনার চোখের সামনে তুলে ধরে কুস্তি টেনে টেনে হাসতে লাগল।

‘কে দিয়েছে তোকে মদ?’

‘বাবু, তোর মনিব, এইটুকুন ঢোল দিয়েছিল কাচের গেলাসে, তুই বিশ্বাস কর।’

যেন কেউ ঢেমনার বুকে হাতুড়ি দিয়ে ঘা দিচ্ছিল।

‘তুই সরে দাঁড়া।’ ঢেমনা চৌকাঠের দিকে পা বাড়াল।

‘কোথায় যাবি?’ কুস্তি নাড়ে না, আর একটা হাত বাড়িয়ে দিয়ে দরজা আগলে রাখে। ‘এখন ওঘরে যেতে পারবি না।’

‘কেন!’

‘বাবু খাচ্ছে, গেলাস বোতলের ঠুনঠুন শব্দ শুনতে পাচ্ছিস না।’

‘বাবু খাচ্ছে কি খাচ্ছে না সে আমি দেখব। তুই আমার রাস্তা দে।’

‘ইস, এমন করছিস, যেন ক্যাপা বাঘ হয়ে আছিস, যেন একটা মানুষের ওপর লাফিয়ে পড়ে এখনি ঘাড় ভেঙে রক্ত চুষে খাবি।’

‘আমি বলছি তোকে, ভালয় ভালয় সরে দাঁড়া।’

‘উঁহু, ওখানে গিয়ে আমি তোকে হামলা করতে দেব না। যা বলার আমায় বল। আমার ঘাড় ভাঙবি—আমার রক্ত চুষে খাবি ? খা, খেয়ে ছাখ, একটুও নোনতা না, হি-হি লোকে বলে মানুষের রক্ত নোনতা। আমার রক্তে মিষ্টি মধু ছাড়া আর কিছু নেই। ছাখ, খেয়ে ছাখ।’ ফর্সা লম্বা গলাটা ঢেমনার মুখের সামনে বাড়িয়ে দিতে চেয়েছিল লখিন্দরের মেয়ে।

‘শয়তানী বজ্জাত মেয়ে!’ হাতটা সরিয়ে দিয়ে ঢেমনা পাশের ঘরে ঢুকে পড়ল।

না, পাশের ঘরে অর্থাৎ বাবুর শোবার ঘরে না, তার পাশে আর একটা ছোট ঘর অর্থাৎ যে ঘর কুস্তির জন্তু ছেড়ে দেওয়া হয়েছে সেখানে ছোট একটা টেবিলে বোতল গেলাস রেখে বাবু একলা চুপ করে বসে আছে। বাবুর হাতে একটা গেলাসে মদ টলটল করছে, ছোট একটা হ্যারিকেন জ্বলছে এক পাশে, বাবুর বাঁ হাতে সিগারেট জ্বলছে। পাশে একটা শূণ্য চেয়ার। বোঝা যায়, একটু আগে ওই চেয়ারে মেয়েটাকে বসিয়ে দিয়ে তার হাতে মদের গেলাস তুলে দেওয়া হয়েছিল। ঢেমনার পায়ের শব্দ শুনে বাবুর যেন চমক ভাঙল। নড়েচড়ে উঠল। কিন্তু ঘাড় ঘোরাল না। পিছনে কে এসে দাঁড়িয়েছে দেখল না।

‘কুস্তি এলি।’ বাবু তাই ভাবল। ‘চাকরের ঘরে এতটা সময় কী করিস শুনি?’

ঢেমনা জবাব দিল না । একটা গরম নিশ্বাস ফেলল ।

‘মাংস হয়েছে রে কুস্তি ?’

‘মাংস হবে না, মাংস চাপানো হয়নি ।’ ঢেমনা কথা বলল ।

এবার বাবু ঘাড় ফেরাল ।

‘অ, তুই ?’ গেলাসের পানীয়টুকু গলায় ঢেলে বাবু গেলাসটা টেবিলে রাখল । তারপর ভুরু কঁচকাল । ‘কেন হবে না কেন, সেই কখন মুগী কাটা হয়েছে, ছোলা হয়েছে—সারাদিন তুই করছিলি কী ?’

‘হাটে গিয়েছিলাম, তেল মশলা ছিল না ।’

‘অ, সারাদিন হাটেই কাটিয়ে এলি ।’

ঢেমনা উত্তর করল না ।

‘যা, ভূতের মতন দাঁড়িয়ে রইলি কেন—গিয়ে মাংস চাপিয়ে দে, আর ওই শালীকে কানে ধরে এঘরে পাঠিয়ে দে, ওখানে কী করছিল ?’

‘মাতলামী করছিল ।’

বাবু গলা কাঁপিয়ে হাসল ।

‘একটুখানি পেটে না পড়তেই ছুঁড়ি এমন আরম্ভ করেছে !’

‘তা তো করবেই ।’ আর সহ্য হল না ঢেমনার, গর্জন করে উঠল ।

‘তোমার এক পিপে গেলেও কিছু হয় না, তোমার কিছুতেই কিছু হয় না, তোমার লজ্জা নেই ভয় নেই, নেই সম্মান অসম্মান, ধর্ম অধর্ম পাপ পুণ্য শুবুদ্ধি কুবুদ্ধি—সব গুলে খেয়ে এখন এই পাড়া গাঁয়ে এসে বিষ ছড়াতে আরম্ভ করেছিস ।’

কিন্তু বাবু তাতে ঘামল না । বরং ঠোঁট বেঁকিয়ে হেসে গেলাসে আবার মদ ঢেলে দিল ।

তারপর বড় করে একটা চুমুক দিয়ে ঢুলুঢুলু চোখে ঢেমনাকে দেখল ।

‘হুঁ বল, খামলি কেন, বলে যা—’

ছোট ছিল, তার খেলার সাথী হয়ে তার সঙ্গে ঘুড়ি উড়িয়েছে, মাছ ধরেছে। অবাক লাগছিল তার, এখানে আসবার আগে এই মানুষ তার বস্তির নোংরা ঘরে ঢুকে তার ময়লা বিছানার ওপর চুপ করে বসে থাকত—একটি ক্লান্ত বিষণ্ণ মূর্তি, অমৃতাপে দগ্ধ হচ্ছে, জীবনের উৎসাহ আনন্দ হারিয়ে মনমরা হয়ে আছে, ধরে নিয়ে ঢেমনার ছশ্চিন্তা ছর্ভাবনার শেষ ছিল না, ভাবত সে কেমন করে বাল্যবন্ধুকে সাহায্য করবে, তার মনের স্বাভাবিক ক্ষুতি, মুখের সহজ হাসি ফিরিয়ে আনতে কী করা যেতে পারে, চিন্তা করে সে অস্থির হয়ে পড়েছিল।

‘হুঁ, এই মানুষ! তার ভেতরটা যে এত শক্ত এত নির্লজ্জ, এমন নিষ্ঠুর, যদি একদিন ঢেমনা টের পেত।

‘বেশ তো।’ ঢেমনা বুঝতে পারল তর্জন গর্জনে কাজ হবে না, উত্তেজিত হয়ে শয়তানকে বশ মানানো যাবে না, গলার স্বর খাদে নেমে এল তার, যেন হঠাৎ নিজেকে অস্বহীন দুর্বল অসহায় মনে করতে লাগল সে। ‘বেশ তো—’ একটা তেতো ঢোক গিলে ঢেমনা আস্তে বলল, ‘বাবার অনেক টাকা, আর সেই টাকা যখন ইচ্ছামতন ওড়ার স্বাধীনতা তোর আছে, কলকাতা ছেড়ে চলে এল কেন! সেখানে অনেক মেয়ে, ফুটি করার অনেক জায়গা ছড়িয়ে আছে।’

‘হুঁ, তা আছে, কিন্তু শেষটায় অসুবিধা কেন দাঁড়াল জানিস,’ আর এক ঢোক মদ গিলে নিয়ে নিমাই মাথাটা ঝাঁকিয়ে নিল, একটা সিগারেট ধরিয়ে ঢেমনার মুখের ওপর চোখ রেখে বলল, ‘সেদিন সার্পেন্টাইন লেনের ওরা ভালমানুষী দেখিয়েছিল ঠিকই, কিন্তু তলে তলে তারা পুলিশে খবর দিয়েছিল। হুঁ, বেলেঘাটা থানায় খবর পাঠিয়েছিল। এখন বেলেঘাটার ও সি হল বাবার যাকে বলে একেবারে হাতের লোক—কাজেই ব্যাপারটা সেখানেই চুকে গেল, কিন্তু তা হলেও বাবার কানে কথাটা উঠল, সেই শূয়ার ও-সিটা

হেসে হেসে এমনভাবে বাবার কাছে কথাটা তুলল, যেন এর আগেও আমি অনেক কেলেকারী করেছি, মাছি হয়ে কেবল ময়লার ওপর রাতদিন ঘুর ঘুর করা আমার স্বভাব, পুলিশের খাতায় আমার নাম রয়েছে, কাজেই আমার ভবিষ্যতের কথা চিন্তা করে এবং বাবার সুনামের কথা ভেবে ওই শালা মস্ত এক শুভানুধ্যায়ী সঙ্গে বাবাকে পরামর্শ দিতে লাগল যাতে দিনকতক কোথাও পাঠিয়ে দেওয়া হয়—

‘তারপর ?’

‘বাবা সরাসরি আমাকে মুখে কিছু বলত না, চুপ করে থাকত, বাবার চোখ ছোটোর দিকে তাকালে আমার কেমন কষ্ট হত।’

‘কিসের কষ্ট, তুই যদি বুড়োর মনের দিকে তাকাবি তো এখানে এসব করতিস না।’

‘তোমার মাথায় যদি ছটাক পরিমাণ বুদ্ধি থাকত।’ ঠোঁট বঁকিয়ে হাসল নিমাই। ‘চোখের ওপর বুড়ো মন খারাপ করে বসে থাকে, দেখে খারাপ লাগে না ? তাছাড়া আমার সবচেয়ে অসুবিধা হল, এই অবস্থায় যখন তখন টাকা চাইতে পারছি না, উল্ল মার কাছেও না, মা-ও মন খারাপ করে থাকত, কাজেই ঠিক করলাম, একেবারে ওদের গায়ের সঙ্গে লেগে থেকে আশ্রিত কিছু না করাই ভাল। দিনকতক দূরে সরে থাকি। ওই বুড়ো বুড়ি আর ক’দিন, চিন্তা করলাম। তারপর তো শালা আমিই সব।’

‘অ, হাতে টাকা থাকত না বলেই মুখ বেজার করে আমার কাছে গিয়ে বসে থাকতিস।’

‘তা তো বুঝতেই পারিস, ওটাই আসল জিনিস, টাকা ছাড়া আমার এক পা এগোবার উপায় আছে ? যে লাইন ধরেছি— হি-হি। তাই মাথায় বুদ্ধি এল, দেশে চলে যাই। চাষবাসের কাজ দেখব, মাছের চাষ করব, তখন আর টাকার অভাব হবে না।’

ডেমনা একটা গাঢ় নিশ্বাস ফেলল। চুপ করে থাকল কতক্ষণ।

‘হা, দাঁড়িয়ে রইলি কেন, গিয়ে তুই চট করে মুগীর ঝালটা

নামিয়ে দে, মাংস ছাড়া মদ জমে না।’ নিম্ন নতুন করে গেলামে মদ ঢালল। ‘আর কুন্তিকে এই ঘরে পাঠিয়ে দিবি।’ রান্নাঘরে দাঁড়িয়ে শালী করছে কি?’

ঢেমনার মাথার ভিতর আবার আগুন জ্বলে উঠল। গলার স্বর কঠিন হয়ে গেল। মুখটা বিকৃত করে ফেলল। ‘একটা কথা তোকে আমি না বলে পারছি না। নিম্ন, তোর বাবার অনেক টাকা, তুই যেভাবে খুশী ওড়া, আমার কিছু বলবার নেই—কিন্তু এই নিরীহ মেয়েটাকে তুই নষ্ট করলি কেন, বাপটাকে টাকা দিয়ে ভুলিয়ে মেয়েটাকে কাছে রাখলি তোর ঘরে কাজকর্ম করবে বলে, আর সুযোগ পেয়ে তুই—’

‘আমি তো বলিনি, আমি ডেকে আনি নি লখিন্দরের মেয়েকে। মেয়ে নিজে থেকে এসেছে। হুঁ, স্বার্থের খাতিরে বাবাই গরজ করে মেয়েটাকে রেখে গেল, আমার খাওয়া পরা দেখবে, ঘরদোর গুছোবে—’ সবকটা দাঁত বের করে নিমাই হাসল। ‘মাইরি, তুই একবার চিন্তা করে ছাখ ঢেমনা, আমার কিছুই দোষ নেই, পতঙ্গ যদি ধেয়ে ধেয়ে আলোর কাছে আসে—’

‘চুপ কর রাফেল! স্বার্থের খাতিরে লখিন্দর মেয়েকে এ বাড়ি রেখেছিল তোর ঘরের কাজকর্ম করবে বলে, যেমন মানুষ ঝি-চাকরানী রাখে—তোর সুখ সুবিধার জন্য ওকে এখানে রেখে গিয়েছিল। কিন্তু লখিন্দর জানত না যে, তুই মেয়েটাকে তোর বিছানায় তুলে নিবি, তাকে জোর করে ধরে মদ খাওয়াবি—’

‘ওফ্, তোর দেখছি খুবই লাগছে, কেন, কাজকর্ম করতে তুইই তো আছিস। একটা মানুষের ক’টা ঝি চাকর লাগে?’

‘হুঁ, আমি তো চাকর আছিই, আমার ডিউটি আমি ঠিকই করে যাচ্ছি।’ ঢেমনা আবার দাঁতে দাঁত চেপে ধরল। যেন কেউ ছুরি দিয়ে তার হৃৎপিণ্ডটা কেটে তছনছ করছিল। অথচ যন্ত্রণা জানাতে একটু চিৎকার করতে পারছিল না সে। যেন এতবড় ধৈর্যের পরীক্ষা

জীবনে আর সে কোনোদিন দেয়নি। ‘হঁ, বুড়ো কর্তাকে যখন কথা দিয়ে এসেছি, যতক্ষণ আমি এখানে আছি কাজ করেই খাব, কাজ না করে একমুঠো ভাতও আমি মুখে তুলব না—মালিককে রেঁধে বেড়ে খাইয়ে তারপর চাকর খায়, এই নিয়ম আমি ঠিকই মেনে চলেছি, তবে কিনা। পাড়ারগাঁয়ের একটা সরল মেয়ের এমন সর্বনাশ করলি। তা-ও ছেলের মেয়ে, নিজের রুচি, মান মর্যাদা কোথায় নামিয়ে এনেছিস অবাক হয়ে ভাবি।’ একসঙ্গে এতগুলি কথা বলে ঢেমনা হাঁপাতে লাগল। নিমাই শব্দ করে হাসল।

‘আমার সব কিছুতেই রুচি আছে—শহরের মেয়ে গাঁয়ের মেয়ে, হাতের কাছে পেল আমি কোনো মেয়েই বাদ দিই না। আর মেয়েছেলের ব্যাপারে মান-মর্যাদার ধার আমি কমই ধারি।’

‘তোমার মুখের দিকে তাকাতেও আমার ঘেন্না করছে।’ ঢেমনা অশ্রু দিকে চোখটা সরিয়ে নিল।

‘ঘেন্না করে তাকাবি না’, এবার নিমাই হাসল না। ‘তোব তো এ ঘরে আসবার কথা না—তোমার যা কাজ তাই কর গে, আমায় নিরিবিলি খেতে দে—কুস্তিকে এঘরে পাঠিয়ে দে।’

‘কিন্তু বুড়োকর্তাকে গিয়ে আমি কী বলব? কর্তা বিশ্বাস করে আমায় এখানে পাঠিয়েছিল।’ ঢেমনার চোখদুটো ধকধক করে উঠল। যেন নিজের মনে সে কথা বলছিল। ‘তখন কি জানতাম তাঁর লায়েক ছেলের ভেতরটা এত জঘন্য, এত নোংরা আর সেই ছেলের জামীনদার হয়ে গরুর মতন আমি এখানে ছুটে এলাম।’

‘বুড়োকর্তাকে তোমার কিছুই বলতে হবে না। আমার দায়িত্ব আমি নিজেই নিতে জানি। তোমার না পোষায় তুই ফিরে যা, গিয়ে আবার রুটির গাড়ি ঠেল। এত কথা এখানে বলবি না।’

‘যাব না, যাবার জন্ম আসিনি।’ ঢেমনা গর্জন করে উঠল। নিমাইয়ের চোখের দিকে চোখ রেখে উত্তেজনায় কাঁপতে লাগল।

যেন তার শরীরের সব কটা শিরা উপশিরা চামড়া ঠেলে বেরিয়ে আসছিল। একটা হাত শূন্যে তুলে সে নাচাতে আরম্ভ করল। ‘আমি শেষ পর্যন্ত এখানে থাকব—থেকে দেখব, তোর ধর্ম তোকে কোথায় টেনে নিয়ে যায়। একদিন মহাবিপদে পড়েছিলি, আমি বাঁচিয়েছিলাম। আজ ভুলে গেছিস—আজ’, ডেমনার গলার স্বর হঠাৎ খাদে নেমে এল, যেন সমস্ত উত্তেজনা চোখের নিমেষে দলা পাকিয়ে তারপর গলতে আরম্ভ করল। দু হাতে চোখ তেকে সে হাট হাট করে কেঁদে উঠল। ‘একটা চাকরের অধম হয়ে ছিলাম এখানে, আর আজ কিনা মুখের ওপর বলছিস, তুই চলে যা, কলকাতায় ফিরে গিয়ে কুটির গাড়ি চালা।’

‘এই ঘাখো, সেক্টিমেন্টাল ফুস।’ ডেমনার তর্জন গর্জন শুনে তারপর মানুষটাকে কাঁদতে দেখে নিমাই ভুরু নাচিয়ে ঠোট বেঁকিয়ে নতুন করে হাসতে আরম্ভ করল।

‘একটা কথার কথা বললাম, তুই না হয় কলকাতা ফিরে যা, আর অমনি ওটাকে ঠিক ধরে নিয়ে—অথচ আমি জানি তুই চলে গেলে আমাকে যেমন অশুবিধায় পড়তে হবে, রীতিমত আমাকে বিপদে ফেলে দিয়ে চলে যাওয়া হবে, কেমন ঠিক বলছি কিনা।’ ডেমনার মুখের দিকে তাকাল নিমাই। যেন তাকে সাস্থনা দিল। চোখ থেকে হাত নামিয়ে ডেমনা একচোখে মেঝেটা দেখছিল।

‘আর তুই যদি মনে করিস’, নিমাই বলে চলল, ‘ওই যে বললি জেলের মেয়ে—চিরকাল আমি তাকে গলার মালা করে রাখব, তো আমার ওপর ভয়ানক অবিচার করা হবে ডেয়ু। ঠিক দু’দিন, দুদিন থেকে চারদিন, বাস, তারপর রসটুকু খাওয়া হয়ে গেলে আখের ছিবড়ে যেমন লোকে ছুঁড়ে ফেলে দেয়, আমিও ফেলে দেব, ছেড়ে দেব, তুই নিজের চোখে দেখবি।’

‘ওফ্, শয়তান, কতবড় শয়তান তুমি নিমাইবাবু, মেয়েটার সর্বনাশ করে তারপর আখের ছিবড়ের মতন ছুঁড়ে ফেলে দেবে—

‘আ, আর আমি দাঁড়িয়ে থেকে তাই দেখব।’ মাথাটা ছবার ঝাঁকিয়ে
ঢেমনা লাফ দিয়ে ঘর থেকে বেরিয়ে এল।

‘এই শোন শোন!’ নিমাই পিছনে ডাকল। ঢেমনা শুনল না,
দাঁড়াল না, শোবার ঘর পার হয়ে রান্নাঘরের দরজায় এসে দাঁড়াল।
চৌকাঠের কাছে শুয়ে পড়েছে কুস্তি। ওদিক থেকে কেরোসিনের
ডিবির লাল আলোটা এসে মুখে পড়েছে। পাতলা ঠোট দুটো
সামান্য ছড়ানো, তাই ছোট একটা হাঁ হয়ে আছে মুখটা, দুটো চোখ
বোজা, ঢেমনা মুয়ে মুখের কাছে মুখটা নিয়ে তখনই আবার সোজা
হয়ে দাঁড়াল। অঘোরে ঘুমোচ্ছে ছুঁড়ি। নেশার ঘুম। মাথার
গোছা গোছা চুল মাটিতে লুটোচ্ছে, হাঁটুর কাছে সায়াটা সরে গেছে,
শিশুর মতন নির্লোম মসৃণ চকচকে একটা হাঁটু। এখন ঘুমন্ত অবস্থায়
ওকে কত ছোট, কেমন অবোধ অসহায় মনে হচ্ছে, যখন সামনে
দাঁড়িয়ে কথা বলে, মনে হয় সাংঘাতিক একটি পাকা সেয়ানা মেয়ে,
যেন পৃথিবীর সব কিছু বোঝা হয়ে গেছে, জানা হয়ে গেছে—আসলে
যে ও কত অজ্ঞান কত অবুঝ, এখন বোঝা যায়। ঢেমনার বুক
ঠেলে একটা দীর্ঘশ্বাস উঠল। তাই তো, অবোধ না হলে এখানে
এসে ক’দিনের মধ্যে শয়তানের পাপচক্রে নিজেকে এমন জড়িয়ে
ফেলল—।

ঢেমনা আবার মুয়ে মুখের কাছে মুখটা নিয়ে গেল। একটা
বাদলা পোকা উড়ে এসে কুস্তির গালে বসেছে। আঙুলের
টোকা দিয়ে ঢেমনা পোকাটা সরিয়ে দিল। গালে তার হাত
ঠেকল। কুস্তি জাগল না। বরং যেন ঠোট দুটো আর একটু ছড়িয়ে
দিয়ে স্বপ্নের ঘোরে একবার হাসল।

ছুটে দিন বেশ একটু ব্যস্ততার মধ্যে কাটল নিমাইবাবুর। ছুটে ছুটে কলকাতা গেল আবার ফিরে এল। যেন স্টেশনে গিয়ে ট্রেন ধরার সময় থাকে না। ধৈর্য থাকে না। মোটর বাইক ছুটিয়ে ভোর বেলা বেরিয়ে গেছে, বিকালে ফিরে এসেছে। শ্রান্ত ঘর্মাক্ত চেহারা। টেমনার সঙ্গে চোখাচোখি হলে চোখটা নামিয়ে নেয়। জিজ্ঞেস করলে বলে, জরুরী কাজে কলকাতা যেতে হয়েছিল। একদিনই টেমনা জিজ্ঞেস করেছিল। জরুরী কাজটা কী টেমনা আর জানতে চায় নি। এমনিও তার সঙ্গে বাবু কথা বলছে না। যেন সেদিন রাতে কথা কাটাকাটি চটাচটি হবার পর এটা হয়েছে। রাগ হয়েছে বাবুর? অভিমান? টেমনার যেন মনে হয় অভিমানই হয়েছে। কেননা কুস্তির সঙ্গে মাতামাতির মাত্রাটাও যেন বেশ কমে গেল। তেমন কথায় কথায় তাকে ডাকছিল না, শোবার ঘরে অনেক রাত পর্যন্ত আটকে রেখে হাসাহাসি ফিসফিস গুজগুজ করছিল না। না, সন্ধ্যার পর বোতল নিয়ে বসতেও বাবুকে আর দেখল না টেমনা। হুঁ, অভিমান করেছে, হয়তো ভিতরে ভিতরে একটু লজ্জাও পেয়েছে। টেমনা তো ছেড়ে কথা বলেনি। যতটা বলার সে বলেছে। তার পরেও যদি মানুষের চোখ না খোলে—লজ্জা না হয়—

কাজেই টেমনা একটু নিশ্চিন্ত হল। হয়তো বাবু নিজেকে শোধরাতে চেষ্টা করছে।

‘বাবু এমন ছুটে ছুটে কলকাতা যাচ্ছে কেন রে টেমনা?’

‘আমি জানি না।’

‘আমার যেন মনে হয় একটা কিছু মতলব এঁটেছে—’

‘জিজ্ঞেস করলেই পারিস।’ টেমনা চোখ তুলল না। রান্নাঘরের লাগোয়া পেয়ারা গাছটার ছায়ায় বসে সে কাঁঠ কাটছিল। ছুদিনের মধ্যে একবারও ছুঁড়ি তার সামনে আসেনি। কারণটা টেমনা ঠিক

বুঝতে পারছিল না। না কি বাবু তেমন ঘন ঘন ডাকছেন, আদর-
টাদর করছে না বলে মনে দুঃখ হয়েছে, একলা শুয়ে কাটাচ্ছে নিজের
ঘরে? যেন তেমন একটা সাজগোজ করতেও দেখা যাচ্ছে না।
কথায় কথায় তেমনার সামনে ছুটে এসে আর রং ঢংও করছে না।
তেমনা খুশী। এবার যদি বজ্জাত মেয়ের চোখ খোলে।

এসব খেলা যে ছুদিনের, এই আমোদ ফুটি শখ আহ্লাদ সাজ
পোশাক খাওয়া দাওয়া সবই বালির ওপর দাঁড়িয়ে, হুঁ, যে কোনো
মুহুর্তে পায়ের নিচের বালি সরে গেলে পাতালের অন্ধকারে ডুবে যেতে
হবে, লখিন্দরের মেয়ে তাহলে বুঝতে আরম্ভ করেছে। নাকি মদ
খেয়ে মাতাল হয়ে তেমনার কাছে ধরা পড়ে গিয়ে ছুঁড়ি দমে গেছে?
হুঁস হওয়ার পর বুঝতে পেরেছে এই লজ্জার শেষ নেই? তারপর
তেমনার সামনে আর মুখ দেখানো চলে না? শত হোক গেরস্থ ঘরের
মেয়ে সে, কুমারী। বাবুর পয়সায় জামা কাপড় পুরুক কি মুখে ক্রীম
পাউডার মাখুক—হুঁ, না হয় একটা আংটিও বাবু উপহার দিল—
কিন্তু এভাবে তার সঙ্গে একত্র বসে মদ খাওয়া? কোন জাতের
মেয়েরা এসব করে?

অর্থাৎ তেমনার কাছে কিছুই ঢাকাচাপা রইল না, সব বুঝে গেছে
সে, চাকর—কিন্তু তা হলেও তো পুরুষ, একটা জোয়ান ছেলে—আর
একটা পুরুষের সঙ্গে কুকীর্তি করে তারপর তার সামনে এসে দাঁড়িয়ে
কথা বলতে ছুঁড়ির লজ্জা তো করবেই, নিশ্চয় ভয়ও করছে এখন।

‘তেমনা!’

‘আমার সঙ্গে তুই কথা বলবি না—আমি কাজ করছি।’

অনুদিন হলে কুস্তি এর মধ্যেই হেসে কুটিকুটি হত, ঠোঁট মোচড়
দিয়ে বলত, ‘তুই আমায় হিংসে করিস, কেন যে তুই আমায় দেখতে
পারিস না—’ কিন্তু আজ আর হিংসে করবে কি, কাঠ কাটা বন্ধ রেখে
চোখ তুলে একনজরে দেখে তেমনা বুঝল, বাসি ফুলের মতন মুখটা
সিঁটিয়ে গেছে। চুল ঝাঁকনি, যেন কাল থেকে মাথায় তেল দিচ্ছে

না, চিকুনি লাগাচ্ছে না, গায়ে ময়লা জামা, পরনের শাড়িটাও ময়লা, চোখে কাঁজল নেই, পায়ে আলতা নেই।

মনে একটু কষ্ট হল ডেমনার। ‘হুঁ, কি বলছিস শুনি?’ কুস্তির চোখ দুটো দেখল ডেমনা।

‘বাবু আমায় কী বলল জানিস?’

‘কী বলল?’

‘কলকাতা থেকে নতুন খাট জাক্জিম আসছে, টেবিল চেয়ার আলনা সব আসছে।’

শুনে ডেমনা খুব একটা অবাক হল না। এখানে এসে গাঁয়ের ছুতোর দিয়ে চলনসই গোছের কটা আসবাব তৈরী করিয়ে নেওয়া হয়েছিল। বাবুর যদি এখন আবার কলকাতার দোকান থেকে নতুন দামী আসবাব কিনে আনার ঝোঁক চাপে, তো কিছু বলার নেই। পয়সা আছে, সব কিছুই সাজে তার।

‘তা আশুক না নতুন খাট জাক্জিম—তাতে আমার কি?’ একটু চুপ করে থেকে আরো দুখানা কাঠ কেটে ফেলল ডেমনা, তারপর কুস্তির দিকে চোখ তুলল। ‘তোরা জম্মও খাট-টাট আসবে নাকি, টেবিল চেয়ার আলনা?’

ক্যাল ফ্যাল করে কুস্তি ডেমনার মুখটা দেখল। তারপর আশ্বে মাথা নাড়ল। ‘আমার কথা কিছু বলেনি—আমার সঙ্গে দুদিন ধরে কথাই বলছে না একরকম। কাল বিকেলে বলল, ডেমনাকে দিয়ে বড় ঘরটা পরিষ্কার করিয়ে রাখবি, পুরনো খাট টেবিল চেয়ার সব বের করতে হবে—কলকাতা থেকে নতুন খাট জাক্জিম টেবিল সব আসছে।’

‘আমায় কিছু বলেনি।’ চোয়াল দুটো শক্ত করে ফেলল ডেমনা। ‘আমায় কিছু বলেনি, কাজেই ওসব নাড়াচাড়া করতে পারব না।’

‘আমায় বলেছে তোকে বলতে।’

‘বলুক গে।’ থুথু ফেলল ডেমনা। তারপর আবার কথানা কাঠ

কেটে চেনা করল। তারপর আবার কুস্তির চোখ দুটো দেখল।
'আমার আর এখানে থাকার ইচ্ছে নেই, চাকরি ছেড়ে দেব।'

'কেন।' কুস্তি একটা ঢোক গিলল।

'ইচ্ছে করে না, তার আবার কেন কি—ভাল লাগে না।'

'মাইনে-পস্তুর বুঝি ঠিকমত পাচ্ছিস না?'

ঢেমনা চুপ করে রইল। যেন কালো চোখ দুটোর ভিতর আজ
একটা উদ্বেগের ছায়া দেখল সে। যেন ঢেমনার জ্ঞান ছুঁড়ির মায়া
হচ্ছে। তাই কি?

মুখটা শক্ত করে রেখে ঢেমনা মাথা নাড়ল। 'মাইনে-পস্তুর পাব
না কেন—ওটা ঠিকই পেয়ে যাচ্ছি—আসলে এই পাপের মধ্যে বাস
করতে ইচ্ছে করছে না।'

'কেন, পাপ কেন?' একটু অদাক হতে গিয়েছিল লখিন্দরের
মেয়ে। তখনি মুখটা ফ্যাকাশে হয়ে গেল। যেন কী একটা
কথা ভাবল। অশ্রুদিকে চোখটা ফিরিয়ে নিল।

'এই পাপের মাঝখানে থাকতে গা ঘিনঘিন করছে।' ঢেমনা
আর একবার গলা বাড়িয়ে থুথু ফেলল।

কুস্তি এদিকে চোখ ঘোরাল।

'তুই কি আমাকে খোঁচা দিয়ে কথাটা বলছিস?'

ঢেমনা উত্তর না দিয়ে কাঠ কাটায় মন দিল।

'তাই তো বলি', যেন এবার কুস্তি নিজেকে কথা বলতে লাগল,
'আমি এখানে আছি, তোর একেবারে সহ্য হচ্ছে না। হিংসেয়
ভেতরটা পুড়ে যাচ্ছে।'

'আমার কি, আমার কিছু যায় আসে না।' ঢেমনা চোখ না তুলে
পারল না। 'তুই নিজের পায়ে কুড়ুল মারছিস, নিজের সর্বনাশ নিজে
করছিস।'

'বেশ করছি।' ফ্যাকাশে মুখ শক্ত করে ফেলে ছুই চোখে
বিদ্যাতের ঝিলিক তুলল কুস্তি। 'তোর বুক পুড়ছে কেন, চাকর

চাকরের মতন মুখ বুজে কাজ করে যাবি, তোর এসব দিকে চোখ দেবার কথা না।’

ঢেমনা বুঝল সাপের তেজ একটুও কমেনি, ওদিক ছুঁয়ে কথা বললেই ফৌস করে উঠছে। চুপ থেকে মাথা গুঁজে সে কাঠ কোপাতে লাগল।

কুস্তি চুপ করে থাকল না, যেন আর একবার নিজে নিজে কথা বলতে লাগল।

‘বাবু আমার সঙ্গে ভাল করে কথা বলছে না, কারণ কি, না ঢেমনা রাগারাগি করে, বিরক্ত হয়। বললাম, চাকর—তার রাগারাগিতে কী এসে যায়।’

‘তাই তো,’ এবার ঢেমনা না হেসে পারল না। ‘তাতে বাবু কী বলল?’

‘কী আবার বলবে, আমিই বললাম, ওটাকে মেরে তাড়িয়ে দিন, ভাত কাপড় আছে, তার ওপর মাসে মাসে মাইনে দিয়ে এমন শত্রু পুষে লাভ কি, আমার জ্ঞে যদি ওর চোখ টাটায়—’

‘কী বলল বাবু?’ তেতো মতন একটা ঢোক গিলল ঢেমনা, তা হলেও সব কটা দাঁত ছড়িয়ে মুখের হাসিটা ধরে রাখল।

নাকের ডগা কুঁচকে কুস্তি অন্যদিকে চোখটা সরিয়ে নিল। যেন ঢেমনার হাসিটা তার সহ্য হচ্ছিল না।

‘কী বলল বাবু?’ ঢেমনা আবার বলল, ‘আমায় মেরে তাড়িয়ে দেবে?’

‘দেয় কি না দেয় দেখবি। আমায় নিয়ে বাবুর সঙ্গে খোঁচাখুঁচি—মজা টের পাবি।’ কুস্তি আর দাঁড়ায় না। হাঁটতে থাকে।

‘এই শোন!’ ঢেমনা ডাকল।

কুস্তি গুনল না।

‘আমার মনে হয় এখান থেকে তোর চলে যাওয়া ভাল।’ গলা বড় করে ঢেমনা বলল, ‘এই পাপপুরী ছেড়ে না গেলে তোকে একদিন

কুস্তি আর দাঁড়াল না। দাঁতে দাঁত ঘষে ঢেমনা চুপ করে থাকল।
ভিতরে বিষ ঢুকেছে ছুঁড়ির, এই বিষ সহজে ছাড়ানো যাবে না, ভাবল
সে। ভেবে একটা দীর্ঘশ্বাস ফেলল।

কথাটা ঠিকই। পরদিনই লরী বোঝাই হয়ে কলকাতা থেকে নতুন
খাট টেবিল চেয়ার আয়না আলমারী এসে গেল। কত ভাল কাঠ,
কেমন চমৎকার পালিশ সব আসবাবের। যেন আয়না, মুখ দেখা যায়।

উহুঁ, ঢেমনাকে কিছুই করতে হল না।

কলকাতা থেকে মিস্ত্রী এসেছে, দুটো কুলী এসেছিল সঙ্গে।
তারাই টেনেটুনে ধরাধরি করে ঘরের পুরনো জিনিসপত্র বের করে
ফেলল, তারপর নতুন আসবাব দিয়ে ঘর সাজাল। সত্যি, তাকিয়ে
দেখার মতন একটা খাট, দুটো মানুষের হাত পা ছড়িয়ে শোবার
মতন খাট, টেবিলটাও দেখবার মতন, কতবড় একটা আরশি
টেবিলের সঙ্গে। সামনে দাঁড়ালে একটা মানুষের পায়ের নখ থেকে
চুলের ডগা পর্যন্ত দেখা যায়।

একটু পরেই আর একটা লরী বোঝাই হয়ে সোফা সেট
আরামকেদারা ডাইনিং টেবিল কার্পেট পাপোষ পর্দা আরো সব কী
কী যেন এসে গেল। হুঁ, সেই সঙ্গে জাজিম তোষক লেপ বালিশ
মশারী। সব নতুন। এবং সব যেন দামী জিনিস।

ব্যাপার কি। তা হলে তো একটা মতলব বাবুর মাথায় আছে
ঠিকই। ঢেমনাকে যেমন কিছু বলছে না, তেমনি কুস্তিকেও কিছু
বলছে না।

নতুন জিনিসপত্র দিয়ে শোবার ঘরখানা মনের মতন করে সাজিয়ে
গুছিয়ে রেখে বাবু আবার কলকাতা ছুটে গেল।

সেই ফাঁকে কুস্তি একবার এঘরে ঢুকে ঘুরে ঘুরে সব দেখল। আরশি-বসানো টেবিলটার সামনে দাঁড়িয়ে নিজের মুখ ও শরীরটা দেখল। জানালার কাছে গিয়ে চমৎকার নক্সা করা পর্দাগুলি দেখল। ঘরের মেঝেয় কার্পেট বিছানো হয়েছে, তার ওপর দিয়ে কুস্তি একটু হাঁটল। একটা জানালার নিচে সোফা বসানো হয়েছে। সোফার উপর ছ'হাঁটু একত্র করে একটু সময় বসল।

এমন সময় ঢেমনা এসে দরজায় ঊকি দিল।

‘কি দেখছিস?’

কুস্তি ফ্যালফ্যাল করে ঢেমনাকে এক নজর দেখল, তারপর ঘাড় গুঁজে চুপ করে রইল।

ছুঁড়ি সত্যি মনমরা হয়ে আছে। ঢেমনার কথায় মাঝে মাঝে ফৌস করছে ঠিকই, আবার যেন কেমন মিইয়ে পড়ছে।

‘তোকে কি কিছুই বলছে না?’ ঢেমনা আরো কাছে গিয়ে দাঁড়ায়।

কুস্তি মাথা নাড়ল।

‘তোকে কিছু বলছে না?’ কুস্তি পাল্টা প্রশ্ন করল।

‘নাঃ।’ ঢেমনা মাথা নাড়ল।

তারপর হুজনেই চুপ করে থেকে চোখ ঘুরিয়ে ঘুরিয়ে ঘরের জিনিসগুলি দেখতে লাগল।

‘নতুন কাপ ডিশ এসেছে, দেখছিস?’

কুস্তি ঘাড় নাড়ল। তারপর আঙুল দেখিয়ে বলল, ‘আর ওই দ্রাখ তাকের ওপর রূপোর থালা গেলাস বাটি।’

‘উহু’ রূপোর না।’ তাকের বাসনগুলি একনজর দেখে ঢেমনা তখন হাসল। ‘এসব হল স্টেনলেস স্টীলের বাসন। আজকাল কলকাতার বাবুরা খুব ব্যবহার করেছে।’

কুস্তি বলল, ‘টেবিলে ফুলদানী, ফুল সবই এসে গেছে।’

ঢেমনা বলল, ‘নতুন সাবানের বাস, মাথার তেল পাউডারের ডিবি আয়না চিরুনি আলতা দেখতে পাচ্ছিস?’

কুস্তি ঘাড় কাত করল।

‘আমার মনে হয় তোর জন্মেই সব আসছে।’ আন্দাজে ঢিল
হোঁড়ার মতন ঢেমনা কথা বলল।

কুস্তি ঠোট ওন্টাল।

‘ধেং। তা হলে বাবু আমায় কাছে ডাকত, বলত, সব পছন্দ
হয়েছে কিনা ঢাখ্।’

‘ডাকবে, পরে ডাকবে, এখন আমার ওপর রেগে গিয়ে চুপ করে
আছে, আমার ওপর শোধ তুলবে বলেই তোকে নতুন করে—আরো
পাকাপোক্ত করে এই সংসারে বসাবে, দেখছিস না, ডবল খাটের
বিছানা এসেছে, মেয়েমানুষের মাথার চিকনি আলতা তেল সব
এসে গেছে।’ যেন ভিতরে জ্বালা নিয়ে ঢেমনা হ্যা হ্যা করে হেসে
উঠল।

তাই কি? উৎসাহে আশায় লখিন্দরের মেয়ের চোখ দুটো
ঝিলিক দিয়ে উঠতে চেয়েছিল, কিন্তু সঙ্গে সঙ্গে আবার ফ্যাকাশে
হয়ে গেল।

‘না না, তুই বাবুর মন বিষিয়ে দিয়েছিস। তুই যেমন করে
বলেছিস, পাঁচটা জেলের সঙ্গে কেলেকারি করে, হুঁ, সব কটা হোঁড়ার
মাথা চিবিয়ে খেয়ে শেষ করে তারপর এখানে এসে বাবুর মাথাটা
চিবিয়ে খাচ্ছি—কাজেই বুঝতে পারছিস, তারপর বাবু আর আমাকে
এ সংসারে আমল দেয় কখনো? মনে হয় না। বলছিল, একটা
চাকরের মুখে এতসব অপমানের কথা তোর জন্মে শুনতে হল।’

আকাশ থেকে পড়ল ঢেমনা। হাসবে কি কাঁদবে বুঝতে পারল
না। হাঁ করে তাকিয়ে থেকে ছুঁড়ির মুখটা দেখল একটু সময়।
তারপর একটা বড় নিশ্বাস ফেলল। শয়তান ঠিক এভাবেই তো
কথাটা তুলবে, নিজের দোষ ঢাকতে। অর্থাৎ ঢেমনা সেদিন রাতে
যেমন বলেছিল, একটা গাঁয়ের মেয়েকে নষ্ট করেছে নিমাই। সরল
মেয়ে, তাই দুটো শাড়ি জামা দিয়ে ভুলিয়ে ভালিয়ে তার জীবন

ধ্বংস করেছে—উহঁ, জেলের মেয়েটাকে সেসব শোনাতে যাবে কেন
তুই, বরং উল্টো করে সব কথা বলবে। বলেছে। হাতের মুঠো
ছুটো শক্ত হয়ে উঠল ঢেমনার।

‘তুই আমার দিকে তাকা কুস্তি।’ ঢেমনা গাঢ় গলায় ডাকল।

‘বল শুনছি।’ কুস্তি চোখ তুলল না। মাটির দিকে চেয়ে রইল।

‘সে হল আসল শয়তান, আমি চিনি তাকে, অনেক দুষ্কর্ম করে
বেড়ায় কলকাতা শহরে, এখন গাঁয়ে এসে বিষ ছড়াচ্ছে, আমি তাকে
বলেছি সেদিন, তুই একটা নিরীহ কুমারী মেয়ের জীবন নষ্ট করতে
উঠে পড়ে লেগেছিস, অত্যন্ত অশ্রায় করেছিস এটা, এ জিনিস বন্ধ
কর, এ পাপ সহ্য হবে না।’

ছহাতে মুখ ঢেকে কুস্তি চুপ করে রইল।

‘কাজেই আমার ওপর শয়তানের রাগ,’ একটু চুপ করে ঢেমনা
আবার বলল, ‘আমাকে তুই বিশ্বাস কর - ঠিক এই কথাই তোর
বাবুকে সেদিন বলেছি, আর তুই তাকে এখন বলেছ অশ্র বকম,
বলবেই। নিজে সাধু সজ্জ থাকছে—এদিকে আমার ওপর তোর
বিদ্বেষটা আরো বেড়ে যাবে - বুঝলি না? এক ঢিলে তুই পাখি
মারা হল।’

কুস্তি এবার কথা বলল না।

‘কাজেই তোকে বার বার বলছি, আগেও বলেছি, এখান থেকে
তুই সরে যা—এই পাপপুরী থেকে পালিয়ে যা। তার মতলব ভাল
না।’ ঢেমনা একটা লম্বা নিশ্বাস ছাড়ল। ‘নতুন করে এত সব
জিনিসপত্র কেন আমদানী করা হচ্ছে ঈশ্বর জানে।’ যেন শেষের
কথাটা ঢেমনা নিজের মনে বলল।

‘তুই সত্য কথা বলেছিস কি বাবু সত্য কথা বলেছে, আমি কেমন
করে বুঝব।’ মুখ থেকে হাত সরিয়ে কুস্তিও একটা লম্বা নিশ্বাস
ছাড়ল। তারপর চোখ ঘুরিয়ে আবার নতুন খাট টেবিল আলনা
আলমারী সব দেখতে লাগল।

তাই বলো! সন্দেহ দূর হচ্ছে না লখিন্দরের মেয়ের, বিশ্বাস দানা বাঁধছে না। ছুঁড়ির মনের ভাব বুঝতে পারল ঢেমনা। নতুন খাট বিছানা তেল আলতার শিশি তাকে হাতছানি দিচ্ছে— ঢেমনা মনে মনে হাসল অথচ বুক ফেটে যাচ্ছিল তার হৃৎথে রাগে অপমানে আক্রোশে। মুখে সে তার কিছু বলল না। আন্তে আন্তে ঘর থেকে বেরিয়ে এল। দেখা যাক, ভাবল সে তখন, যদি এতদ্রুবে তোর জন্তাই আনা হয়ে থাকে, তোকে বাবু আবার নতুন করে এ ঘরে ডাকে, তবু বোঝা যাবে একটা লোকের কাছে ছুঁট খাঁটি সত্য আছে। কিন্তু তাই বা কতটা সত্য হবে কে বলবে, বাতাসের আগে শয়তানের মন নড়াচড়া করে। ঝোপ বুঝে কোপ বসাতে তার মতন ওস্তাদ এই ছুনিয়ায় আর কেউ আছে নাকি।

পরদিন দুপুরে ঢেমনা আবার চাঁপাডাঙ্গার হাটে ছুটল। আজ আর শুধু তেলের টিন হাতে না, ঘিয়ের ভাণ্ড এবং বড় বেতের ধামাও সঙ্গে নিয়েছে। ঘি গরমমশলা পেঁয়াজ রসুন বড় সাইজের নৈনিতাল আলু, মাংস, যদি গলদা চিংড়ি পাওয়া যায় তো গলদা চিংড়ি এবং টুকিটাকি আরো অনেক কিছু—এতবড় ফর্দ নিয়ে ঢেমনা হাটে চলেছে।

বাবু আজ সকালে নিজের হাতে ফর্দ তৈরি করে দিয়েছে। ভাল দৈ মিষ্টি গাঁয়ের হাটে পাওয়া যায় না। বাবু কলকাতা থেকে সেসব নিয়ে আসবে। ফর্দ তৈরি করে দিয়েই মোটর বাইক ছুটিয়ে বাবু কলকাতা চলে গেছে। বিকাল নাগাদ ফিরবে, সঙ্গে একজন আসবে।

রাত্রে খাবে। কাজেই সেভাবে রান্নাবান্না হবে। কি কি রান্নাতে হবে তা-ও বাবু বলে গেছে। মাংস হবে, ছোলার ডাল হবে, বেগুন ভাজা পটল ভাজা, গলদা চিংড়ির মালাই-কারী আর নয়তো পাকা কুই বা কাতল এনে মাছের কালিয়া এবং চাটনি। তবে ভাত রান্না হবে না। যে মানুষ সঙ্গে আসছে রাত্রে তার ভাত চলে না। ময়দা খায়। কাজেই পরটা হবে। আজ কলকাতা থেকে আসার সময় বাবু ভাল ঘি সঙ্গে নিয়ে আসবে। আজকের মতন হাটের ঘি দিয়েই কাজ চালাতে হবে। কেননা, যদি কোনো কারণে বাড়ি এসে পৌঁছাতে তাঁদের রাত হয়ে যায় তো তখন পরটা ভেঙ্গে দিতে গেলে খাওয়ার দেরি হয়ে যাবে। অসময় হয়ে যাবে। বাবুর তেমন কিছু অশুবিধা হত না, কিন্তু যে আসছে তার অশুবিধা হবে।

তাই তো, কে আসছে, যেন খুবই একটা মাণ্ডগণ্য উঁচুদরের মানুষ, একেবারে নেমস্তনের মতন খাওয়া দাওয়ার আয়োজন, অথবা খুবই যেন পেয়ারের মানুষ, বন্ধুটুকু হবে কেউ। ঢেমনা চিন্তা করল। এখন হাটে যাবার সময় রাস্তায় নতুন করে কথাটা ভাবছিল সে এই জ্ঞা, যিনি সঙ্গে আসছেন তিনি যেন ঠিক একরাত কি একদিন থাকবার জ্ঞা আসছেন না। দু চারদিন থাকবেন। বেশিও থাকতে পারেন। পনেরো দিন কি একমাস—নাকি আরো বেশি, বোঝা যাচ্ছে না। ঐ যে কলকাতা থেকে ঘি আসছে, রাত্রে কুটি পরটা খাবেন, আজ রাতটা এখানকার ঘি দিয়েই কাজ চালাতে হবে। এ থেকেই ঢেমনা ধরে ফেলেছে, বেশ কদিনের জ্ঞাই তিনি আসছেন।

আমুন ক্ষতি নাই। তারটা কিছু খাবে না, তার ঘরে শোবে না। ঢেমনার বাড়ি না এটা যে, অতিরিক্ত একটা মানুষ এসে থাকছে বলে সে প্যানপ্যান ভ্যানভ্যান করবে, বিরক্ত হবে।

তবে প্যানপ্যান করার, বিরক্ত বোধ করার সূচনা দেখা যাচ্ছে। অতিরিক্ত একটা মানুষ এসে থাকতে আরম্ভ করলে কাজকর্মও বেড়ে যাবে। দু পদ বেশি রান্নাতে হবে, স্নানের জল তুলে রাখতে হবে,

মুখ ধোবার জল তুলে রাখতে হবে, তারপর কাপড়টা কেচে গামছাটা ধুয়ে দেওয়া—উহ, একলা হাতে এত কাজ, এত খাটনি ঢেমনার পোষাবে না। টাকা বাড়িয়ে দিতে হবে। ছুদিন দেখবে ঢেমনা—যদি বোঝে মানুষটা এখানে থেকেই যাচ্ছে তখন ঢেমনা বাবুর কাছে তার মাইনে বাড়াবার কথাটা তুলবেই, তুলতেই হবে। এসব ব্যাপারে চুপ থাকলে চলবে না।

চুপ করে থাকলে চাকরবাকরের ঘাড়ের ওপর বাবুরা পা রাখতে চায়। এখন আর সেদিন নেই। এই তো কলকাতা শহরে রাত দিন লাগঝাওয়ার মিছিল বেরোয়, মাইনে বাড়ো, দাবি মেটাও, কথায় কথায় মিছিল, কথায় কথায় সভা। না হলেই কাজ বন্ধ, ঘেরাও—সুবিধা না পেলে কত্তাদের ধরে ধরে ধোলাই দেওয়া।

‘হেই দাদা—’

ঢেমনা চমকে উঠল। কেউ ডাকছে। ছ পাশে ধান ক্ষেত, পাট ক্ষেত। মাথার ওপর আশ্বিনের ছপূরের গনগনে রোদ নিয়ে আকাশটা যেন গরম কড়াই হয়ে আছে। একটা গরুর গাড়ি দেখা যায় না, গরুটা ছাগলটাও চোখে পড়ছে না, মানুষ তো নয়ই, শূন্য ভুবন খাঁ খাঁ করছে। এই অবস্থায় হঠাৎ কেউ ডাকছে শুনলে গা হমছম করে ওঠে।

তবে ঢেমনা সাহসী হলে, ছট করে কোনো কিছুতে ঘাবড়ে যাওয়া তার খাতে নেই। শক্ত হয়ে দাঁড়াল সে। বুঝল সেদিনের সেই ছাতিমগাছটার কাছে এসে গেছে। এখানেই মদন ছোঁড়া তাকে শাসিয়েছিল। জায়গাটা চিনতে তার কষ্ট হল না। তাছাড়া ছ’দিন চারদিন পরপরই তো গাঁয়ের এই বাঁধানো সড়ক ধরে সে চাঁপাডালার হাটে নয়তো নীলগঞ্জের হাটে কি আরো দূরে যেতে হলে কমলপুরের হাটে ছুটছে। বাবুর খাওয়ার তো কিছু কমতি নেই, পয়সা আছে, কাজেই জিভটাও এত বড়—রোজই মাছটা চাই, ডিমটা চাই। একদিন বাদ গেল তো পরদিনই আবার মূর্গী। ডাল

ভরকারি একেবারে রোচে না, কাঁধেই ঢেমনার হয়রানি। ছুটে ছুটে যাওয়া।

এক মিনিট দাঁড়িয়ে থেকে ঢেমনা ছাতিমগাছটার দিকে এগোতে লাগল। রোদের ঝাপটায় প্রথমটায় গাছতলার ছায়ায় কালো কালো মানুষগুলিকে সে ভাল দেখতে পায়নি। এখন দেখতে পেল। কারণ ওই ছায়ার দিকে চোখটা রেখেই সে এগোচ্ছিল। গাছের গুঁড়ির কাছে ছড়ানো শিকড়ের ওপর উবু হয়ে চার পাঁচজন বসে আছে, না আরো বেশি, আট-দশজন। কেমন যেন বাঁদরের সভা বসে গেছে ওখানটায়। ব্যাপার কি?

‘আমায় ডাকছেন?’ তিন চার হাত দূরে থাকতে ঢেমনা দাঁড়িয়ে পড়ল।

‘হ্যাঁ গো দাদা, হ্যাঁ তোমার জুতাই তো পথ চেয়ে বসে আছি সব। আজ হাটবার, চাঁপাডাঙ্গার হাটে যাবে তুমি—’ দুজন হি হি করে হেসে উঠল।

মদনও রয়েছে। ঢেমনা চিনতে পারল। আর কারো মুখ সে চেনে না। সবাই এক সঙ্গে দাঁড়িয়ে পড়েছে। উদ্যম গা। হাঁটুর ওপর গামছার মতন ছোট ছোট কাপড় পরনে। পায়ে কাদা, গায়ে ছিটে ছিটে শুকনো কাদার দাগ। যেন জলকাদা ঘাঁটছিল তারা কতক্ষণ আগে। এখন কাদা শুকিয়ে সাদা রং ধরেছে। নাকের নিচে ভোমর পাখার মতন কালো ফিনফিনে গোঁফ, ছড়ানো বুকের ছাতি, কাঁধের মাংস গুলি বাঁধতে আরম্ভ করেছে। হুঁ, ঢেমনা তাকিয়ে তাকিয়ে দেখল, জোয়ান তাগড়া ছেলে, মদনের বয়সী সব।

‘আমায় কিছু বলবে ভাই তোমরা?’

‘হুঁ, এক সঙ্গে পাঁচটা গলা হেঁকে উঠল। ‘বলব বলেই তো তীর্থের কাকের মতন সব বসে আছি।’

‘বলো।’ ঢেমনা শুকনো ঢোক গিলল। কাঁধের গামছা দিয়ে

কপালের ঘামটা মুছল। ‘বলো ভাই কী বলার আছে, বলে ফেল, আমার ফিরে গিয়ে রান্নাবান্না আছে, বাড়িতে অতিথি আসবে।’

‘রাখো তোমার অতিথি।’ সেই ছেলে, যার নাম মদন, চোখ লাল করে উঠল। ‘খুব দরকারী কথা আছে তোমার সঙ্গে।’

‘আহা, বলো না, আমি তো দাঁড়িয়েই আছি।’ ঢেমনা চটল না। ঘিয়ের ভাণ্ড ও বেতের ধামাধা মাটিতে নামিয়ে রাখল। আবার কাঁধের গামছা দিয়ে বেশ করে গলাটা মুছল, ঘাড় মুছল। ‘কি হল চুপ করে আছ সব?’

একবার এক সঙ্গে সবাই হেঁকে উঠে আবার চুপ করে আছে। চুপ করে থেকে একজন আর একজনের মুখ দেখছে। যেন তার পর কী বলার আছে তারা বুঝতে পারছে না।

‘এই পরাশর, তুই বল না।’ কালো চেহারার একটা ছেলে মদনের ঠিক পিছনেই দাঁড়িয়ে ছিল। বড় ভাসা ভাসা চোখ। কোঁকড়ান চুল মাথায়। বাঁশির মতন চমৎকার একখানা নাক। মদন ঘুরে দাঁড়িয়ে তার কনুই ধরে বাঁকুনি দিল। ‘তোরা জিনিস, তুইই তো বলবি, ইনিকে বল কী বলবি, ইনিই মনিবই তো তোরা কুস্তিকে আটকে রেখেছে।’

ছেলেটি কিন্তু চোখ তুলে ঢেমনার দিকে তাকাতে পারল না। কেমন যেন একটা লাজুক হাসি ঠোঁটে লুকিয়ে পায়ের নিচের মাটি দেখতে লাগল।

এই মুখচোরা ছোড়াই তা হলে সেই পরাশর। ঢেমনা ভাল করে চেহারাটা দেখল। হুঁ, লখিন্দরের মেয়েকে লুকিয়ে লুকিয়ে ভালবাসে, লখিন্দরের মেয়ে নাকি সে-খবর জানে না। লুকিয়ে ছোড়া কুস্তির মুখের ছবি আঁকে। এই অবধি ক’শো ছবি আঁকল কে জানে।

‘বল না কী বলবি।’ আর একটি ছেলে পরাশরের কাঁধ ধরে জোরে বাঁকুনি দিল। ‘দাদাকে সুবিধেমত যখন পাওয়া গেছে তখন ব্যাপারটা আজই আমরা পরিষ্কার করে কেলতে চাই।’

ভাসা ভাসা চোখ দুটো তুলে পরাশর একবার সরাসরি ঢেমনার মুখের দিকে তাকাল। একটা ঢোক গিলে বলল, ‘দাদা, তোমার বাবুর কাজটা কি ঠিক হচ্ছে, আমাদের গাঁয়ের মেয়ে, আমাদের খেলার সাথী, আজ কিনা সেই মেয়েকে আমরা চোখের দেখাটাও দেখতে পাই না।’

‘তা যা বলেছ ভাই কথাটা ঠিকই।’ সুরটা নরম করে ঢেমনা বলল, ‘লখিন্দরের মেয়ে এখন বলতে গেলে চব্বিশঘণ্টাই ওবাড়ি আছে। জিনিসটা আমার চোখেও ভাল ঠেকছে না। তবে কিনা শুনছি, ওর বাবা যেমন বলে দিয়েছে তাই করছে। মেয়ে বাবুর ঘরদোর গুছায়—সময়মত বাবুকে খেতে দেওয়া, বিছানা করে দেওয়া, স্নানের জল এগিয়ে দেওয়া, বাবুর জামা জাপড় ঠিক করে রাখা—সবই প্রায় তাকে দেখতে শুনতে—’

‘রাখো দাদা রাখো—’ একটু বেশি বয়স হোঁড়ার, ধ্যাবড়া নাক, কপালে একটা মস্ত কাটা দাগ, মাথায় বাবড়ি, সকলের পিছনে ছাতিম গাছের গুঁড়ির সঙ্গে পিঠ ঠেকিয়ে দাঁড়িয়ে ছিল এতক্ষণ, কথাবার্তা শুনছিল, এবার লাফ দিয়ে ঢেমনার সামনে এসে দাঁড়াল। ‘আমার সঙ্গে বোধ করি দাদার সাক্ষাৎ পরিচয় নেই, আমার নাম নটবর—হুঁ কথা হচ্ছে কি, ওই যে বললে, বাবুর বিছানা করে দেওয়া, চানের জল, মুখ ধোবার জল এগিয়ে দেওয়া, জামাকাপড় ঠিক করে রাখা—ব্যাপার ঠিক সেখানেই থেমে থাকে নি, ব্যাপার আরো অনেক দূর গড়িয়েছে—আমরা সব জানি, আমরা সব জেনে গেছি। জল এর মধ্যেই বেশ ঘোলা হয়ে গেছে—একটা পাড় মাতাল তোমার বাবুটি, আর সেই মাতালের খপ্পরে পড়েছে আমাদের কুস্তি—’

‘দেখ ভাই, আমি হলাম গিয়ে একটা চাকর—বাজার হাট করি, কাঠ কাটি জল তুলি, রান্না নামাই—আমি তো মুখ ফুটে কিছু বলতে পারি না—আমি হু-কথা বললে বাবু আমায় তাড়িয়ে দবে, তখন আর এক জায়গায় আমাকে চাকরি খুঁজতে হবে, তা-ও কতদিনে চাকরি খুঁজে পাব তার ঠিক কি, তোমরা বরং লখিন্দরকে যদি বুঝিয়ে বলো,

সোমস্তু একটা মেয়েকে ওখানে রাখা ঠিক হচ্ছে না, তবে বুঝি কাজ হয়—’

‘না না, লখিন্দরকে অনেক বোঝানো হয়েছে, ও শালা বিষয় আসয় টাকাকড়ি ছাড়া আর কিছু চেনে না। আমাদের কথা কানেই তোলেনা। আমরা ঠিক করেছি লখিন্দরকে এক ঘরে করব—’

‘হুঁ, তাই কর।’ ঢেমনা খুশী হয়ে ঘাড় কাত করল। ঘিয়ের ভাণ্ড ও বেতের ধামাটা হাতে তুলে নিল।

‘উঁহু, কেবল ওই বলে তোমার কেটে পড়লে চলবে না।’ মদন গলা চড়িয়ে দিল। ‘তুমি সেদিন তোমার বাবুর হয়ে খুব ঝগড়া করে গেছ। বলছিলে একটা মস্ত সাধু পুরুষ তোমার বাবু, সাধু কি একটা লম্পট সে আমরা বুঝে গেছি—আমাদের আর বুঝি ও না, তা যাক গে, তোমার বাবু তোমার থাক—এখন কথা হচ্ছে, তুমি আমাদের কুস্তিকে ওখান থেকে বের করার ব্যবস্থা কর তো—’

‘আমার কথা কি ও শুনবে!’ ঢেমনা প্রথমে মদন, তারপর বাকি সকলের মুখের দিকে বেশ একটু করুণ চোখে তাকাল।

‘শুনবে, আলবৎ শুনবে।’ সবাই একসঙ্গে চৈচিয়ে উঠল। ‘তুমি বুঝিয়ে বলবে, বলবে যে পরাশর মদন নটবর, সবাই তোমার ওপর ক্ষেপে গেছে, ভাল চাঁও তো এই বাড়ি ছেড়ে নিজের ঘরে ফিরে যাও।’

‘আমি কিন্তু ভাই তোমার কথা শুনে সেদিন গিয়ে ওকে বুঝিয়েছিলাম,’ মদনের দিকে চোখ ফিরিয়ে ঢেমনা অল্প হাসল, ‘গাঁয়ের লোক নিন্দা করছে—তোমার বয়সটা কম, কুমারী মেয়েছেলে, একটা আইবুড়ো বাবুর ঘরে রাতদিন এভাবে থাকাটা ঠিক না—’

‘তখন কুস্তি কী বলল?’ এবার পরাশর গলা বাড়িয়ে প্রশ্ন করল।

‘ঐ এক কথা, বাবার কথায় এখানে এসেছি।’

‘বাবার কথায় এসেছি?’ চোখ লাল করে নটবর বলল, ‘বুড়োকে

‘আমরা শীগগিরই জব্দ করছি, ভালরকম শিক্ষা দিচ্ছি। একঘরে হয়ে থাকবে সে, মেয়েকে তুমি ভাই কথাটা জানিয়ে দিও।’

‘আর গাঁয়ের লোকের কথা বলবে না, গাঁয়ের মানুষ নিন্দা করছে বলে কিছু লাভ হবে না, বলবে গাঁয়ের ছেলেরা—আমি মদন নটবর রান্না সুখা—আমরা সব একজোট হয়েছি—আমরা ভয়ানক রেগে গেছি তার ব্যবহারে, আমরা কোনোদিন আশা করিনি যে একটা লোক, আমাদের চোখে প্রায় বিদেগী, কলকাতার মানুষ, পয়সা আছে বলে লখিন্দরের মেয়ে তার পায়ে কামড় খেয়ে পড়ে থাকবে, আমাদের কথা একবারও মনে পড়ছে না।’ একলা পরাশর কথাগুলি বলল। বলতে বলতে তার গলাটা কেমন যেন ভেঙে গেল।

কোমর থেকে গামছা খুলে গামছার খুঁট দিয়ে চোখের কোণা মুছল পরাশর।

সব একসঙ্গে চুপ করে রইল।

একটা দমকা বাতাস ছাড়ল একতু সময়ের জন্ত। মাথার ওপর ছাতিম গাছের পাতার ঝরঝর শব্দ শোনা গেল। রাস্তার কিছু ধুলোবালি উড়ল। তারপর আবার সব থেমে গেল।

‘শোন ভাই’, নটবর বলল, ‘ওভাবে ছুঁড়িকে বুঝিয়ে কাজ হবে না। তুমি এখনই হাট সেরে বাড়ি ফিরে গিয়ে তাকে বলবে, আজ শুক্রবার, কাল শনিবার রাত হবার আগেই ওবাড়ি ছেড়ে তাকে চলে আসতে হবে। যদি না আসে তো আমরা দশটা জোয়ান ছেলে দা সড়কি লাঠি হাতবোমা সব নিয়ে গিয়ে ওবাড়ি হামলা করব, গিয়ে হিড়হিড় করে কুস্তিকে ঘর থেকে টেনে বার করব, যদি কেউ বাধা দেয়—তো বুঝতেই পারছ, রক্ষা পাবে না, ধড় থেকে মুণ্ডটা কেটে আলাগা করে তুবে নিয়ে আসব—বোমা মেরে ঘরবাড়ি উড়িয়ে দেব—আমরা ছেলের ছেলে, কৈবর্তের ছেলে, পাপ করি না, পাপ দেখলে তা সহ্যও করি না।’

‘আর আমরা ক্লেপে গেলে স্বয়ং ডাক্তার আমাদের রুখতে পারবে না, এই কথাটাও দাদাকে জানিয়ে রাখলাম।’ গলার রং ফুলিয়ে মদন ঢেমনাকে কথাটা শুনিয়ে দিল।

‘ঠিক আছে, আমি বলব, আমি এখনি যায়ে লখিন্দরের মেয়েকে জানিয়ে দেব।’ ঢেমনার শরীর নড়ে উঠল, যেন হাঁটবার জন্ত এক পা বাড়িয়েও দিল।

‘আর শোনো, তোমার কোনো ভয় নেই, তোমাকে যখন আমরা দাদা বলে ডেকেছি—আমরা ভাবব তুমি আমাদের সাহায্যই করছ।’

‘না না, আমি ভয় করব কেন—আমি এখানে কেউ না, চাকর—বরং তোমাদের কুস্তিকে আমি একদিন বলেছিলাম, লোকে নিন্দা করছে।’ এক সেকেন্ড থেমে থেকে যেন একটু ভয়ও পেয়েছে, চোখমুখের এমন একটা ভঙ্গি করে ঢেমনা অযথা হাসল তারপর কি যেন চিন্তা করে পরে বলল, ‘বাবুকে আর কিছু বলব না তাহলে?’

‘উঁহ, কিছু বলতে হবে না ওই বদমাসকে, বললে পান্টা চোখ লাল করবে, থানা পুলিশ দেখাবে—’ নটবর একদলা থুথু ফেলল। ‘যদি দেখি কুস্তি কালকের মধ্যে বেলাবেলি ওখান থেকে বেরিয়ে না এসেছে তো আমরা সাজবাতি লাগার সঙ্গে সঙ্গে ওবাড়ি গিয়ে চড়াও হব—গিয়ে ওই কম্পার্টের সামনেই লখিন্দরের মেয়েকে ঘর থেকে টেনে বার করব। যদি শালা আমাদের মুখের ওপর একটা কথা বলতে আসে তো মাছ কাটার দা দিয়ে কুপিয়ে শালাকে সেখানে শেষ করব।’

ঢেমনা অশ্রুদিকে চোখটা সরিয়ে নিল। কেন না নটবর হাত নেড়ে কেমন করে দা দিয়ে কুপিয়ে একটা মানুষকে কাটতে হয়, ঢেমনাকে বোঝাতে চাইছিল।

‘বলে কি না থানা পুলিশ, আমরা কৈবর্তের ছেলে, মার পেট থেকে বেরিয়েই রক্ত দেখি, দা দেখি, সড়কি বল্লম কাকে বলে চিনে রাখি—’

‘আচ্ছা ভাই’, কাকুতির সুরে ঢেমনা বলল, ‘এবার আমাকে ছেড়ে দিতে হয়, বেলা আর বড় বেশি নেই, বাজার করে নিয়ে কিরে গিয়ে আমায় রান্না চাপাতে হবে—অতিথি আসবে বাড়িতে ।

তারি আর শব্দ করল না । চূপ করে রইল । ঢেমনা লম্বা পা ফেলে হাটের দিকে ছুটল । ‘তাই হবে’, মনে মনে সে বলল, যেন নিমাইবাবুকে উদ্দেশ্য করে কথাগুলি বলল, ‘এভাবে যদি তোমার শিক্ষা হয়—শিক্ষা মানে কি, শিক্ষা তোমার কোনোদিনই হবে না, তোমার কপালে অশমুভা লেখা আছে, কলকাতার মেয়েছেলে নিয়ে টগাটলি আমোদকুর্তি না, এখানে সাপের গর্ত হাত ঢুকিয়েছ । ছোবল খাবেই ।’

বেলেবাটার কুঞ্চুড়া ফুলগাছওয়াল চারতলা বাড়িটার ছবি মনে পড়ল ঢেমনার । হুঁ, দোতলার বাগান্দায় বুড়া বসে আছে । বুড়ার ঠাণ্ডা স্থির ঘোলাটে চোখ দুটো দেখতে দেখতে ঢেমনা এক সময় হাটের ভিড়ে মিশে গেল ।

তাজ্জব বনে গেল ঢেমনা । আবার সেই অবস্থা মনের । হাসবে কি কঁাদবে সে বুঝতে পারছিল না । বাড়ি ঢুকবার সময় বাগানের মালী ভূষণার মুখে কথাটা শুনল । এই তো, একটু আগে বাবু কলকাতা থেকে ফিরেছে । একলা না, সঙ্গে মেয়েছেলে আছে । ভূষণার মুখের দিকে হুঁ করে কতক্ষণ তাকিয়ে রইল ঢেমনা । কেমন দেখতে, কত বয়স ? বয়সটা ঠিক মালুম করতে পারছে না ভূষণ । ‘তবে কিনা যুবতী মেয়েছেলে, দেখতে শুনতেও মন্দ না । লম্বা চওড়া, টগটলে একছোড়া গোখ, মাথায় চুলটুলও বেশ আছে । বাহারের শাড়ি পরনে । পায়ে জুতো । হাতে কুচকুচে কালো

চামড়ার ব্যাগ।’ ভূষণার কলকাতা যাওয়া-আসা আছে। তার মামা সেখানে হোটেল চাকরি করে। কাজেই ভূষণা সবটা বর্ণনা চোখ বুজে এককথায় সেরে ফেলল, ‘মনে হয় যেন একটা কলেজের মেয়েকে ভটভটি গাড়ির পেছনে বসিয়ে এই মাত্র শহর থেকে ফিরল।’

ঢেমনার মাথায় ধামা ভর্তি সওদা, হাতে ঘি়ের ভাণ্ড, বলতে গেলে সাজবাতি একরকম লেগে গেছে, গাছপালা কালচে রং ধরল, ঝাঁ ঝাঁ ডাকছিল, বাগানের পিছনটায় জোনাকী পোকাকার নড়াচড়া আরম্ভ হয়েছে। হাট থেকে ফেরার সময় খুব একটা ছুটেই আসছিল সে। আশ্বিনের ছোট দিন। কিন্তু দেখতে দেখতে যে অন্ধকার হয়ে যাবে কে জানত। কাজেই এতটা পথ ছুটে আসার দরুন ঢেমনা ঘামছিল। অথচ ঠাণ্ডা হাওয়া ছাড়ছে, পায়ের নিচে ঘাস ভেজা লাগছিল।

কপালে পিঠে চাপ চাপ ঘাম নিয়ে ঢেমনা ভিতরের উঠানে ঢুকল। উঠানে পা দিয়েই বাবুর ঘরের দামী জানালার ঝলমলে পর্দা দেখে সে বুঝল, ভূষণা মিছে কথা বলেনি। বাবুর ঘর যেন হাসছে। তা-তো হবেই। আজ আর হারিকেন না, হড় হাজারক বাতিটা জ্বালানো হয়েছে, ভিতরের ঝকমকে সাদা আলোর চেহারা দেখে টের পাওয়া যায়। পর্দার ওপর দিয়ে এতটা আলো এসে পড়ে উঠানের খানিকটাও ঝলসে দিয়েছে।

সওদা নিয়ে ঢেমনা সোজা রান্নাঘরের দিকে চলে গেল। জায়গাটা অন্ধকার। রান্নাঘরের দরজায় একটা আবছা ছায়া মূর্তি চূপ করে দাঁড়িয়ে আছে। ঢেমনাকে দেখে নড়েচড়ে উঠল।

‘কে?’

‘আমি।’

‘কুন্তি?’

‘হঁ।’

‘এখানে কী করছিস?’

‘উন্নন ধরিয়ে দিয়েছি। চায়ের জল চাপিয়েছি।’

আকাশ থেকে পড়ল ঢেমনা। একটু খুশীও যেন হল। কুস্তি উন্নন ধরিয়েছে। চায়ের জল চাপিয়েছে। একটা নতুন ঘটনা। এই বাড়ি এসে লখিন্দরের মেয়ে কোন্‌দিন নিজের হাতে চা করেছে।

‘বাবু এসেই বলল, সকাল সকাল চা করে দে, ঢেমনা ফিরতে দেরি করছে।’

‘তা দেরি হবে না!’ ঢেমনা গজগজ করে উঠল। মাথা থেকে ধামাটা নামিয়ে মিচে রাখল। বিয়ের ভাণ্ডা, কুস্তির হাতে দিল। ‘ঢেমনা ফিরতে দেরি করছে, এটুখানি রাস্তা কিনা, না কি দুটো পাখা গজিয়েছে আমার, চাঁপাডাঙ্গার হাট থেকে উড়াল দিয়ে বাড়ি ফিরব?’

‘চুপ চুপ।’ ঠোঁটে আঙুল রাখল কুস্তি। ‘চেষ্টামেচি করবি না, বাড়িতে নতুন মানুষ এসেছে।’

‘হুঁ, ভূষণার মুখে শুনলাম। একটা মেয়েছেলেকে মোটর বাইকের পেছনে বসিয়ে নিয়ে এসেছে।’

‘আস্তে।’ কুস্তি ফিসফিসিয়ে উঠল। ‘মেয়েছেলে বলছিস কি—বৌ।’

‘তোকে বলল একথা?’

কুস্তি ঘাড় কাত করল।

‘এসেই বাবু আমার খোঁজ করল। চারদিনের মধ্যে তো আমার সঙ্গে কথা বলে না। আজ আমার ঘরের দরজায় উঁকি দিয়ে হেসে বলে এল, বাড়িতে বৌ এসেছে কুস্তি—তোরা একটু হুঁশিয়ার হয়ে চলাফেরা করবি, ভাল করে কাজকর্ম করবি।’

‘তারপর?’ ঢেমনার চোখ কপালে উঠল। ‘আর কি বলল?’

‘বলল, চট করে উন্নন ধরিয়ে ভাল করে ছুঁ কাপ চা করে দে—ঢেমনা আজ এত দেরি করছে কেন, সকাল সকাল রান্না নামাতে হবে। বেশি রাত করে ওর খাওয়া অভ্যাস নেই।’

‘ওরে বাপ্ ।’ গামছা দিয়ে ঢেমনা ঘাড় গলার খাম মুছে ফেলল ।
তারপর আর কথা বলছিল না ।

কেরোসিনের ডিবিটা কাছে টেনে এনে কুস্তি খামা থেকে সওদা-
গুলি এক এক করে মাটিতে নামিয়ে রাখছিল ।

‘আচ্ছা, তুই আগে চা-টা তৈরী করে দিয়ে আয় ।’ একটু পরে
ঢেমনা দরজার দিকে ঘুরে দাঁড়াল । ‘আমি মুখহাতটা ধুয়ে আসছি,
তারপর রান্না চাপানো যাবে । হুঁ, তুই বরং ও ঘরে চা দিয়ে এসে
এখানে বসে ততক্ষণ ময়দাটা ছানতে শুরু করে দে ।’

অন্ধকার উঠোন পার হয়ে কুয়োতলার দিকে যেতে যেতে ঢেমনা
অনেক কিছু ভাবছিল । আর তখন কেউ যদি রান্নাঘরে একবার উঁকি
দিয়ে কুস্তির মুখটা দেখত । এই ছ’দিনে গাল গলা যেন আরো শুকিয়ে
গেছে । চোখের কোণায় কালি । চুলে তেল নেই, সেই কবে থেকে
চিকনির আঁচড় পড়ে না । টসটসে লাল ঠোঁট শুকনো বাঁশ শাতার
মতন চিপসে বিবর্ণ চেহারা ধরেছে । কিন্তু কালো চোখ দুটো ?
এখনো তাক্সা, এখনো জল জল করছে, মনে হচ্ছে এক একবার বৃষ্টি
আগুনের ফুলকি ঠিকরে বেরোচ্ছে ।

রাত একটু বেশিই হয়ে গিয়েছিল ।

মাংস, ছোলার ডাল, চিংড়ির মালাইকারী, চাটনি, এতসব কি আর
চট করে হয় । অথচ কোনোটাই না হলে চলবে না । বৌকে সব
কিছুই খাওয়ানো চাই । কাজেই একটু বেশি রাত হলেও বাবু ভেমন
একটা রাগারাগি করল না । রাগারাগি করবে কি, দরজা জানালার

কপাট টেনে দিয়ে ভিতরে বসে ছ'জনের হাসি গল্পগুজবই শেষ হচ্ছিল না। কেবল মাঝখানে আর এক কাপ করে চা তৈরী করে দিতে হয়েছে কুস্তিকে। ঢেমনার কিন্তু একবারও ডাক পড়েনি ওঘরে। যেন তাকে কোনো দরকারই ছিল না সেখানে। তার কাজ এঘরে। রান্না নামান। 'একটু সকাল সকাল সেরে ফেলতে বল ঢেমনাকে'—কুস্তিকে দিয়ে বাবু ছ'বার তাড়া লাগিয়েছে, তা না হলে খুব একটা আজ রাগা-রাগি করেনি।

এখন ওঘরের খাওয়া-দাওয়া শেষ। তখনো আলো জ্বলছে। তবে দরজা বন্ধ হয়ে গেছে। এদিকের ছোটো জানালার একটা বন্ধ হয়েছে, একটা খোলা রাখা হয়েছে। হয়তো আলো নিভিয়ে শুয়ে পড়ার পরও ওটা খোলা রাখা হবে। হাওয়ার দরকার তো। 'ইলেকট্রিক আলো নেই, পাখা নেই এই যা অসুবিধা। তা না হলে গাঁয়ের মতন এমন সুখ তুমি পাবে না কোথাও।' খেতে বসে বৌকে নাকি বোঝাচ্ছিল বাবু। কুস্তি দোরের কাছে দাঁড়িয়েছিল। কুস্তি শুনেছে। তারপর ঢেমনাকে বলেছে। হুঁ, কুস্তিকে আজ আর পরিবেশন করতে হয়নি। রান্না হবার পর ওঘরে টেবিল সব দিয়ে এসেছে। ছ'জনে নিয়েটিয়ে খেয়েছে। বাবু বৌ একমজ্জই খেতে বসেছিল। তা হলেও কুস্তিকে দোরগোড়ায় দাঁড়িয়ে অশঙ্কা করতে হয়েছিল, যদি কিছুর দরকার হয়। খাওয়া শেষ হতে এঁটো বাসন-গুলি সরিয়ে কুস্তি টেবিল পরিষ্কার করে দিয়ে এসেছে। তারপর আর তাকে ওঘরে যেতে হয় নি। 'আর তোর দরকার নেই।' বলে বাবু নাকি ক্রমাল দিয়ে মুখ মুছতে মুছতে দরজার পাশা ছোটো টেনে খটাস করে ছিটকিনি তুলে দিয়েছে।

কুস্তি কিছুই খেল না। ঢেমনা ছ'একবার সেখেছে। খিদে নেই বলে কুস্তি নিজের ঘরে গিয়ে দোর বন্ধ করে শুয়ে পড়েছে। লখিন্দরের মেয়ের খাওয়ার রুচি ক'দিন থেকেই ছিল না, আজ সে একেবারেই কিছু মুখে তুলবে না, কিছুই খেতে পারবে না, ঢেমনা কি আর বুঝতে

পারছিল না, খুব বুঝতে পারছিল। কিন্তু তার কিছু করার ছিল না।
তা হলেও রাতেই কুস্তিকে সে বুঝিয়েছে, ‘এখান থেকে চলে যা, আর
এখানে কিসের লোভে পড়ে থাকবি, বাবু বিয়ে করে বৌ নিয়ে
এসেছে, মানুষটা বদলে গেছে, খামকা তুই আর এখানে থেকে
ঝামেলা পাকাবি না।’

‘কিসের ঝামেলা শুনি।’ কুস্তি এতক্ষণ মিনমিনে গলায় কথা
বলছিল। হঠাৎ মুখটা বিকৃত করে এমন ঝামটা লাগাল, ঢেমনা
রীতিমত ঘাবড়ে গেল। লখিন্দরের মেয়ের কালো চোখ দুটো সাপের
চোখ হয়ে জ্বলছিল। ‘ওঘরে গুতে গেছি? আমার মুখের ওপর
দোর আটকে দিয়েছে, তুই কি দেখিসনি। তুই কি কানা।’

‘আমি দেখিনি, তোর মুখে শুনলাম।’ ঢেমনা মাথা গুঁজে পোড়া
কড়াই খুস্তি ডেকচি হাতা একপাশে সরিয়ে রাখছিল। সকালে সব
মাজতে হবে তাকে। ‘তা হলে এবার খেয়ে নে।’ ঢেমনা আর
একবার সেধেছিল।

‘উহু’, এবাড়ির জলটাও আমার গলা দিয়ে গলবে না, তুই বেশি
কথা বলবি না, চুপ থাক।’

‘তাই তো বলছিলাম, চলে যা এখান থেকে—এখন থেকে
চাকরানি হয়ে থাকতে হবে তোকে এই সংসারে। আজ উনন
ঘরাতে বলেছে, কাল বাসন মাজতে হবে। সকালে ঘুম থেকে উঠেই
বাবু বলবে, বৌয়ের বাসি কাপড়চোপড় ধুয়ে দে।’

‘ইস্ কত বড় আস্পর্দা—বৌয়ের বাসি কাপড় ধুয়ে দে।’ কুস্তির
নিশ্বাস থেকে আগুনের হলকা ঝরছিল। ‘উহু, আমি যাব না,
একটা হেস্তনেস্ত না করে এবাড়ি থেকে নড়ব না।’ চাপা আত্নাদেব
মন্তন গলার স্বর করছিল কুস্তি।

‘কী আর হেস্তনেস্ত করবি—যা হবার তো হয়ে গেল।’ ঢেমনা
মাথা নেড়েছিল। ‘বিয়ে থা করে বাবু এখন সংসার পেতে বসল,
এরপর ছেলেপুলে হবে। এখানে আর থেকে তোর লাভ কী—হু,

তবে কিনা, থাকতে হলে আমার মতন বাটনা বাটাতে হবে, জল
ভুলতে হবে, রাঁধতে হবে—বাসন মাজতে হবে—’

‘তুই চুপ কর, তুই থাম, তোঁর কথার কী দাম আছে।’ রাগে
ছঃখে কুস্তি তখন থর থর করে কাঁপছিল, যেন হঠাৎ কী করবে চিন্তা
করতে পারছিল না। দাঁত দিয়ে নিচের ঠোঁটটা একবার কামড়ে
ধরেছিল, পরক্ষণে এমন চোখ করে ঢেমনার দিকে তাকিয়েছিল
যেন ছুটে এসে ঢেমনার ওপর ঝাঁপিয়ে পড়ে তার মাথার চুল ছেঁড়ে—
তাকে আঁচড়ে কামড়ে দেয়। কিন্তু তখনই যেন নিজের ভুল বুঝতে
পেরে একখণ্ড ঠাণ্ডা পাথরের মতন জমাট বেঁধে গেছে মেয়েটা,
বোবা হয়ে গেছে। তার হাত পা নড়ছিল না, চোখের তারা দুটো
স্থির হয়ে গিয়েছিল। যেন সে বুঝতে পেরেছিল, ঢেমনার কোনো
দোষ নেই, তার ওপর রাগ করে কী হবে—দোষ তার ভাগ্যের।
চোখের আগুন নিভে গিয়ে সেখানে জল চিক চিক করছিল।
তারপর আর সে দাঁড়ায় নি। রান্নাঘর থেকে বেরিয়ে নিজের
ঘরে গিয়ে দোর বন্ধ করে আলো নিভিয়ে শুয়ে পড়েছে। ঢেমনার
খিদে পেয়েছিল। সে আর অনাহারে থেকে করবে কী। ডিবির
সলতের গায়ে থোকা থোকা কালির ফুল জমেছিল। আঙুলের
টোকা দিয়ে ফুল ঝেড়ে দিতে আলোর শিখা দপ্ দপ্ করে উঠল।
এবার মাংসের বাটি, ডালের বাটি টেনে নিয়ে পরটা ছিঁড়ে সে
খেতে আরম্ভ করল। কুস্তি খেল না। তার ভাগেরটাও সে খেয়ে
নিল। নতুন বোয়ের কল্যাণে খাওয়াটা ভালই হচ্ছে, চিন্তা করে
ঢেমনা খুশী হতে চায়, কিন্তু পারল না, যেন তার চারদিকে পৃথিবীটা
কেমন থম থম করছিল। যেন সে বুঝতে পারছিল, ধারে কাছে
কোথাও একটা অশান্তি ওৎ পেতে আছে। উঁহু অশান্তি না,
একটা শয়তান। অর্থাৎ সে কিছুতেই বিশ্বাস করতে পারছিল না,
নিমাইবাবু রাতারাতি এমন ভাল মানুষ হয়ে গল। বিয়ে করে
সুসারী সাজল, না কি শয়তানের এ এক নতুন চাল।

রাত্রে মানুষটাকে দেখা হয়নি, পরদিন সকালবেলা বৌয়ের মুখ দেখে ঢেমনা স্তম্ভিত।

বৌ স্নান করবে। কুয়ো থেকে ঢেমনা বাগতি বাগতি জল তুলে আনছিল।

সেই যে ভেবেছিল, কাছ বেড়ে যাবে, তার খাটুনি বেড়ে যাবে। তাই তো হল।

ঘুম থেকে উঠেই মেজাজ খারাপ হয়ে গেল ঢেমনার। আর মেজাজ খারাপের মুখে কিনা বাবুর নতুন গিন্নীর চেহারাটা দেখতে হল। বারান্দায় দাঁড়িয়ে গিন্নী টবের ফুল দেখছিল।

দাঁতে দাঁত চেপে থাকল ঢেমনা, গুম ঘেরে রইল কতক্ষণ। তার কপালের ছ'পাশের রং রক্ত জমা হয়ে ফেটে পড়ার উপক্রম করছিল। কান দিয়ে যেন ধোঁয়ার মতন কিছু বেরাচ্ছিল।

‘জল আনা হয়েছে।’ ঢেমনা জানিয়ে দিল। হাতে তোয়ালে সাবানের বাস্ন নিয়ে তৈরী হয়েছিল গিন্নী। কথা না বলে উঠানে নেমে ঝোপের ওপাশে বাঁশ দিয়ে ঘেরাও করা জায়গাটায় চলে গেল। আগে ওখানে কুস্তি স্নান করেছে।

ঢেমনা আর অপেক্ষা করল না। ছুপদাপ করে বারান্দায় উঠে বাবুর ঘরে ঢুকল। মুখে সিগারেট গুঁজে বাবু আয়নার সামনে বসে দাড়ি কাষাচ্ছিল।

‘এই তোর বৌ?’ কোনোরকম ভূমিকা না করে ঢেমনা প্রশ্ন করল।

বাবু চোখ তুলে তাকাল, মুখ থেকে সিগারেট নামিয়ে হাসল।

‘খুব অবাক হচ্ছিস মনে হয়।’

‘না, অবাক হবার আছে কি!’ ঢেমনা অশ্রুদিকে চোখটা সরিয়ে নিল।

‘তোর সঙ্গে পাল্লা দিয়ে চলবে, সংসারে এমন মানুষ আছে নাকি।’

‘কী মুশকিল!’ নিমাই ভুরু কৌচকাল। ‘বিয়ে করে বৌ ঘরে আনলাম, তাতেও তোরা ঘ্যানর ঘ্যানর।’

‘তোদের বিয়ে হয়ে গেছে? বুকে হাত দিয়ে একথা বলতে পারিস?’

‘নিশ্চয়। দলিলপত্র আছে যে। যদি দেখতে চাস দেখাতে পারি। পরশু রেজিষ্ট্রি অফিসে গিয়ে আমরা স্বামী-স্ত্রী হয়ে এসেছি।’

আর যেন ঢেমনার মুখে কথা সরছিল না।

‘কি, চুপ করে রইলি কেন।’ নিমাই মিটিমিটি হাসছিল।

‘বুড়ো কর্তাকে জানিয়েছিস তোদের এই বিয়ের ব্যাপার? তোরা মা জানে?’

‘জানাব, এত তাড়াহড়োর আছে কী। বিয়ে যখন করেছি ছেলের বৌও তারা দেখবে।’

‘এফ্, ভাবতেও আমার গায়ে কাঁটা দিচ্ছে—’ ঢেমনা দূরে সরে দাঁড়াল। ‘তোরা নিশ্বাস গায়ে লাগা পাপ।’

‘লাগাবি না, আমি তো বলেছি, এখানে তোরা না পোষায় কলকাতা ফিরে যা।’

‘যাব না।’ ঢেমনা গর্জন করে উঠল। ‘বলেছি, তোরা শেষ না দেখে আমি এ বাড়ি থেকে নড়ব না। গিয়ে বুড়ো কর্তাকে তো আমায় একটা কৈফিয়ৎ দিতে হবে।’

‘তোরা কৈফিয়ৎ না পেলেও বুড়োর দিন কেটে যাবে।’ নিমাই আয়নার দিকে চোখ নামাল। বিড় বিড় করে বলল, ‘ক’দিনই বা বুড়ো আর আছে।’

‘ইস্।’ নিশ্বাস ফেলার মতন একটা শব্দ করল ঢেমনা। যেন

এর পর তার আর কিছু বলার ইচ্ছা ছিল না। কিন্তু না বলেও পারল না। ‘তুই এত পণ্ড, এমন জবাব, এতবড় কুলাঙ্গার!’

‘এই ছাখো।’ নিমাই আয়না থেকে চোখ তুলল। ‘জেলের মেয়েকে নিয়ে ছিলাম, আমার মান মর্যাদা কিছুই রইল না, সেদিন এত হৈ-চৈ করলি, আজ বিয়ে করে সংসারী হলাম, তোর গালাগাল থামল না।’

‘বিয়ে করলাম, সংসারী হলাম।’ চেহারাটা বিকৃত করে ফেলল ঢেমনা। ‘তা বলে একটা বেণ্যাকে বিয়ে করে তুই ঘরে আনলি।’

‘আন্তে, এখনি চান করে ফিরবে ও।’ চেহারাটা অতিরিক্ত গম্ভীর করে ফেলল নিমাই। একটু চুপ থেকে ঘাড় ঘুরিয়ে দরজাটা দেখল। তারপর ঢেমনার চোখে চোখ রাখল। ‘তুই বেণ্যা বলছিস কাকে?’

‘বোহয়ে যে তোর ঘরে এসেছে।’

‘সেলাই কলের কোম্পানীতে ও চাকরি করত, তুই সে খবর রাখিস?’

‘চাকরি করত কিনা জানি না, কিন্তু এই মেয়েকে নিয়ে তুই মদ খেয়েছিস, এই মেয়েকে নিয়ে হোটেলে ঘর ভাড়া করে ফুটি করেছিস, তুই নিজের মুখে স্বীকার করেছিস। সার্পেন্টাইন লেনে মেয়েটা তোর গাড়িতে অজ্ঞান হয়ে পড়েছিল, আমি হাসপাতালে নিয়ে গেলাম। আমার চিনতে ভুল হয়নি নিশ্চয়ই?’

‘আমি তো বলিনি তুই চিনতে ভুল করেছিস। এই মেয়ে, হুঁ, এই মেয়েকে নিয়ে আমি বার-এ বসে মদ খেয়েছি, হোটেলে নিয়ে গিয়ে ফুটি করেছি। একদিন না—অনেকদিন। তাতে হল কি। সেদিন সে আমার আমোদের সঙ্গিনী ছিল, আজ তাকে জীবনসঙ্গিনী করলাম।’

‘তাই বলছি, তোর লাইন ঠিকই আছে—মাঝখান থেকে এখানে এসে একটা নিরীহ মেয়েকে, পাপ কাকে বলে যে জানত না—তার

জীবন নিয়ে ছিনিমিনি খেললি, তাকে নষ্ট করলি, এখন ছিবড়ের মতন ছুঁড়ে ফেলে দিচ্ছিস।’

‘তোমার কথা শুনলে হাসি পায়।’ নিমাই একটু হাসল। ‘ছুঁড়ে ফেলে দিয়েছি কোথায়? জলে না আগুনে? দিব্যি খাচ্ছে দাচ্ছে, কাজ করছে, এই তো একটু আগেও আমাদের ছ’জনকে চা করে দিয়ে গেল।’

দাঁতে দাঁত চেপে ঢেমনা চুপ করে রইল।

‘কেন, সে কি তোমার কাছে কান্নাকাটি করছে? আমি বিয়ে করে ঘরে বৌ এনেছি বলে লখিন্দরের মেয়ের খাওয়া দাওয়া ঘুম বন্ধ হয়ে গেল?’

‘অনেকটা তাই, কাল রাত্রেও কিছু খায়নি।’

‘কী দরকার এত কষ্ট করে এখানে থাকার, ভাল না লাগে বাপের কাছে চলে যাক।’

‘তাই তো, তোমার প্রয়োজন যখন শেষ হয়েছে তখন এ ছাড়া আর তোমার বলার কী আছে—কিন্তু শোন—’ চোখ দুটো ছোট করে ফেলল ঢেমনা। ‘যত সহজে সে এবাড়ি এসেছিল, এখন ফিরে যাওয়া তার পক্ষে তত সহজ নয়।’

‘কেন?’ নিমাই ভুরু কঁচকাল।

‘কলঙ্ক দুর্নাম।’ ঢেমনা ছেড়ে কথা বলল না। ‘তার সঙ্গে, তুই মনিব হয়ে বাবু হয়ে কী সম্পর্ক পাতিয়েছিলি গাঁয়ের মানুষের অজানা নেই। কাজেই মুখে এত কালি নিয়ে গাঁয়ে ফিরে যাওয়া তার পক্ষে এখন শক্ত হবে।’

‘ছেলেমানুষের মতন কথা বলছিস।’ গলায় ঢেউ তুলে নিমাই হাসল।

‘মেয়েছেলের গায়ের কালি কতক্ষণ লেগে থাকে—তুই এই নিয়ে যতটা ভাবছিস, সে ততটা ভাবছে না। একবার গিয়ে জিজ্ঞেস করে দাখ—ধুয়ে ফেললেই কালি উঠে যায়—ঝিনুকডাঙ্গার বিলে দুটো

সাঁতার কেটে ডুব দিয়ে উঠুক, আবার তাজা টাটকা খাসা মেয়ে হক্কে
যাবে, গাঁয়ের যে কোনো জোয়ান ছেলে লুফে নেবে।’

‘নির্লজ্জ পশু!’ মুখটা ফিরিয়ে নিল ঢেমনা। ‘তোর ঐ চোখ
দিয়ে, তোর মন নিয়ে তুই ছুনিয়াটাকে বিচার করিস কি না, তাই
তোর পক্ষে সবই সহজ, তুই সব পারিস, একটা বেশাকে ঘরে
আনতেও তোর আটকায় না।’

‘এখান থেকে তুই বেরিয়ে যা, অকৃতজ্ঞ বেইমান।’ চেয়ার থেকে
নিমাই প্রায় লাফিয়ে উঠে দাঁড়াল।

‘আমি অকৃতজ্ঞ, আমি বেইমান।’ ঢেমনার গলার স্বর কেঁপে
উঠল। কিন্তু আর একদিনের মতন হাউ হাউ করে সে কেঁদে উঠল
না। হাত দিয়ে চোখ ঢাকল না। একটা গরম নিশ্বাস ফেলে
চৌকাঠের এপারে চলে এল।

এ কোন্ রহস্যের খেলা, এ কেমন হৈয়ালি। মাথাটা ঝিমঝিম করছিল
ঢেমনার। তার ইচ্ছা করছিল তখনি ভাল করে কোথাও ডুব দিয়ে
স্নান করে আসে। উঁহ, কুয়ার জলে না, কোনো বড় দীঘিতে নেমে
স্নান না করলে যেন তার গায়ের ময়লা দূর হবে না, যেন তার গায়ে
পোকা কিলবিল করছিল, অনেকক্ষণ পরিষ্কার জলের মধ্যে শরীরটা
ভিজিয়ে না রাখলে পোকা ময়লা দূর হবে না।

কিন্তু ইচ্ছাটা সে দমন করল। এখনো হাতের কাজ বাকি,
অনেক ময়লা তাকে ঘাঁটতে হবে। ঐ গিল্লী সকাল সকাল খেয়ে
আজ আবার কলকাতা যাবে। আরও কি সব জিনিসপত্র কেনাকাটা

বাঁকি। ফিরতে সক্ষম হতে পারে, রাতও হতে পারে। কাজেই
গা ঘিন ঘিন ভাব নিয়েই ঢেমনা এবেলার মতন ছজনের রান্না নামিয়ে
দিল। ময়লা শরীর নিয়েই তো ঘেলার কাজ সারতে হয়।

‘হঁ, রাস্তিরে পরটা, মুগের ডাল, বেগুন ভাজা, আলু ভাজা।
আজ আর মুগী না, পাঁয়রার মাংস হবে, আর আলুবোখরার
চাটনি।’ বাড়ি থেকে বেরোবার আগে বাবু রান্নাঘরের দরজায়
টুকি দিয়ে ঢেমনাকে কথাগুলি শুনিয়ে গেল। ঢেমনাকে কাছে
ডাকল না, তার মুখোমুখি দাঁড়িয়ে বাবু কথা বলল না। যেন
রান্নার জায়গাটাকে উদ্দেশ্য করে রাত্রে ভূরি ভোজনের ফর্দটা বাবু
বড় গলায় আওড়ে গেল। ঢেমনার এক কান দিয়ে কথাগুলি ঢুকল,
আর এক কান দিয়ে বেরিয়ে গেল।

যাই বলো, বাবুর দয়ার শরীর। বেরোবার আগে কুস্তির ঘরের
দরজার সামনেও কিন্তু একবার থমকে দাঁড়াল। কুস্তিকে ডাকল না,
মুখোমুখি দাঁড়িয়ে লখিন্দরের মেয়েকে কিছু বলল না। তা হলেও
ঘরের দরজাটাকে উদ্দেশ্য করে নিমাইবাবু জানিয়ে গেল, ‘তোর মন
খারাপ করার তো কিছু নেই, তুই যেমন ছিলি তেমন থাকবি—
ঢেমনার সঙ্গে থেকে ঘরের কাজকর্ম করবি—জামাকাপড় যেমন
পাচ্ছিলি পাবি—আর যদি মনে করিস অতিরিক্ত একটা মানুষ
এসেছে, কাজ বেড়ে গেছে—এই নিয়ে ভেতরে ভেতরে গুমরে মরে
লাভ কি, তোরা টাকা বাড়িয়ে দেব, এমাস থেকে ডবল মাইনের
টাকা পাবি—বুঝলি, মনে স্মৃতি নিয়ে কাজ কর।’

ঢেমনাও শুনল। রান্নাঘর থেকে কুস্তির ঘর তো খুব একটা দূরে
না। কথাগুলি শুনে সে হাসল। শয়তান টাকা দিয়ে মানুষের মান
অভিমান দুঃখ বেদনা লজ্জা অপমান—সব কিনে নিতে চাইছে, যেন
টাকা ছিটোলেই পাকা আমলকীর মতন ছনিয়ার সবকিছু তাৎ হাতের
মুঠোয় এসে যায়।

কিন্তু কুস্তি কি একবার উঠল, দোর খুলে সামনে এসে দাঁড়াল।

টেমনা কান খাড়া করে রাখল। বন্ধ দরজা যেমন ছিল তেমন থেকে গেল। গিন্নীর হাত ধরে কতী বাড়ি থেকে বেরিয়ে গেল। বাইরে বাগানের ওধারে মোটরবাইক স্টার্ট দেওয়ার ভট্‌ভট্‌ শব্দটা একবার শোনা গেল। তারপর শব্দ দূরে মিলিয়ে গেল।

না, কুস্তি আর ওঠেনি। সকালে একবার রান্নাঘরের দিকে এসেছিল। ছুঁ কাপ চা করে দিয়ে সেই যে গিয়ে তার ছোট ঘরের দরজা বন্ধ করে শুয়ে পড়েছে, হয়তো শুয়েই আছে, টেমনা অনুমান করছিল। তারপর আর একবারও বাইরে তার মুখ দেখা যায়নি। তার মানে আজ মেয়ে শোয়া ছেড়ে আর উঠবেই না, স্নান করবে না, খাবে না। চুল বাঁধা কাপড় ছাড়া, কিছুই করবে না।

একটা তেতো ঢোক গিলে টেমনাও চুপ করে বসে রইল। আর তার কিছু করবার ছিল না। উনন নিভিয়ে দিয়েছে। তা হলেও ঘরের ভিতর গরম লাগছিল, দাওয়ার কাছে সরে এসে একটা খুঁটির গায়ে মাথাটা ঠেকিয়ে ছুঁপা ছড়িয়ে দিয়ে সে বসে রইল। রোজ দেখছিল। আশ্বিনের রোদ আগুন ছড়াচ্ছিল। কোথায় যেন একটা টিকটিকি ছুঁবার ডেকে উঠে তারপর থেমে গেছে। কিন্তু শব্দ করছিল একটা ঘুণ পোকা। যেন চৌকাঠের কাঠ কুরে কুরে খাচ্ছিল আর একটা চাপা ঘুসুঘুসু শব্দ বাতাসে ছড়িয়ে দিচ্ছিল।

বলতে কি, ছপুর্টা যেন রাতের চেয়েও বেশি থমথম করছিল। নতুন বৌকে নিয়ে শয়তান কলকাতা চলে গেছে। কিন্তু তার ছায়াটা যেন এখানে রেখে গেছে। ঘরের আনাচে কানাচে, উঠানের এধার ওধার, লেবুঝোপের তলায়, কখনো বাগানের এপাশে ওপাশে ছায়াটা ঘুরঘুর করছিল। অদৃশ্য ছায়ার শব্দ শুনছিল টেমনা। শয়তানের নিশ্বাসের শব্দ তার কানে আসছিল।

তাই টেমনা ভাবছিল, বাইরে থেকে দেখলে মাথার ওপর আকাশটা কত প্রকাণ্ড, কেমন গাঢ় নীল ঝকঝকে—পাকা কাঁঠালের কোয়ার মতন রোজের কী চমৎকার সোনালী হলুদ রং, আর অফুৎত তাক

টোটকা ফুরফুরে হাওয়া—ছ'মাসের রোগী শহর ছেড়ে এখানে এসে থাকুক, তিন দিনে শরীর ভাল হয়ে যাবে, গালে রং লাগবে, রক্তের জোর ফিরে পাবে। এই জন্মই বেলেঘাটার বুড়ো কর্তা এত নিশ্চিত। কলকাতার আকাশে পোকা, বাতাসে পোকা, বেলেঘাটার আকাশে ধোঁয়া কালি, বাতাসে ময়লা। জলে হাজার ব্যারামের বীজ। দেশের গাঁয়ের চমৎকার জল হাওয়া গায়ে লাগিয়ে খোকা এতদিনে ভাল হয়ে উঠেছে, তার রোগ সেরে গেছে, এখন সে সবল সুস্থ তাজা মানুষ। মাছের চাষ করছে, ক্ষেত খামারের কাজ দেখা শোনা করছে।

ঠোটে একটা চেরা হাসি নিয়ে ঢেমনা এসব ভাবল, তারপর একটা লম্বা নিশ্বাস ছেড়ে উঠে দাঁড়াল। আর তার কিছু করার নেই, সে অনেক করেছে এ পর্যন্ত, চাকর হয়ে খেটে খেটে এই ক'মাসে শরীর-পাত করেছে। বলে কিনা, ভাগুর ভিতরে যদি বিষ থাকে, ওপর থেকে ভাঙ খোয়া মোছা ঘষা মাক্রা করলে কী হবে।

কাজেই যেমন ভাঙ তেমন থাকুক। ঢেমনার এবার বিদায় নেবার পালা। ঘিনঘিনে শরীরটা পরীক্ষার করার জন্ম তার সেই কখন থেকে স্নান করতে ইচ্ছা করছিল। কিন্তু এখনো একটা ছোটো কাজ বাকি রয়ে গেল না?

বেলা যতটা চড়বার চড়েছে, এখন বুঝি গড়াবার পালা। রোদের চেহারা দেখে ঢেমনা বুঝল।

পশ্চিম সীমানার নারকেল গাছের ছায়া এবার উঠোনে বাড়তে আরম্ভ করেছে। আকাশে চিল দেখা গেল।

এক পা ছ পা করে ঢেমনা কুস্তির ঘরের দরজার সামনে গিয়ে দাঁড়াল। ডাকল। লখিন্দরের মেয়ে সাড়া দিল না।

‘শোন’, দরজার বাইরে দাঁড়িয়ে ঢেমনা ঠাণ্ডা গলায় বলল, ‘বরং এখানে আমি এক বালতি জল এনে দেই—মাথাটা ধুয়ে ফেল।’

কুস্তি শয়্য করল না।

‘মাথাটা ধুয়ে ছোটো ভাত খা, তোর জন্তে আমি আলাদা করে একটু মাছের ঝোল রেখে দিয়েছি।’

‘আমি খাব না, আমি যাব না, চান করব না, তুই এখান থেকে এবার যা, আমায় বিরক্ত করিস না ডেমনা।’

ডেমনা চুপ করে রইল। একটু চুপ থাকার পর কুস্তি ভিতর থেকে শুধোল, ‘তুই খেয়েছিস?’

‘আমি খাব না। আমার খিদে নেই।’

‘চান করেছিস?’

‘উহু,’ একটু কেশে গলাটা পরিষ্কার করে ডেমনা বলল, ‘আরো একটা ছোটো কাজ বাকি আছে। সব সেরে একেবারে চান করে গা হাত পা মুখ বেশ পরিষ্কার করে তারপর এখান থেকে বেরিয়ে পড়ব।’

‘হাটে যাবি?’

‘উহু,’ ডেমনা বাইরে থেকে মাথা নাড়ল। ‘আমি চলে যাচ্ছি, আর এখানে থাকব না।’

এবার দরজাটা নড়ে উঠল। দরজা খুলে গেল।

‘চাকরিটা ছেড়ে দিলি?’

ডেমনা ঘাড় নাড়ল। হাঁ করে কুস্তির ফ্যাকাশে শীর্ণ মুখটা দেখল, ক্লক এলোমেলো চুল বোঝাই মাথাটা দেখল, চোখের নিচের কালি দেখল।

‘চাকরি ছেড়ে দিয়ে এখন কী করবি?’ শুকনো গলায় কুস্তি প্রশ্ন করল।

‘কলকাতায় গিয়ে রুটির গাড়ি ঠেলব।’ ডেমনা অশ্রুদিকে চোখ ফেরাল। একটু চুপ থেকে পরে আবার কুস্তিকে দেখল। ‘বুঝলি, একটা বেণ্ডার ভাত রাঁধতে আমি এখানে থাকব।’

‘কে বেণ্ডা?’ কুস্তি আঁংকে উঠল না।

‘বৌ, নতুন বৌ, বাবুর গিন্নী।’

কুস্তির চোখের পলক পড়ল না।

‘আমার চোখে দেখা।’ ঢেমনা বলল, ‘এ মাগীকে নিয়ে তোর বাবু একসঙ্গে বসে মদ খেয়েছে,—হোটেল নিয়ে গিয়ে ফুঁতি করেছে, একদিন না অনেকদিন, এখন বলছে বৌ। বিয়ের আপিসে গিয়ে নাকি বিয়ে করেছে।

‘ওফ্, কত বড় শয়তান!’ দুর্বল শরীরটা নিয়ে কুস্তি দাঁড়াতে পারছিল না, চৌকাট ধরে বসে পড়ল।

‘তাই তো বলছি, এখান থেকে চলে যা’, ঢেমনা একটু ঝুঁক দাঁড়িয়ে কুস্তিকে বোঝায়, ‘এখন তুই বাবুর কাছে আখের ছিবড়ে ছাড়া কিছু না, আমি তো চললাম, তোকে দিয়ে রাঁধাবে, বাসন মাজাবে, বৌয়ের কাপড় কাচাবে।’

কুস্তি স্থির হয়ে বসে রইল। চোখটা মাটির দিকে। ঘেন গভীরভাবে কিছু ভাবছিল।

‘হঁ, তবে কিনা’, একটু চিন্তা করে ঢেমনা আবার বলল, ‘বাবু বলে গেল শুনলাম, তোর টাকা বাড়িয়ে দেবে, ডবল মাইনে পাবি তুই এখন থেকে।’

‘তার টাকায় আমি থুথু ফেলি।’ বলতে বলতে কুস্তি সত্যি দাওয়ার সামনে খানিকটা থুথু ছিটিয়ে দিল, তারপর ক্লান্ত উত্তেজিত চোখ দুটো ঢেমনার মুখের দিকে ভুলে ধরল।

‘শোন’, ঢেমনা একটা ঢোক গিলল, এদিক ওদিকে তাকাল, তারপর আবার মুখে কুস্তির মুখের কাছে মুখটা বাড়িয়ে দিল। ‘কথাটা তোকে বলা হয়নি, কাল হাটে যাবার সময় ওদের সঙ্গে দেখা, পরাশর মদন রাসু নটবর—বাড়ি ফিরে শয়তানের নতুন কীর্তি দেখে, হঁ, তার ঐ বৌটাকে দেখে মাথার ভেতরটা কেমন গোলমলে হয়ে গেল, তাই তোকে বলতে ভুলে গেছি—মদনের দল ভয়ানক ক্ষেপে গেছে। ওরা চাইছে আজই তুই এই নরক ছেড়ে বাপের কাছে ফিরে যা।’

‘আমি যাব না।’ শুকনো চোয়াল ছুটো শক্ত করে বলল লখিন্দরের মেয়ে। ঢেমনার মুখের ওপর থেকে চোখ সরিয়ে নিয়ে ওদিকের লেবুগাছটা দেখতে লাগল।

‘কেন, যাবি না কেন!’ ঢেমনা ক’শাল কৌচকাল। ‘এখানে, এই ঘেরার জীবন তোর ভাল লাগবে? একটা বেশার ভাত রাঁধবি, রোজ ঘুম থেকে উঠে তার বাসি কাপড় ধুবি?’

কথা বলল না কুস্তি। তার চোখ ফেটে জল এল। ঢেমনা চট করে অন্যদিকে দৃষ্টিটা সরিয়ে নিল। নারকেল গাছের ছায়াটা বেশ লম্বা হয়ে গেছে ততক্ষণে।

‘শোন’, একটু পরে ঢেমনা আবার কুস্তির দিকে মুখ ফেরাল। ‘ওরা তোকে ভালবাসে, তোর ভালর জন্তই তোকে এ বাড়ি ছেড়ে যেতে বলছে, তা ছাড়া—তা ছাড়া, শুনলাম, আমি নিজের চোখেও দেখলাম, ঐ যে ছোঁড়া পরাশর, কেমন ভাসা ভাসা চোখ ছুটো, বাশির মতন নাক, তোকে ভয়ানক ভালবাসে, লুকিয়ে লুকিয়ে তোর ছবি আঁকে।’

ছ’হাতে মুখ ঢেকে কুস্তি ফুঁপিয়ে ফুঁপিয়ে কাঁদতে লাগল।

‘কাজেই, আমার তো মনে হয়’, ঢেমনা উপদেশ দেবার মতন করে বলল, ‘তোর আজই এই পাপপুৰী ছেড়ে চলে যাওয়া উচিত।’

আরো কিছুক্ষণ কাঁদার পর হঠাৎ চোখ থেকে হাত সরিয়ে ফেলল কুস্তি। চোখে জল, তা হলেও কটমট করে ঢেমনাকে দেখল। যেন ভেজা চোখ ছুটো আগুনের ফুলিঙ্গ হয়ে দপ্‌দপ্‌ করতে লাগল।

‘তুই এখান থেকে সরে যা ঢেমনা, আমি ভালয় ভালয় বলছি, আমার সামনে থেকে সরে যা, তোর চাকরি করতে ভাল না লাগে ছেড়ে দিয়ে কেটে পড়—আমায় বিরক্ত করিস না। আমি কোথাও যাব না।’

‘কেন?’ গলার স্বর রুক্ষ হয়ে উঠল ঢেমনার। ‘তা হলে তুই এখানেই পড়ে থাকবি?’

‘উঃ আবার!’ আর্তনাদের মতন শব্দ করল কুন্তি, কাঁপতে কাঁপতে উঠে দাঁড়াল।

‘তোরা পায়ে ধরি ঢেমনা, আমার সামনে থেকে সরে যা, আমার এভাবে তুই জ্বালাতন করিস না, আমার কোথাও যাবার জায়গা নেই, আমাকে এখানেই থাকতে হবে।’

‘ওরা আসবে,’ গম্ভীর গলায় ঢেমনা বলল, ‘আজ সন্ধ্যার পর নটবর পরাশর মদন রাসু—সব দল বেঁধে বাড়ি চড়াও করবে, তারপর তোকে এখান থেকে বার করে নিয়ে যাবে।’

‘না না না, আমি কিছুতেই যাব না,’ যেন ভয় পেল কুন্তি, বাঁশ পাতার মতন ক্ষীণ শরীরটা ধর ধর করে কাঁপতে লাগল, কাঁপতে কাঁপতে কুন্তি মাটিতে বসে পড়ল, যেন শেষ রক্ত বিন্দু সরে গিয়ে মুখটা মোমের মতন সাদা হয়ে গেল। ‘আঁ্যা, ওরা কেন আসছে, ওরা কেন আমায় নিয়ে যেতে চাইছে, না আমি যাব না, এখান থেকে আমার যে একচুল নড়বার উপায় নেই। আমার কিছুতেই কোথাও যাওয়া চলবে না।’

‘বেশ, তবে তুই থাক এখানে।’ রাগ করে ঢেমনা দরজা ছেড়ে চলে আসছিল। বড় করে এক দল থুথু ফেলল। আকাশের দিকে মুখ তুলে গজ গজ করে উঠল। ‘যদি ঘেন্নার ভাত খেয়ে চাকরানি হয়ে একটা লম্পাটের ঘরে সারাজীবন পড়ে থাকতে সাধ হয়ে থাকে, তো তাই থাকবি, আর আমার কিছু করবার নেই, বলারও নেই।’

‘না না, তোকে কিছু করতে হবে না, বলতে হবে না, তোরা পায়ে ধরি, তুই যা এখান থেকে, ওফ্ আমি যে আর পারি না’—বলতে বলতে লখিন্দরের মেয়ে এমন এক কাণ্ড করল, হঠাৎ কেমন বিমূঢ় স্তম্ভিত হয়ে রইল ঢেমনা, চুপ করে দাঁড়িয়ে থাকল, ঠকাস ঠকাস করে কুন্তি চৌকাঠের গায়ে কপাল ঠুকছিল।

‘এই করিস কি!’ আর চুপ করে থাকি সম্ভব হইল না, ঝাঁপিয়ে পড়ে ঢেমনা মেয়েটার হাত চেপে ধরল, মাথাটা জোর করে চৌকাঠ থেকে সরিয়ে দিতে চেষ্টা করল।

‘না না, আমায় বাধা দিস না। তুই সরে যা।’ ধাক্কা দিয়ে ঢেমনাকে সরিয়ে দিল কুস্তি। ঘন ঘন নিশ্বাস পড়ছিল তার। কপালটা কেটে গিয়ে দরদর করে রক্ত বেরোল, রক্তে চোখের জলে একাকার হয়ে ঠোট ভিজ্জে গেল, চিবুক বেয়ে সেই রক্ত ও জল টপ টপ করে বুকের জামায় পড়ে বুক ভিজিয়ে দিল। হঠাৎ কেমন অস্বাভাবিক গোল উজ্জল দেখাচ্ছিল তার চোখের তারা দুটো। ঢেমনা ভয় পেল। যেন পাগল হয়ে গেছে লখিন্দরের মেয়ে। অবিকল উন্মাদিনী মূর্তি। রক্ত এলোমেলো চুল কাঁধে বুকে কপালে ছড়িয়ে ছিটিয়ে মুখটা আরো বীভৎস করে তুলেছে।

‘এখানে থেকে এসব করে লাভ কী!’ ঢেমনা আর বাধা দিতে গেল না। উদাস শুকনো গলায় ঘরের সামনের ডালিম গাছটার সঙ্গে যেন কথা বলতে লাগল। ‘হাজার কপাল ফাটিয়ে রক্ত ঝরালেও শয়তানের মন গলবে না, লম্পট—তার চরিত্র পাণ্টায় না, একটাকে ছিবড়ে করে ছেড়ে দিয়ে আর একটাকে আমদানী করে।’

কথাগুলি হয়তো কুস্তি শুনল না। চোখ টাৱা করে ঢেমনা দেখল চৌকাঠে আর কপাল ঝুঁকছে না ছুঁড়ি, মেঝেয় লুটিয়ে পড়ে ফুলে ফুলে কাঁদছে। কাঁদুক। কতকটা নিশ্চিন্ত হয়ে ঢেমনা দরজা থেকে সরে এল। সেই যে বলে, নতুন করে কথাটা ঢেমনার মনে পড়ল, আলোর কাছে পতঙ্গ ছুটে আসে, আলোর কিছুই হয় না, পতঙ্গের পাখা পোড়ে, ডানা ভাঙে, ঘাড় মচকায়।

আর সে দেরি করল না। বেলা প্রায় শেষ। এখন আর শুধু নারকেল গাছের সরু ছায়া না, ডালিম লেবু কামরাজা গাছ—সব কিছুই ছায়া একসঙ্গে ঝাঁপিয়ে পড়ে উঠোনটাকে ঠাণ্ডা নরম করে দিয়েছে। শালিক বুলবুলি চড়ুই কিচিরমিচির করছিল। মাটির সব রোদ

এখন গাছের আগায়। শিকলের বাঁধন খুলে কুকুর ছোট্টকে সে রান্নাঘরের সামনে নিয়ে এল। ভিতর থেকে ভাতের হাঁড়িটা টেনে এনে সব ভাত উবুড় করে তাদের সামনে ঢেলে দিল। লেজ নাচিয়ে রাজা বাহাদুর চপচপ শব্দ করে ভাত খেতে লাগল। শূণ্য হাঁড়িটা আবার ভিতরে ঢুকিয়ে ঢেমনা রান্নাঘরের দরজার শিকল তুলে দিল। বড় ঘর, অর্থাৎ বাবুর শোবার ঘরে ঢুকল সে। জানালাগুলি বন্ধ করল। পিছনের দরজা বন্ধ করল। তারপর বাইরে এসে সামনের দরজার পাশা ছোট্ট টেনে দিয়ে তালা খুলিয়ে দিল। চাবিটা হাতে রাখল।

এবার সে নিজের ছোট ঘরটায় ঢুকল। না, এখন চান করবে না, এখানে জল কোথায়, কুয়োর জল গায়ে ঢালতে তার ইচ্ছা করছিল না। এই জলেও ময়লা আছে, পোকা আছে। বাড়ি থেকে বেরিয়ে রাস্তায় বড় দীঘি পুকুর দেখলে বেশ করে রগড়ে গা হাত পা মাখা পরিষ্কার করে নিয়ে কটা ডুব দিয়ে উঠবে। যাকে বলে গজান্নান করা হবে। এবাড়ির জল ছাড়া ছনিয়ার সব জলই যে পবিত্র, গঙ্গা জলের সামিল, এটা সে বেশ বুঝতে পারছিল।

দড়িতে তার লুঙ্গি গামছা ময়লা ছেঁড়ামতন একটা পায়জামা ও শার্টটা ঝুলছিল। সব টেনে নামাল সে। বিছানার ওপর একসঙ্গে সব জড়ো করে রাখল। ছোট আরশি ও দাঁত ভাঙা চিকনিটাও জামাকাপড়ের সঙ্গে বিছানার ওপর রাখল। এক টুকরো কাপড় কাচা সাবান ছিল, সেটাও সঙ্গে নিল। তার পর একসঙ্গে একটা বড় পুঁটলি করে সব বেঁধে নিল। না, আর কিছু নেবার নেই, চাকরের আর তেমন কী জিনিসই বা থাকে, বেতের স্ট্রটকেসটার দিকে চোখ গেল তার, ওটা বাবুর, ঢেমনাকে ব্যবহার করতে দিয়েছিল— কাজেই ওটা সঙ্গে নেওয়া হবে না। ঢেমনা ঠিক করে ফেলল ওটা এখানেই পড়ে থাকবে। ঢেমনা উঠে দাঁড়ায়। আর একটা কাজ বাকি আছে।

পুঁটলিটা বগলে নিয়ে ঘর থেকে সে বেরিয়ে এল। দেখল গাছের আগায় এক ফোঁটা রোদের চিহ্ন নেই। ঝাঁঝি ডাকছিল। শালিকদের চোঁচামেচি একরকম ধেমে গেছে। ঠাণ্ডা ঝিরঝিরে হাওয়া বইতে আরম্ভ করেছে। তার মনে হল, বাড়ি থেকে বেরবার উপযুক্ত সময়। ঠাণ্ডায় ঠাণ্ডায় হেঁটে স্টেশনে চলে যাবে। তবে কি না তেমন কোনো তাড়াও ছিল না তার। রাত আটটার ট্রেনও ধরতে পারে, আবার ভোরের দিকে যে ট্রেনটা কলকাতার দিকে যায় সেটাও ধরতে পারে : যে কোনো একটা ট্রেনে চাপলেই হল। ধীরে স্নেহে হেঁটে গেলেই হবে, এক সময় স্টেশনে পৌঁছানো নিয়ে কথা।

হুঁ, একটা কাজ বাকি আছে। বাগানের মালিটাকে খুঁজছিল সে। ঘরের চাবিটা তার হাতে বুঝিয়ে দিয়ে যেতে হবে। তবেই তার দায়িত্ব শেষ।

অর্থাৎ শেষপর্যন্ত ডেমনা তার কর্তব্য পালন করে গেছে, নিমাইবাবু যাতে এটা বুঝতে পারে। ঘর খোলা ফেলে রেখে চাকর পালিয়ে গেছে, ঘরের এই জিনিস নেই, সেই জিনিস খোয়া গেছে, এমন অপবাদ পিছনে রেখে যেতে সে রাজি নয়।

‘এই যে ভূষণা!’ বাগানের কাজ সেরে খুরপি টুকরি হাতে ভূষণা উঠানে পা দিতে ডেমনা সেদিকে ছুটল।

‘চাবি রাখ্।’

‘কিসের চাবি!’ অবাক হয়ে ভূষণা ডেমনার বগলের একাঙা পুঁটলিটা দেখছিল। ‘কোথায় চললি তুই?’

‘আমি চলে যাচ্ছি, কলকাতা যাচ্ছি, বাবুর ঘরের চাবি—নে রাখ্।’ ভূষণার হাতে চাবির গোছা ছেড়ে দিয়ে ডেমনা হাক্কা নিশ্বাস ফেলল, যেন মুক্তির নিশ্বাস ফেলল।

ভূষণা আর শব্দ করল না। কেন না রাগী মানুষ ডেমনা, বেশি কিছু বললে চটে যাবে, ভয়ে ভূষণা চূপ করে রইল। বাবুর সঙ্গে সকালে ডেমনা রাগারাগি করেছে, চাকরি ছেড়ে দেবে সে, এমন একটা

কথাও ভূষণার কানে এসেছিল তখন। এখন সত্যি সে চলে যাচ্ছে দেখে ভূষণার খুবই দুঃখ হল। মানুষটা খাঁটি ছিল, বিশ্বাসী ছিল, কেন যে বাবুর সঙ্গে তার খটখটি বাধছিল, ভূষণা ভেবে পাচ্ছিল না।

ফ্যাল ফ্যাল করে সে তাকিয়ে দেখছিল। মানুষটা চলে যাচ্ছে।

আর একজন চূপ করে তাকিয়ে দেখছিল। এতবড় একটা পুঁটলি বেঁধে নিজের জিনিসপত্র নিয়ে ঢেমনা বাড়ি ছেড়ে চলে যাচ্ছে। কঁদতে কঁদতে চূপ করে কখন ঘুমিয়ে পড়েছিল কুস্তি। জেগে উঠে দেখছে ঘোর ঘোর সন্ধ্যায়, ভূষণা চাবি হাতে উঠানে দাঁড়িয়ে আর ঢেমনা চলে যাচ্ছে। এই মাত্র বেরিয়ে গেল।

‘সোথায় গেল রে ও?’ উঠানে নেমে কুস্তি ভূষণাকে জিজ্ঞেস করল।

‘চাকরি ছেড়ে দিয়ে চলে গেল।’ হাতের চাবিটা কুস্তিকে দেখাল ভূষণা। ‘বাবুর ঘরের চাবি আমাকে বুঝিয়ে দিয়ে গেল।’

চূপ করে শুনল কুস্তি।

খাসা একটা দীঘি পেয়ে গেল ঢেমনা। দীঘির মতন দীঘি। অন্ধকার হয়ে গেছে। তা হলেও জল যেন আয়নার মতন চকচক করছে। নিশ্চয় জলের ওদিকটায় ওটা পদ্মবন কি শাপলাবন। খালার মতন গোল কালো কালো অসংখ্য পাতা জলে ভাসছে। অন্ধকারে অতদূর ভাল নজর যায় না। তবে শাপলা ফুল, পদ্মফুলের গন্ধের মতন একটা ঠাণ্ডা মিষ্টি গন্ধ ঢেমনার নাকে লাগল। দীঘির

পাড়ে দাঁড়িয়ে বুক ভরে গন্ধটা নিল ঢেমনা। অথচ তিনমাস যেখানে কাটিয়ে এল সেখানে ফুলের অভাব ছিল কি। শিউলি থেকে আরম্ভ করে কমল বেল টগর যুঁই রজনীগন্ধা—ফুলে ফুলে বাগান বোঝাই হয়ে আছে। না, এমন মিষ্টি গন্ধ ছিল না কোনো ফুলের। ওখানে যেন ঢেমনার মনে হত সব ফুল বিষ হয়ে গেছে—বিষের গন্ধ ছড়াচ্ছিল।

পুঁটলিটা ঘাসের ওপর নামিয়ে রেখে ঢেমনা গায়ের জামাটা খুলে ফেলল। তারপর পুঁটলির ভিতর থেকে গামছাটা টেনে বার করল।

গামছা পরে জলে নামবে সে ঠিক করল। কাপড় ভেজালে এখন শুকোবার অসুবিধা আছে।

তাড়াহুড়োর কিছু নেই।

গামছা পরে জলের কিনারে দাঁড়িয়ে মাথার ওপর প্রকাণ্ড আকাশটা দেখল সে। তারা ঝিকমিক করছে। ঘঙ ঘঙ করে একটা ব্যাঙ ডাকছিল। আর কোনো শব্দ ছিল না। সিন্ধের ক্রমালের মতন নরম মোলায়েম বাতাস তার কান কপাল ছুঁয়ে ছুঁয়ে খেলা করছিল।

ঢেমনা জলে নামল। হাঁটু জল ছেড়ে কোমর জলে চলে গেল। আরো নেমে গেল। গলা ডুবল। কান ডুবল। এবার সে ছোটখাট একটা সাঁতার কাটল। তারপর ডুব দিল। একবার দু'বার তিনবার...। ডুব দিয়ে তীরের কাছে চলে এল। তার মনে হল তিনমাসে তার গায়ে যত ময়লা জমেছিল, সব ধুয়ে পরিষ্কার হয়ে গেল। হালকা ঝরঝরে লাগছিল শরীরটা। যেন সে এবার কত মুক্ত, কত পবিত্র হল। গজা গজা—বলতে বলতে সে তীরে উঠে এল।

হুঁ, ঠিক এমন সময় একটা সোরগোল কানে এল তার। বেশ দূর থেকে গোলমালটা আসছে। চোখ তুলল সে। দেখল পূর্বদিকে পুরোনো একটা অশ্বখ গাছের পিছনে, না আরো দূরে ওদিকের

খেজুরবন আমবনের পিছনে আকাশটা লাল হয়ে গেছে। সেদিক থেকে গোলমালটা আসছে।

এখন ঢেমনা বুঝতে পারল। মদন পরাশর ওরা মশাল নিয়ে, সড়কি বল্লম লাঠি দা নিয়ে নিমাইবাবুর বাড়ি চড়াও করেছে। তারা লখিন্দরের মেয়েকে শয়তানের খপ্পর থেকে ছিনিয়ে নিয়ে যেতে এসেছে। কেউ বাধা দিলে রক্ত নেই, তখুনি খড় থেকে মাথা আগা হয়ে মাটিতে খসে পড়বে।

একটু সময় চূপ করে দাঁড়িয়ে ঢেমনা দশটা তাগড়া জোয়ান গলার হৈ-রৈ শুনল, আম খেজুর বনের পিছনে চমৎকার লাল আগুন দেখল।

‘যাক গে. এবার তো সোনা ঘরে ফিরে না গিয়ে পারবে না। দশটা জোয়ানের সামনে গাঁইগুঁই চলবে না।’ ভাবল ঢেমনা, ভেবে নিজের মনে হাসল। তারপর ভুয়ে হাত বাড়িয়ে ঘাসের ওপর ছেড়ে রাখা শুকনো কাপড়টা তুলতে গিয়ে সে চমকে উঠল। তার পুঁটলিটা ঘেঁষে যেন আর একটা পুঁটলি হাতে চূপ করে অন্ধকারে একজন বসে আছে।

‘কে।’ গলার স্বর কেঁপে উঠল ঢেমনার, তাহলেও কঠিন শব্দ হয়ে দাঁড়াল সে। ‘কে তুই?’

‘আমি।’ ছায়াযুতি উঠে দাঁড়াল।

‘কুন্তি।’ ঢেমনা বোকা হয়ে গেল। ‘তুই এখানে?’

‘আমি চলে এসেছি, পালিয়ে এসেছি ওবাড়ি থেকে।’

‘পালিয়ে এসেছিস! কোথায় তা হলে যাবি এখন?’ ঢেমনা ঝুঁকে দাঁড়াল।

‘কোথাও না’, যেন তখনো হাঁপাচ্ছিল মেয়ে। ‘আমি তোমার কাছে এসেছি, তুই ছাড়া আমার কেউ নেই।’

‘স কি।’ পায়ে মাথায় শিউরে উঠল ঢেমনা। ‘আমার কাছে এসেছিস অর্থ কি, আমি তোকে কোথায় নিয়ে যাব।’

‘আমি জানি না, আমার আর কোথাও যাবার জায়গা নেই।’
কুস্তি কঁদতে লাগল।

চূপ করে রইল ঢেমনা। তার মুখ দিয়ে কথা সরছিল না।
গলার কাছটা বড় বেশি তেতো লাগছিল। চোখ তুলে তারাভরা
আকাশ দেখল সে। চোখ নামিয়ে দীঘির ছলছল জল দেখল।
দূরের অন্ধকার গাছপালার জটলা দেখল।

‘কিন্তু কথা হচ্ছে কি—’ কুস্তির দিকে ঘাড় ফেরাল ঢেমনা। ‘ওরা
তোকে নিয়ে যেতে এসেছে, মদন, পরাশর, নটবর—ওরা তোকে ঘরে
ফিরিয়ে নিয়ে যেত, হুঁ, পরাশর—ভীষণ ভালবাসত—ছোঁড়া তোকে,
এখনো ভালবাসে।’

‘না, না না—’ কুস্তি আবার বসে পড়ল, ঢেমনার হাঁটু ছোটো শক্ত
করে আঁকড়ে ধরল। ‘ওরা আমায় নিয়ে গিয়ে কী করত, আমি যে
ফুরিয়ে গেছি, আমি যে শেষ হয়ে গেছি ঢেমনা!’

‘কিছুই ফুরোসনি, কিছুই তোর শেষ হয় নি।’ সাশুনা দিতে
ঢেমনা তার মাথার হাত রাখল। ‘ওরা তোকে খুব ভালবাসে।’

‘না না—’ ভীত ক্রান্ত গলার কারা কিছুতেই থামছিল না। পা
ছোটো ছাড়িয়ে নিতে চেষ্টা করল ঢেমনা, কিন্তু লখিন্দরের মেয়ে আরো
শক্ত করে তাকে জড়িয়ে ধরেছিল, যেন এমন ভাবে ঢেমনাকে ধরে না
রাখলে সে পড়ে যেত, ডুবে যেত, যেন কোন অন্ধকার পাতালে তলিয়ে
যাচ্ছিল মেয়ে।

‘কী হয়েছে তোর শুনি?’ রুক্ষ কঠিন গলায় ঢেমনা চিৎকার করে
উঠল, যেন আর তার ধৈর্য থাকছিল না। চান করে উঠেও কিনা তার
কপাল পিঠ ঘামছিল। ‘এমন করছিস কেন!’ মুখটা নীচের দিকে
ঝুঁকিয়ে দিল ঢেমনা।

‘শয়তান...শয়তান...শয়তান...’ অপ্রতিরোধ্য কারার আবেগে
অস্পষ্ট হয়ে যাচ্ছিল কুস্তির স্বর, তাহলেও ঢেমনা শুনল। বুঝল।
পা ছোটো হিম হয়ে গেল। কেউ যেন দশ মণ পাথর চাপিয়ে দিল

তার মাথায় । ঢেমনা বসে পড়ল । মেয়েটাকে অন্তঃসত্ত্বা করে ছেড়ে দিয়েছে শয়তান ।

‘তুই আমায় বাঁচা...তুই ছাড়া আমার কেউ নেই ঢেমনা ।’
তার কোলে মাথা রেখে কুস্তি হাউ হাউ করে কাঁদতে লাগল । ঢেমনা উঠল না, নড়ল না । ফ্যানফ্যান কর্ত্ত পূবের আকাশটা দেখছিল । আগুন নিভে গেছে । প্রকাণ্ড একটা চাঁদ উঠছিল খেজুরবনের পিছনে ।
